

John

Angketj Altjerreng petjek

¹ Angketj rang anganentj kwet anak. Angketj rang Altjerrel-ayel anak. Angketj rang Altjerr anak. ² Angketj rang Altjerrel-ayel anak anganentj.

³⁻⁵ Angketj nhenhel-ayel Altjerrel ahelh-arlk alker-arlk tjerrtj-arlk ingkerrek arrmernek. Angketj rang iteth anthek ingkerrekeh. Iteth rang parrtj anak. Parrtj nhenh ngwemerntel parrtjelh-ilek tjerrtjeh kwetant. Ngwemerntel parrtj renh ywarn ilwernem.

⁶ Altjerrel artwang nyent tjerrtj map-warn lanthek, artwang nhenh kwerenh arreny anak John. ⁷ John rang tjerrtj map-warn alhek, inenh parrtj nhenh kwer-penh iletjeh. Kwereng inang parrtj kwer-penh awemeng, inang Altjerr renh naketjeheng. ⁸ John rang kwenh itja parrtjentj-akert anak. Rang tjerrtj map parrtj kwer-penh ilekant war. ⁹ Rang inenh lakenh ilek, "Parrtj anthwerr rang, nheng tjerrtj ingkerrek parrtjelh-iletjenh, rang ahelh nhenh-warn petjetjenh."

Altjerr-henh angketj mpwerrk-akertemeh ngwerrm-irrek

¹⁰ Angketj rang ahelhel anak. Tjerrtj inang angketj renh itja alhengk-arek, rang inehel-arleng anetjam. Angketj rang ahelh nhenh arrmernekarl! ¹¹ Angketj rang tjerrtj arlaltj kwerenh map-warn petjek, inang kwer ahentj-kwenyarl anak. ¹² Kenh tjerrtj inang angketj renh alhengk-aremel nakek, angketj rang inenh ilek, "Arrantherr Altjerr-henh peltjemeh anem." ¹³ Tjerrtj inang Altjerreh peltj-irrek, Altjerr rarrp ahentj-anek-arleng wart,

inang peltj kwerenh anetjeh. Inang itja iterrentj inehenh-akert nhenh mpwarek, Altjerrelant inenh twer angerr-akertel peltj-ilek.

¹⁴ Angketj rangemeh ngwerrm-irrek, nwernehel-ayeng anerl-alpek. Nwern renh arek, alkereng parrtj angerr-akert, Angey-henh Ler nyentant anemeng. Rang arratj anthwerr anek, nyerrkentj mernelhemel ahelh nhenh-warn petjek.

¹⁵ John-el tjerrtj map arkemel ilek, “Nhenh kwenh artwang rang, kwer-penh thang nheng arrantherrenh arrwekel ilekarl, ‘Artwang rang tjengeng ingkern petjem. Rang anek tjeng-kwenyel-amparr. Lakenh rang kwenh tjengeng angerr anthwerr anem.’ ¹⁶ Rang nyerrkentj anthwerr anem, rang nwerneh ingkerrekeh nyerrkentj mernelhem kwetant. ¹⁷ Altjerrel arrwekel nheng tjerrtj mapeh mpwareng-areng kwerenh ilek Moses-el-ayeng, rang ingkernemeh nwerneh Jesu Christ-el-ayeng kangkentj kwet mernelhek, rang nwerneh angketj arratj renh ilek Jesu Christ-el-ayeng. ¹⁸ Tjerrtj nyentel itja kwet Altjerr renh arek apek. Kel Ler nyent kwerenhelant renh arek, rang kwerel-ayeng kwet anemeng. Rant Altjerr nwerneh mernek.”

John Kwatjeh Irrpelh-ilenh-ilenh ilelhek

¹⁹ Tjerrtj Jew twernk map inang town Jerusalem-el anetjam, inang *priest* rrpwetj thwen *church* angerretj-henh rrwapenh-apenh rrpwetj thwen John-warn lanthek. Inang renh pawenherrerrek, “Ngwenham ntwang? Nthenh-arenyam ntwang?” ²⁰ John rang tjernemel ilelhek, “Yeng itja Christ rang anem, Altjerrel ngkwey alhelekarl.”

²¹ Inang renh wetharlam pawenherrerrek, “Ngwenham ntwang? Ntwang Altjerr-henh angketj angenh-angenh Elijah nheng key?” Rang tjernemel ilelhek, “Yeng itja

Elijah.” Inang renh pawenherrerrek wetharlam, “Nt-wam Altjerr-henh angketj angenh-angenh nheng key, ngkweyeny alhelekarl-penh?” Rang tjernemel ilelhek, “Itjaw!”

²² Inang renh wethemeharlam pawenhek, “Ngwenham ntwang? Kwewaleny ilelhay! Artwang nhak map, nthakenham nwern inenh iletjenh?”

²³ John-el inenh angketj angenh-angenh Isaiah-henh angketjel ilek, “Yeng kwenh tjerrtj rrrkwal-arenyarl, thang arrantherrenh ateng-ilemel ilerl-apem, ‘Ngkarteh arrwekel tjey mpwarewarrangaw!’ Angketj tjengenh alhengk-arerrerray!”

²⁴ Artwang Pharisee rrpwetj twernk inehenhel lan-thek, ²⁵ inang renh ilek, “Ntwang ilelhek, ntwang itja Christ rang anem, itja Elijah apek, itja Altjerr-henh angketj angenh-angenh arpenh nheng Moses-arl anek-artehe apek. Wenheham ntwang tjerrtj map kwatj-warn irrpelhel-ilemel *baptise-em-ilem*? Yanh itja arratj anem, lakenh mpwaretjeh!”

²⁶ John rang ilelhek, “Thang tjerrtj kwatjel war irrpelhel-ilemel *baptise-em-ilem*. Artwang nyent kel ahelhel nhenhel anem, arrantherr kwer akwenarl anem. ²⁷ Rang kwenh tjengeng ingkern petjem. Yeng itja rarteh anem. Rang mwerr anthwerr anem. Yeng anetj-anetj war, pwet kwerenhe kap-rlwetjeh apek.”

²⁸ Lakenh John rang ilelhek, rang tjerrtj map kwatj-warn irrpelhel-ilemel *baptise-em-iletjart-penh*, mer Bethany-el Jordan ulpayeng ingerr-angkwerr.

Altjerr-henh yep-yep nyerrkentj rang

²⁹ Arltang arpenhel John-el Jesu renh arek, ularr kwer-warn petjerleh. Rang tjerrtj map ilek, “Arerrerrang, artwang nhenh kwenh Altjerr-henh Yep-yep

kwek rang. Rang tjerrtj map-henh anetj rrpwaremel wem. * ³⁰ Artwang nhenh thang arrantherrenh arrwekel-antey ilek, 'Artwang rang kwenh tjeng ingkerneng petjetjenh, rang tjengeng arrwekel-antey anek tjeng-kwenyel-amparr. Lakenheng rang tjengeng inangkal-lkwer anem.' ³¹ Thang renh itja alhengk-arek arrwekel, lyetan thang renh alhengk-arem. Yeng kwenh petjekarl, arrantherrenh kwatjel-ayel *baptise-em-iletjeh*, kelant arrantherrenh alhengk-arem el aretjenh." ³² John-el inenh Jesu kwer-penh ilek, "Thang Kwerrern renh arek, alkereng kwer-warn thep ntwertert-arteh arrernelhetj-alhemeng kwerel-ayeng kwetemeh irrek. ³³ Thang renh itja-amparr alhengk-arek. Altjerrel yengenh lanthek, tjerrtj map kwatj-warn irrpel-ilemel *baptise-em-iletjenh*. Rang yengenh lakenh ilek, 'Ntwang aretjenh Kwerrern rang artwang ngwenheh apek arrernelhetj-alherleh, ntwang renh alhengk-aretjenh, Christ rang anem. Artwang nhenhel tjerrtj map Kwerrern Alngaltarel *baptise-em-iletjenh*.' ³⁴ Thang renh alhengk-arekemeh. Thang arrantherrenh ilem, artwang nhenh rang Altjerr-henh Ler anemeng."

*Jesu-el Peter Andrew kenheng-atherr ngwek,
kwertengerl anetjeh*

(Matthew 4.18-22; Mark 1.16-20; Luke 5.2-11)

³⁵ Arltang arpenhel John rang mer Bethany-el anetjam, ulpay Jordan-eng ingerr, kwertengerl kwerenh atherr-akert. ³⁶ John-el Jesu talkw alherleh rtwarek. Rang renh aremel angkek, "Artwang nhak arerl-anerray! Rang kwenh Yep-yep Altjerr-henh anem!" ³⁷ Kwertengerl ratherr John renh awek, rang lakenh angkemeng. Ratherr

* **1:29 Keth-ilentj:** Yep-yep kwek rang. Rang tjerrtj ingkerrek-henh anetj angem. Arrwekeleny map inang yep-yep kwek atwetjart. Yep-yep kwek rarteh alkereng petjekarl. Iteth kwerenh rang mentj anthelhek. Lakenh John rang ilek.

John imperl-alhemel Jesu-eng ingkern-angkwerr alherrek.

³⁸ Jesu-el alngarelhemel renh-atherrenh arek, kwereng ingkerneng petj-alherremeng. Rang renh-atherrenh pawenhek, “Wenham mpwel ahentj-irrem?” Ratherr angkek, “Rabbi! Mer nthenhel ntwang anem?” (Rabbi Anmatjerr angketjel angart-wem kaltj-anthenh-anthenh.)

³⁹ Rang renh-atherrenh ilek, “Aretjeh petj-alherry!”

Ratherr kwerel-ayeng alhek mer kwerenh-warn. Ratherr kwerel-ayeng antarl-irrek angway-angwayek-atwetj.

⁴⁰ Kwertengerl atherreng nyent anek Andrew, Simon Peter-henh tje.

⁴¹ Kweny-rtwehemeh Andrew rang parrp alhek, kek wwerenh Simon-eh palenthwetjeh. Rang renh aretj-alhemel ilek, “Nwern Messiah renh arek!” *Hebrew* angketjel renh ilem Messiah. Angketj arrpenh mapel renh anewem Christ. Christ renh Altjerrel ngkwey alhelek, renh Israel-areny map-warn lanthetjeh.

⁴² Andrew rang kek wwerenh Jesu-warn ngwerl-alpek. Jesu-el Simon renh rtwant anthwerr arek. Rang renh ilek, “Ntwang kwenh arreny Simon, ntwang John-henh ler anem. Thang ngwenh arreny Cephas ilem.” Cephas angketj arrpenhel anewem Peter.

*Jesu-el Philip Nathanael atherr ngwek,
kwertengerl kwerenh anetjeh*

⁴³ Arltang arrpenhel Jesu rang ahentj-anek mer Galilee-warn alhetjeh. Rang alherl-apemel Philip renh arek. Rang renh ngwek, “Petj-alhay tjengel-arleng.” ⁴⁴ Philip rang mer Bethsaida-areny anek. Andrew Peter kenheng atherr mer alenh kwer-areny-antey anek. ⁴⁵ Philip Nathanael-eh palenthwek. Rang renh aretj-alhemel pawenhek, “Ntwang irlpangkem key, artwang nheng-penh Moses-el

Altjerr-kenh angketj angenh-angenh mapel thwen pip-warn arrernekareh? Nwern renh arek. Arreny rang anem Jesu, Joseph-henh ler, Nazareth-areny.”

⁴⁶ Nathanael-el tjweker-irremel renh pawenhek, “Nazareth-areny key artwang mwerr anem? Itja apek!”

Philip-el renh ilek, “Kel aretjehant petjay!”

⁴⁷ Jesu-el Nathanael renh arnarek ularr petjerleh. Rang artwang nhenh kwer-penh angkek, “Artwang nhenh kwenh Israel-kenh peltj anem. Rang artwang irlpareth anem. Artwang arratj.”

⁴⁸ Nathanael-el renh pawenhek, “Nthakenharl ntwang tjeng kaltj anek?”

Jesu-el renh ilek, “Thang ngwenh arrwekel kwet arek, ntwang arnang tjwerrkel-ayeng lywel anemeng. Philip-el ngwenh ngwetj-kwenyeng-antey.”

⁴⁹ Nathanael-el renh ilek, “Kaltj-anthenh-anthenhay! Ntwang kwenh Altjerr-henh Ler rang anem, mer Israel-ek *king!*”

⁵⁰ Jesu-el renh ilek, “Ntwang kwenh yengenh nakem, thang ngwenh ilek-arleng, thang ngwenh arekarl, arnang tjwerrkel-ayeng lywel anerleh. Kelant ntwang aretjenh, thang twer angerr tjengenh mernetjenh. ⁵¹ Thang ngwenh arratj ilem, arrantherr alker renh aretjenh altjwer-irrerleh, angel alker-areny aretjenh, Tjerrtj-henh Ler kwer-warn anarnpetj-alherleh. Kwereng arrantherr aretjenh, inang alker-warn angkep alperleh.”

2

Jesu-el kwatj angart-wek wine-warn, mer Cana-el

¹ Kweny atherr-penh tjerrtj map town kwek Cana-el mer Galilee-el arraw-irrek, artwang marl thwen-henh tjenkerr arlkwetjeh-anngernt. Artwang marl thwen-henh tjenkerr, ratherr anewartemeh ineretjenh, lakenh

tjenkerr angerr arrken anyenetjenh. Jesu-kenh mwek Mary, inehel-ayeng ngwerrm anak. ² Jesu kwertengerl kwerenh map-akert mer kwerel anak-antim, tjenkerreh-artweyel inenh ngwek-arlang wart. ³ Tjenkerr inang arlkwemarleng, *wine* inehenh ywerrek, tjerrtj inang ingkerrek antjwek-arlang wart. Jesu-henh mwekelemeh Jesu renh ilek, “*Wine* ingkerrek antjwerrerrekaw!”

⁴ Jesu-el renh tjernemel ilek, “Tjengan arltang nhenh itja anem, yeng rrwapetjehan. Yeng arnterr pawenhetjal anay. Mpank arltang arrpenh-ingar yeng rrwapetjenh mernelhetjehan, kelant inang yeng alhengkaretjenheng.”

⁵ Mary-el rrwapenh-apenh map ilek, “Rang apek arrantherrenh twernemeng, arrantherr kel kwer kangkwerretjehant!”

⁶ Tjerrtj Jew map kweteth iltjang inngerr-arlk lhewelhetjart, mpwareng-areng inehenh-angkwerr. Warl kwerel *drum* kwatj-kenh 6 irnek, nheng inarl tjerrtj lhewelhetjenheng. *Drum* nyentel kwatj 100 *litres* antwerrkem. *Drum* nhenh inang pwertengarl mpwarekarl.

⁷ Jesu-el rrwapenh-apenh inenh twerneke, “*Drum* mapwarn kwatj thelewarrang, angerr-ilemel kerneh-atwetj.” Kel inang *drum* inenh-warn kwatj angerr thelek.

⁸ Kwereng rang inenh ilek, “Kwatj kwek tjampetel anweng-inemel, arrantherr nhenh twernk tjenkerreh-artwey-warn angerrerrang, rang arrkernetjeh.”

Kel inang lakenh mpwarek, rang wart inenh twernekarl. ⁹ Tjenkerrek-artwey rangemeh kwatj *wine* irrekarl renh arrkernemel antjwek. Rrwapenh-apenh inang kaltj anak, *wine* renh *drum* kwatj-akerteng inekarl. Tjenkerrek-artwey rang nhenheh itjarl kaltj anak. Rang artwang arrkar inekarl kwer ntangelhek.

¹⁰ Rang renh ilek, “Nhenh-artek *wine* mwerr anhwerr, tjekert anetj-kweny! Tjerrtjel kwenh *wine* mwerr-lkwer-amparr antjwetjeh anthem! Kwereng *wine* mwerr inehenh ingkerrek antjwek-arleng, *wine* tjekert inang ingkern anthem. Wenhengam ntwang *wine* mwerr alengkwek? Nhenh-artek *wine* mwerr anhwerr!”

¹¹ Jesu-el twer angerr kwerenh rrwapek, *town* kwek Cana-el mer Galilee-el. Lakenh rang twer angerr alkerareny anhwerr mernelhemel mpwarek tjerrtj mapeng ularr. Kwertengerl kwerenh mapel renh nakek-antem.

¹² Kwer-penh Jesu rang *town* Capernaum-warn peltj kwerenh mapel-ayeng alhek. Matj kwerenh, kenheng-nheng kwerenh kwertengerl kwerenh map inehel-ayeng angkep alpek. Inang Capernaum mer kwerel arltang rrpwetj war anak.

Jesu church angerr-warn alhek

(Matthew 21.12,13; Mark 11.15-17; Luke 19.45,46)

¹³ Tjerrtj Jew map-henh irlpangkentjeh arltang rang angathemeh irrerl-apetjam. Irlpangkentj arreny kwerenh Anper Alhekarl anak. Inang irlpangketjart, Al-tjerrel arrwekeleny map angek mer Egypt-eng. Jesu rang arrwekel Jerusalem-warn alhek, tjenkerr renh kelant arlkwetjeh. ¹⁴ Rang arentj-alpek, *church* angerr iterel *yard*-el pwelek yep-yep ntwerrert-arlk maneyeh *sell*-emiletjart. Artwang arrpenh map maney angart-wenh-wenh *table* inehenhel anetjam. ¹⁵ Jesu-el *whip* mpwarek *rope*-penh. Kwereng rang artwang ineh *yard*-eng anhelemel anpwek, yep-yep inehenh-akert pwelek inehenh-akert. Artwang maney angart-wenh-wenh map-henh *table* rang angart-wemel taly-wek. Maney inehenh-arlk irrarnp-wek. ¹⁶ Rang thep ntwerrerteh-artwey map ineh

mwekeny-irremel ilek, “Thep ntwerrent nhenh map keth-warn angerrerrang! Arrantherr itja angey tjengenh-henh warl *shop* mpwaretjeh! Warl nhenh kwenh amek-amek, arrantherr ulpert-ilem!”

¹⁷ Kwertengerl kwerenh mapemeh irlpangkek Altjerr-henh angketj nhengeh pipel-ayeng interleh, “Altjerray, yeng warl ngkwengheng mwekenh-irrem!”

¹⁸ Tjerrtj Jew twernk mapel Jesu renh pawenhek, “Wenheng ntwang lakenh mpwarek? Twer ngkwengenh mer-nay, nwern kaltj anetjengheng, Altjerrel ngwenh arrernek, lakenh mpwaretjeh?”

¹⁹ Jesu-el inenh ilek, “Warl nhenh takewarrang, kwere ng thang renh arltang atherr-penhel weth artetjenh.”

²⁰ Tjerrtj Jew twernk inang renh ilek, “Inang warl angerretj nhenheh 46 *years*-ek-atwetj rrwapek, renh artetjeh. Kenh ntwang renh arltang atherr-penhel artetjeh angkemar! kwel! Itjeng alhay!” ²¹ Jesu rang warl arrpenh-penharl angkek, nheng mpwerrk kwerenh-penh angkek. Inang pal-pal war angkek *church* angerr-penh. ²² Kelant Altjerrel renh irrerngeng kemelh-ilek, kwertengerl kwerenh map angketj kwerenheh irlpangkek. Kwereng inang Altjerr-henh angketj nakek, Jesu-henh angketj thwen nakek.

Jesu-el tjerrtj map-henh iterrentj alhengk-arem

²³⁻²⁴ Jesu rang tjerrtj mapel-ayeng Jerusalem-el anetjam-rlwer irlpangkentj Anper Alhekarleh, rang twer angerr kwerenh mernelhek. Tjerrtj mapel renh nakek twer kwerenheh. Jesu-el alhengk-arek iterrentj inehenh, inang renh lakenhant war nakek, itja arratj nakek, kwek war. Lakenheng rang ineh tjweker-irrek. ²⁵ Jesu rang tjerrtj ingkerrekeh kaltj anak, iterrentj inehenheh-arlk.

3

Jesu-el Nicodemus renh kaltj-anthek

¹ Tjerrtj Jew twernk nyent anek, arreny kwerenh Nicodemus. Rang Pharisee anek. ² Rang Jesu-warn kwenyel petjek. Rang renh pawenhek, “Kaltj-anthen-anthenhay, nwern-artek kaltj, Altjerrelant kwenh tjerrtj twer-ilem, twer kwerenh-akertel rrwapetjeh, ntwang kwenh lakenh rrwapekarl-arteh. Nwern kwenh kaltj, nwern ngwenh arek Altjerr-henh twer-akertel rrwaperleh. Lakenheng nwern kaltj, ngwenh Altjerrel nwerneh-warn lanthekarl, nwernenh kaltj-anthetjeh.”

³ Jesu-el Nicodemus renh ilek, “Arratj anthwerray, tjerrtj apek ahentj-anemeng, Altjerr-henh peltj anetjeh, rang weth ngwerrm-irretjeh-amparr. Kwereng rang Altjerr-henh peltj anetjenh kwer kwek-arteh anetjenh. Tjerrtj apek itja Kwerrernel-ayeng ngwerrm-irrek-arleng, rang itja kwet Altjerr-henh peltj anem.”

⁴ Nicodemus-el renh ilek, “Nthakenhameh tjerrtj rang weth ngwerrm-irretjenh? Tjerrtj kwenh kel mangkekarl anem, inang itja weth kwer kwek anetjenh.”

⁵ Kenh Jesu-el renh ilek, “Arratj anthwerray, tjerrtj kwenh ngwerrm-irrem kwatjel-arleng Kwerrern Alngaltarel-arleng thwen. Kwerengant rang Altjerr-henh peltj anem, Altjerr twernk angerr kwer anem. Itjeng apek itja kwetarl. ⁶ Iterl-arang! Tjerrtj angey mwekeng ngwerrm-irremarl, inang tjerrtj ahelh nhenh-areny war anem. Kenh tjerrtj ngwenh apek inang Kwerrern Alngaltarel-arleng ngwerrm-irrem, inang Altjerreh peltj-irrem, inang kwerrern alker-areny inemel anetjenh. ⁷ Thang ngwenh ilek-arleng, ntwang weth ngwerrm-irretjeh, lakenheng ntwang itja anwerlketjeh. ⁸ Iterl-arang! Iritel wernemarleng, ntwang arnangant

angelherleh arem. Ntwang irlkang renh ywarn twernem, 'Ingerreng petjang', altwerleng apek. Lakenh-artehtjerrtjel Altjerr-henh Kwerrern renh ywarn arem, Kwerrern rang tjerrtj ineh-warn irrpemeng." Lakenh Jesu-el renh alngampelh-ilemel ilek.

⁹ Nicodemus-el renh weth pawenhek, "Nthakenham tjerrtj rang weth ngwerrm-irretjenh?"

¹⁰ Jesu-el renh ilek, "Ntwang nhenhek akwen key? Ntwang kwenh tjerrtj Israel-areny mapeh inangkal angerranemeng-artany? ¹¹ Mantj awerrerrang. Nwern kaltj wart anem, lakenheng wart arrantherrenh ilem, kaltj-irrekarl arrwekel kwet arentjekarl-penh, arratj anthwerr. Wenhengam arrantherr angketj nwern-henh itja nakem? ¹² Thang ngwenh angketj ahelh-areny-penh keth-ilemel ilek. Ntwang angketj tjengenh naketj-kwenyarl. Ntwang key alhengk-arem, tharl angketj alker-areny-penh ilem? Itja apek. ¹³ Tjerrtj nyent itja Altjerr-henh merel anek apek, Tjerrtj-henh Ler rant. Rang alkereng ahelhwarn petjek. ¹⁴ Moses-el nheng amwang bronze kern ar-rernek, lakenh-arteht inang Tjerrtj-henh Ler renh arnang-arleh kern arrernetjenh. * ¹⁵ Tjerrtj ngwenhel apek Tjerrtj-henh Ler renh nakemeng, inang Altjerrel-ayel iteth ngampekarl anetjenh.

¹⁶ "Altjerr kwenh tjerrtj ahelh-areny mapeh nyerrkek, lakenheng rang Ler kweren nyent renh ahelhwarn lanthek. Kwereng tjerrtj ngwenhel apek Ler kweren

* **3:14 Keth-ilentj:** Ngkwey Moses Israel-kenh peltj map thwen rrwalel anetjam-rlwer, Moses-el amwang bronze-eng mpwarek, renh arnang arlpentj-warn arlpar-arrernek. Tjerrtj map inenh amwang mapel nhwekarl-penh, Moses rang arnang amwang bronze-akert renh kern arlpar-arrernek. Tjerrtj map inang amwang bronze aremarleng, kwer-penh inang mwerr iteth anek.

nakemeng, inang itja kwetant ilwetjenh, inang Altjerrel-ayel iteth ngampekarl anetjenh. ¹⁷ Altjerrel kwenh Ler kwerenh tjerrtj ahelh-areny map-warn lanthek, inenh anetjeng twepeh-iletjeh. Itja inenh atwetjenh. ¹⁸ Tjerrtj ngwenhel apek Ler renh nakemeng, Altjerrel inenh itja alharlkwetjenh. Kenh tjerrtj ngwenhel apek Ler renh itja nakemeng, Altjerrel inenh kel alharlkwetjenh kwetant, inang Altjerr-henh Ler nyent itja nakek-arleng.

¹⁹ “Altjerr-henh Parrtj rang tjerrtj ahelh-areny map-warn petjek. Tjerrtj inang Parrtj nhenhek ahentj-kweny anek. Tjerrtj inang ahentj-aneke anetj kwet mpwaretjek, inarrp anetj-akert. ²⁰ Tjerrtj inang anetj kwet mpwarem, inang kwenh Altjerr-henh Parrtjeh ahentj-kweny. Inang Parrtj nhenhek itja nyerrkem, Parrtjel keth-ilemeng anetj inehenh. ²¹ Tjerrtj inang arratj mpwarem, inang Altjerr-henh Parrtjek nyerrkem, inenh parrtjelh-iletjeh, tjerrtjel keth aretjeh, inang Altjerrang ularr tjerrtj arratj anemeng.”

John rang weth angketj Jesu-akert angkek

²² Kel arltang arrpenhelemeh Jesu rang kwertengerl kwerenh map-akert mer Judea-warn alhek. Jesu mer kwerele kwet antarl-irretj-alpek kwertengerl kwerenh map-akert. Inang tjerrtj map kwatj-warn irrpel-ilemel *baptise-em-iletjam*. ²³⁻²⁴ King Herod-el itja-antey John renh tjayel-warn kwernek, mpank-amparr. Tjerrtj map John-warn petjetjart mer Aenon-warn, rang inenh kwatjeh irrpel-ilemel *baptise-em-iletjeh*. Mer Aenon mer Salimeng rtwang war, kwatj rew-akert. ²⁵ John-kenh kwertengerl map artwang mer-arenyel-ayeng thwen ilterretjam Moses-henh mpwareng-areng lhewelhentj-penh. ²⁶ Inang John-warn alhemel renh ilek, “Kaltj-anthenh-anthenhay! Ntwang artwang nheng iterl-aremam, rang

nheng ngkwengel-ayeng anekarl, mer nheng Jordan ul-payel? Ntwang artwang kwer-akert tjerrtj map iletjam, rang artwang mwerr anem, Altjerrengarl petjek. Rang kwenh tjerrtj map lyet kwatj-warn irrpelh-ilemel *baptise-em-ilem!* Tjerrtj aningk kwer-warn alhem!”

²⁷ John-el inenh ilek, “Tjerrtj aningk inang kwer-warn alhem, Altjerrel inenh lanthemeng wart kwer-warn. ²⁸ Arrantherr kel kaltj, yeng nheng arrehantherr ilelhek, ‘Yeng itja Christ rang anem, Altjerrel ngkwey alhelekarl. Yeng tjerrtj war anem ahelh-areny, Altjerrel yeng Christ-eng arrwekel lanthekarl.’ ²⁹ Thang arrantherrenh ilem angketj anthetj-penh. Artwang anthetj renharl rtwaltj kwerenhel marl alhelentj kweren anthem, artwang rant kwenh anew renh inem. Itja tjei kwerenhel apek. Tjei kweren kel nyerrkemantarl, rang aremeng artwang rang anewek inemeng. Jesu rang artwang anthetj rarteh anem. Lakenh-arteh yeng Jesu-eh nyerrkem, peltj tjengenheh. ³⁰ Tjerrtj mapel kwenh Jesu renh angerr-lkwer naket-jehant, rang kwenh twernk angerr mpwareng-arengah anem. Rang tjengeng arrwekel inangkal-lkwer anem.”

Tjerrtj alker-areny petjem

³¹ John-el weth kaltj-anthek, “Tjerrtj rang alkereng petjem, rang kel tjerrtj ingkerrekeh Ngkart anetjenh. Tjerrtj renharl Altjerrel ahelheng mpwarek, rang ahelh-areny war anem. Rang mern-penhant rnwanentj-penhant thwen iterrem. Tjerrtj rang alkereng petjem ahelh-warn, rang Ngkart anem tjerrtj ingkerrekeh. ³² Tjerrtj rang alkereng petjem, rang Altjerrek kaltj. Rang tjerrtj map Altjerr-akert kaltj-anthem. Tjerrtj mapel angketj kweren itja nakek. ³³ Tjerrtj ngwenhel apek angketj kweren nakemeng, lakenh inang mernemel ilem, ‘Altjerr rang arratj anem.’ ³⁴ Tjerrtj renh Altjerrel

lanthekarl, rang tjerrtj mapéh Altjerr-henh angketj ilem, Altjerr-henh Kwerrernel renh twer-ilem. ³⁵ Angey rang kwenh Ler kwerenhek nyerrkem. Rang Ler renh ngk-erneke, tjerrtj ahel-arenyek alker-arenyek thwen Ngkart anetjek. ³⁶ Tjerrtj ngwenhel apek Ler kweren nakem, inang iteth ngampekarl anetjenh. Kenh tjerrtj ngwenhel apek Ler renh naketj-kweny itja, inang itjarl iteth ngampekarl anetjenh. Altjerrel kwenh inenh lanthetjenh rwang ngampekarl kwer-warn kwetanteh.”

4

Jesu arrweketj Samaria-arenyel-arleng angkerrek

¹⁻³ Artwang Pharisee mapel awek, tjerrtj aningkarl Jesu-warn petjek kwel, rang inenh kwatj-warn irrpel-ilemel *baptise-em-ilek*, inang kweren nakenh-nakenhemeh irrek. Jesu-el aningkarl inenh *baptise-em-ilek*, John-el rrpwetj war *baptise-em-iletjam* arrwekel. Jesu rarrp itja tjerrtj map *baptise-em-ilek*. Kwertengerl kweren mapelarlam tjerrtj inenh *baptise-em-iletjaman*. Jesu rang awek, artwang Pharisee mapel yey nhenh-akert awekarl. Lakenheng rang mer Judea-eng tjejel angkep alhep-alhetjam mer Galilee-warn, ayerrer-atheh.

⁴ Jesu rang mer Samaria-angkwerr anper alhek mer Galilee-warn. ⁵ Rang *town* nyent-angkwerr anper alhek, arreny kweren Sychar, mer Samaria-el. Mer Sychar kwereng rtwang war *farm* nyent anek. *Farm* nhenhan arrwekeleny Jacob-el ler kwerenheh Joseph-eh ngkwey anthekarl. ⁶⁻⁸ Jacob-henh kwatj angentj mer kwerel anek, rang ngkwey angernekarl-penh. Jesu kwatj angentj kwerel arrernelhetj-alhek. Rang pwarrk awelhek, mer ntwarng petjekarl-penh. Kwertengerl kweren map anper alhek *town-warn*, mern inetjeh. Kel aherrk mp-wepel, Jesu ingareny kwatj angentj kwerel antarl-irrek.

Marl Samaria-areny nyent petjek kwatj angentj kwern, kwatj inetjeh.

Jesu-emeh kwern kwatjeh nkek, “Yeng angketh-irrek, tjeng arwekel antjwetjeh anthang.”

⁹ Marl rang renh ilek, “Ntwang kwenh tjerrtj Jew, kenh yeng marl Samaria-arenyarl. Nthakenharl ntwang tjeng kwatjeh nkem? Nwern unpartek-unpart anem Judea-areny mapek, peltj-kweny!” *

¹⁰ Jesu-el renh ilek, “Ntwang itja kaltj anem, Altjerr rang ngkweng nyerrkentj mernelhetjeh ahentj-anem. Itja ntwang kaltj-kwenh tjeng. Ntwang apek tjeng kaltj anak-arleng, tjeng-atwetj kwatjeh nketjeh, thangant ngwenh kwatj iteth-henh renh anthehetjan.”

¹¹ Marlelemeh tjerneke, “Rnwang ngkwengenh itja anem, ntwang kwatj arwek-inemel antjwetjeh. Kwatj angentj nhenhan kwen anthwerr. Nthenhengam ntwang kwatj iteth renh inetjenh? ¹² Ntwang arrwekeleny angerrepat nwern-henh nheng Jacob-eh kaltj key? Jacob rang kwenh kwatj angentj nhenh nwerneh angernemel arrernerl-alhek. Ngkwey ler kwernenh map inang kwatj angentj nhenheng antjwetjart, yep-yep-arlk kwernenh mapel thwen. Nthakenharlam ntwang Jacob-eng inangkal-lkwer?”

¹³ Jesu-el renh ilek, “Tjerrtj ngwenhel apek kwatj angentj nhenh-penh antjwemeng, inang weth angketh-irretjenh. ¹⁴ Tjerrtj ngwenhel apek kwatj arrpenheng antjwemeng, tharl inenh anthetjenh, inang itja weth angketh-irretjenh. Kwatj nhak-penh inang apek antjwetjenharl, yanh kwenh kwatj rew-artehe thelehetjenh

* **4:9** Tjerrtj Judea-areny map-artehe itja anthwerr mern-arlk apek arlkwetjart, angketj apek inang itja angkerretjart tjerrtj Samaria-areny mapel-ayeng.

kwetant. Kwatj nhenh itja ywerretjenh. Tjerrtj ngwenhel apek kwatj nhenh antjwem, inang iteth ngampekarl anetjenh.”

¹⁵ Marl rang renh ilek, “Tjerrtjay, tjeng kwatj renh anthay, yeng weth angkethel irretj-kweny! Yeng itja weth kweteth nhenh-warn petjerl-anetjenheng kwatjeh.”

¹⁶ Jesu-el renh ilek, “Artwang anew ngkwengenh ngwerl-alpang. Kwer-akert tjeng-warn petj-alpang.”

¹⁷ Marl rang ilelhek, “Yengan anew-kweny anem.” Jesu-el renh ilek, “Ntwang arratj angkek. ¹⁸ Ntwang kel anew 5 arrwekel anyenekarl. Artwang alenh rang ngkwengel-ayeng lyet anem, rang meyt-meyt war ngkweng anem. Lakenh ntwang arratj kwet ilelhek, ntwang anew-kweny anemeng.”

¹⁹ Marl rang renh ilek, “Twernekay! Yeng kel kaltjemeh, ntwang Altjerr-henh angketj angenh-angenh anemeng. ²⁰ Arrwekeleny map inang Altjerreh arraw-irretjart irntang nhenhel arreny Gerizim-el kwel, Altjerr kwer amperel-ayeng arrernelhetjeh. Kenh tjerrtj Jew arrantherr ilem, mer Jerusalem-warnant kwel tjerrtj arraw-irretjeh, kwer amperel-ayeng arrernelhetjenheng. Nthenham rang Ngkart-henh irntang anganentj, nwern kwer arratj arraw-irretjeh? Irntang nhenh apek? Irntang Jerusalem apek? Nthenham arratjan?”

²¹ Jesu-el renh ilek, “Marlay, yeng away. Kelant tjerrtj itja Angeyeh arraw-irretjenh irntang nhenhelant, itja Jerusalem-el apek, amperel-ayeng arrernelhetjeh.

²² Samaria-areny arrantherr-artek Altjerr nakem, kenh arrantherr renh itja arratj alhengk-arem. Tjerrtj Jew nwern-atwetj Altjerr kwer kaltj anem, renh arratj nakem. Arrwekel-antey Altjerrel nwernehant angketj mwerr kwerenh anthek, nwern angketj renh ilerl-apedjeh ahelh ntjaperel. ²³ Lyetan Kwerrern Alngaltarel tjerrtj kwerenh

inengh kaltj-anthemel twer-ilem, inang arratj iterl-aremel Angeyan renh naketjeh. Tjerrtj lakenh-lkwereh kwenh Angeyan ahentj-anem. ²⁴ Altjerr rang Kwerrern anem. Tjerrtj nakenh-nakenh inang kwerrern inehengh Altjerr kwer anthelhetjeh, renh arratj iterl-aremel naketjeh, Kwerrern Alngaltarel inengh kaltj-anthemel twer-ilemengh wart.”

²⁵ Marl rang renh ilek, “Yeng kaltj, Messiah rang petjetjenharl, renhant nwern Christ anewem, Altjerrel nwernengh alhelekarl-penh ngkwey. Rang nwernengh angketj Altjerr-akert arratj kaltj-anthetjenh.” ²⁶ Jesu-arl kwewaleny ilelhek, “Yeng kwenh ngkweng ilelhem, yeng kwenh rang.”

Kwertengerl map petj-alpek

²⁷ Jesu rang marl kwer-warn angketjam-rlwer, kwertengerl kwerengh map mern-akert petj-alpek. Inang aretj-alpemel anwerlkek, rang marl Samaria-arenyel-ayeng angkemeng. Inang iterrek, Jesu renh pawenhetjeh, kengh inang itja renh pawenhek. Inang intert kwet arrernelhetj-alpek.

²⁸ Marl rang rnwang kwerengh imperl-alhemel town-warn urrpey alhek. Rangemeh Sychar mer-areny map iletj-alhek, ²⁹ “Aray, artwang nyent aretjeh petjewarrangaw! Rang tjeng kaltj kwel! Rang yeng ilek anew tjengengh map-akert. Artwang nhak rang apek Christ rang, Altjerrel ngkwey alhelekarl?” ³⁰ Kel tjerrtj aningk inang town-eng Jesu-warn alherrerrek.

³¹ Tjerrtj town-areny tjeysel petjetjam-rlwer, kwertengerl mapel Jesu renh ilek, “Kaltj-anthenh-anthenhay, mern arlkway!”

³² Rang inengh ilek, “Tjeng mern intem, kwer arrantherr itja kaltj.”

³³ Kwertengerl mapel inarrpemeh pawenherrerrek, “Arrpenhel key renh mern antheke, arlkwetjeh?”

³⁴ Jesu-el inenh ilek, “Angey tjengenh ahentj-anem, thang tjerrtj map anetjeng twepelh-iletjeh. Nhenh rang rrwapentj tjengenh anem. Rang wart yengenh lantheke, rrwapentj nhenh mpwaremel mangk-iletjeh. Rrwapentj nhenh kel tjeng mern-artehe anem, tjeperr.

³⁵ Thang arrantherrenh ilem angketj kwenameny-penh† Altjerr-henh *farm*-akert. Nheng arrantherr mern anngang aherneh kwernem, anngang kwer-penh merneh mangkem. Arrantherr angkem apek, ‘Mpankaw! Kel nwern 4 months-eh-atwetj karellhem, kwereng nwern mern renh ampengemeh kwetjetjenh.’ Nhenh awerrrang, tjerrtj ingkerrek mern-artehe anem Altjerr-henh *farm*-el. Altjerr-henh *farm* renh arerrerrang! Mern ingkerrek kel ampeng anem, arrantherr kel kwetjetjeh. ³⁶ Lyet tjerrtj aningkel mer apanpel mern kwetjem Altjerr-henh *farm*-el. Nhenh-atwetj inang tjerrtj inenh arraw-ilem, Altjerr kwerel-ayeng inang iteth ngampekarl anetjeh-anngernt. Altjerrel rrwapenh-apenh inenh kwartwetjeh. Lakenheng rrwapenh-apenh ngwenhel apek mern anngang inenh aherneh kwernekarl, rrwapenh-apenh arrpenh inang mern inenh kwetjetjehemeh, inang ingkerrek nyent-irremel arrken anetjenh. ³⁷ Angketj nhenh kwenh arratj anem, ‘Artwang mapel mern anngang aherneh kwernem. Artwang arrpenh mapel mern anngang kwetjem.’ ‡ ³⁸ Thang arrantherrenh Altjerr-

† 4:35 Angketj kwenarl intem, arrpenh-arrpenh anthwerr. ‡ 4:37

Keth-ilentj: Anngang *wheat* Ngkart-henh angketj-artehe anem. Lakenh artwang nyentelan angketj Ngkart-henh ilerl-apem, artwel anngang *wheat* wem-artehe. Artwang arrpenhel ingkern tjerrtj map arraw-ilerl-apem Ngkarteh, artwang rarl anngang *wheat* arraw-ilerl-apem-artehe. Lakenh artwang ratherr arrken awellhem Altjerreh.

henh *farm*-warn lanthem, mern kwetjetjeh. Arrantherr kwerel itja arrwekel rrwapek. Arrpenh map kwenh arwekel rrwapek. Arrantherremeh rrwapentj inehenh-penh mern kwetjetjehan.” Lakenh Jesu-el tjerrtj mapakert ilek iter-angkwerr mern-akert-arrpantey.

³⁹ *Town* kwerel Samaria-areny mapel marl nheng-henh angketj nakek, nheng rang ilelhekarl-penh, “Rangatwetj tjeng kaltj anem. Rang yeng anew tjengenh mapakert ilek.” Lakenheng tjerrtj Samaria-areny mapel Jesu renh nakekemeh. ⁴⁰ Kel inang Jesu-warn petjekarl-penh, inang renh ayakek, inehel-ayeng antarl-irretjeh. Jesu-an inehel-ayeng arltang atherr antarl-irrek.

⁴¹ Tjerrtj Samaria-areny mapel Jesu-henh angketj awek, inang renh kwetemeh nakek. ⁴² Inang marl renh ilek, “Nwern angketj ngkwengenh-amparr awek, nwern ngwenh kwek war nakek. Lyet nwernarrp renh angkerleh awekarl, lwerenheng nwern renh arratj-lkweremeh naketjenh. Nwern kel kaltj, tjerrtj ahelh-areny mapeh rang tjeperr anhwerr anem. Rang petjek, tjerrtj map twepelh-iletjeh ahelh apanpel.”

⁴³ Jesu rang arltang atherr-ingar tjerrtj Samaria-areny mapel-ayel anekarl-penh, rang mer Galilee-warn alpek. ⁴⁴ Jesu-el arrpenh-areng kel tjerrtj inenh ilek, “Tjerrtj mer arrpenh-areny mapelant Altjerr-henh angketj angenh-angenh nakem. Kenh mer-areny mapel renh itja kwetarl renh nakem.” ⁴⁵ Jesu rang mer Galilee-warn alpek, mer-areny mapel renh arnekarner kwer kangkek. Inang arrwekel-antey Jerusalem-warn alhek, irlpangkentj tjenkerr nheng arlkwetjeh-anngernt. Irlpangkentj arreny kwerenh Anper Alhekarl anak. Kwerel-antem inang Jesu renh alhengk-arek, rang twer angerr rrwapekarl. Lakenh inang kwer kangkek.

Jesu-el artwang twernk nyent-henh ler mwerr-ilek

⁴⁶ Jesu rang weth town Cana-warn alpek, town nhenhel rang nheng kwatj angart-wekarl *wine-warn*. Twernk nyent Capernaum town-el anek, ler kwerenh irlkert-akert. Artwang rang anek rrwapenh-apenh King Herod-ek. ⁴⁷ Artwang nhenh rang awek, Jesu rang mer Judea-eng petjekarl. Rang kwer-warn alhemel nkek, “Tjengel-ayeng petjang, ler tjengenh mwerr-iletjeh! Rang ilwetjeh-irrem!”

⁴⁸ Jesu-el renh ilek, “Arrantherr kwenh yengenh nakem, arrantherr twer tjengenh aremelant war!”

⁴⁹ Rang renh ilek, “Ngkartay! Kel petjang! Ler tjengenh ilwehetjeng!”

⁵⁰ Jesu-el renh ilek, “Kel alpay! Ler ngkwengenh kel mwerr-irrek.” Artwang rang Jesu-henh angketj nakek, mer kwerenh-warn rang alpek. ⁵¹ Rang tjeyel alhep-alhetjamarl, artwang rrwapenh-apenh rrpwetj kwer-warn arnekarner petjek. Inang renh ilek, ler kwerenh mwerr-irrekarl. ⁵² Rang inenh pawenhek, “Ilwengar anthwerram rang mwerr-irrek?” Inang renh ilek, angwerreh angwerrel rang mwerr-irrek.

⁵³ Artwang rang irlpangkemel ilelhek, “Ay! Arltang kwerel rang yeng ilekarl, ‘Ler ngkwengenh kel mwerr-irrekaw!’” Artwang rangemeh peltj kwerenh map-arlk rrwapenh-apenh kwerenh map-arlk inang kel nakenh-nakenhemeh irrek Jesu-kenhan.

⁵⁴ Nwern angkep-atheh arem. Arrwekel Jesu rang mer Judea-eng Galilee-warn alpek. Twer anthwerr kwerenh rang mer Galilee-el-amparr mernek, nheng kwatj-penh *wine-warnemeh* angart-wek mer Cana-el. Kwer-penh rang kwer nyentemeh mwerr-ilek, mer nyent kwerelan. Lakenh rang kwewaleny mernelhek, nthakenh rang twer angerr kwerenh-akertel mpwarek.

5

*Jesu-el artwang irlkert nyent mwerr-ilek,
mer Bethesda-el*

¹ Kel arltang arrpenhelant Jesu rang Jerusalem-warn alhek, tjenkerr arlkwetjeh. Aretharr-rlwer tjerrtj Jew mapel tjenkerr nhenh arlkwetjart. ² Jerusalem-el arrew arrpenh anak, kwerengarl inang yep-yep map town-warn irrpelhelletjart. Arrew nhenhel kwereng kwet kwatj anak, tjerrtjel mpwarekarl. *Hebrew*-henh angketjel inang kwatj renh arreny Bethesda iletjart. Kwatj kwereng kernel lywang angerretj 5 artelhek. ³⁻⁴ Lywang 5 nhenhel tjerrtj irlkert map anhwerr intetjart, pweng map-arlk rnwerr map-arlk inang intetjart. * ⁵ Artwang nyent ahemp 38 years-ek-atwetj irlkert kwet anetjart. ⁶ Jesu-el renh intemeng arek. Rang alhengk-arek, artwang rang kwet anhwerr irlkert intekarl. Jesu-el renh pawenhek, “Ntwang apek mwerr-irretjeh ahentj-irrem?”

⁷ Artwang irlkert rang renh ilek, “Twernekay! Kwatj rang angelhem-arteh, tjeng itja peltj anem, yengenh kwatjeh kwernetjeh. Yeng-amparr kwatjeh irrpeljeh, tjerrtj arrpenh kweteth tjengeng arrwekel irrpem. Yeng ahentj, yeng-amparr irrpeljeh. Kenh tjerrtj arrpenh ramparr irrpem. Nthakenham yeng mwerr-irretjenh?”

⁸ Jesu-el renh twernek, “Kemerrang! Antjam ngkwengenh inemel kel kemerremel alhang!” ⁹ Jesu rang angketjamarleng-antey, artwang kel mwerr-irrek. Rang kel antjam kwerenh inemel nthwerl-apatjam.

Arltang kwerel-ayel Jesu-el artwang renh mwerr-ilekarl, rartek Saturday arltang angerr anak. ¹⁰ Tjerrtj

* **5:3-4 Keth-ilentj:** Inang iterrek, alker-areny angelel kwel kwatj renh angelh-ilem. Kwatj angelh-ilekarl-penh, inang arrkernelhem, kwatj-warn anarnpetjek. Arrwekel rek-amparr anarnpem kwatj-warn, rant kwel mwerr-irremarl.

Jew twernk mapel artwang mwerr-irrekarl renh arek. Lakenheng inang renh ilek, “Lyet kwenh Saturday arltang angerr anem! Nhenh kwenh itja arratj anem, ntwang antjam angerl-apatjeh! Mpwareng-areng nwern-henh intem, ‘Arrantherr itja arltang angerr Saturday-el rrkwapetjeh.’”

¹¹ Artwang rang inenh ilek, “Artwang rarl yeng mwerr-ilekarl, rartek lakenh yengenh twernek, ‘Antjam ngkwen-genh inemel, kemerremel alhang!’”

¹² Inang renh pawenhek, “Artwang ngwenham rang? Nthenh-areny rang, rarl ngwenh twernekarl, antjam ngkwen-genh inemel alhang?”

¹³ Artwang mwerr-irrekarl rang itja kaltj anek Jesu-eh. Jesu rartek ywerrerrl-alhek tjerrtj aningk map-angkwerr.

¹⁴ Kelant Jesu-el artwang mwerr-irrekarl renh *church* angerretjeharl aretj-alhek. Rang renh ilek, “Ntwang kel mwerram anem. Lyeteng ntwang itja weth anetj mernelhang! Irlkert angerr anthwerrel ngwenh atwehetjeng!”

¹⁵ Artwang rang tjerrtj Jew twernk map-warn iletj-alhek, “Jesu-el kwenh yeng mwerr-ilek!” ¹⁶ Jesu artwang arltang angerr Saturday-el mwerr-ilemeng, lakenheng tjerrtj Jew twernk map Jesu-eh rrwernek, inang Jesu renh irrernng atwetjeh ahentj-anek. ¹⁷ Jesu-el inenh ilek, “Angey tjen-genh kweteth rrkwapem, rang lyet rrkwapem. Lakenheng yeng rrkwapem angey tjengenh-arteh.” ¹⁸ Tjerrtj Jew twernk map inangemeh ahentj anthwerr anek, Jesu renh irrernng atwetjeh. Wenheng? Rang Saturday arltel rrkwapekarl, mpwareng-areng inehenheh rang itja kangkwerrrek. Rang angkek-arleng, Altjerr angey kwerenh anemeng, rang Altjerrel-ayel nyent kwet anemeng.

Ler rang Angey-arteh rrkwapem

¹⁹ Jesu-el inenh ilek, “Mantjel awerrerrang. Ler rang itja nyent rrwapem. Ler rang angey kwerenh rrwapemeng arem, kwereng rang lakenharlam rrwapem. Nheng Angey rang rrwapem-arteh, lakenh Ler rang rrwapem. ²⁰ Angey rang kwenh Ler kwerenheh nyerrkem. Lakenheng rang Ler kwerenheh rrwapentj kwerenh ingkerrek mernem. Angey rang Ler kwerenheh rrwapentj angerr anthwerr mernetjenh, arrantherr anwerlketjenh. ²¹ Angeyel tjerrtj irrernng map kemelh-ilemel iteth-ilem. Lakenh-arteh Ler rang tjerrtj inenh iteth-ilem, rang ahentj-anemeng wart. ²²⁻²³ Angey rang ahentj-anem, tjerrtj ingkerrekel Ler kwerenh naketjeh kwel, inang Angey renh nakemarl-arteh. Lakenhan rang Ler kwerenheh impek, tjerrtj inenh *judge*-em-iletjeh. Angey rang tjerrtj inenh itja weth *judge*-em-ilem. Angey rang kwenh Ler renh ahelh-warn lanthek. Lakenheng tjerrtj inang Ler renh naketjeh. Itjengan, renh naketj-kwenh lakenhan inang Angey renh naketj-kwenyarlam.

²⁴ “Arratj anthwerr, tjerrtj ngwenhel apek angketj tjengenh awem, inang apek Angey nakem, rang yeng lanthekarl, Angey tjengenhel inenh itja atwetjenh. Tjerrtj inang kwetant iteth anetjenh. ²⁵ Arratj anthwerr, ngwenth-lkwer tjerrtj irrernng mapel Altjerr-henh Ler-henh angketj awetjenh. Tjerrtj ngwenhel apek angketj nhenheh kangkwerrem, inang kel kemerremel kwetant iteth anetjenh. ²⁶ Angey ilernakehan anganentj anem. Angey rang tjerrtj inenh Iteth-ilenh-ilenh. Angey rang Ler kwerenh twer-ilek, Ler rang tjerrtj inenh Iteth-ilenh-ilenharlam kwet. ²⁷ Rang Tjerrtj-henh Ler anemarleng, lakenheng Angey rang Ler kwerenh ngkerne, tjerrtj ingkerrek ahelh apanpel *judge*-em-ilemel pawenhetjenh.

²⁸ “Arrantherr itja anwerlketjeh. Kelant tjerrtj irrernng intemarl mapel Ler renh awetjenh, rang inenh ngwe-

marleng. ²⁹ Inang awenng inehenheng twep-welhetjenh. Tjerrtj ngwenhel apek arratj mernelhekarl ahelh nhenhel inang iteth-amparr anekarl, inang kwetant iteth anetjenh. Kenh tjerrtj arrpenh inang ahelh nhenhel iteth-amparr anekarl inang anetj mernelhekarl, inenh Jesu-el alharlkwetjenh kwetant mer kwerenheng. ³⁰ Yeng itja nyent rrwapem. Angey tjengenhel yengenh ahelhwarn lanthek, rang tjengel-ayel rrwapem. Ilernak pwert rrwapem. Lakenheng thang tjerrtj map arratj *judge*-emiletjenh, rang yeng twernem. Yeng itja iterrentj tjengenhakert rrwapem, yeng Angey tjengenhahant war kangkwerrem.”

Angketj atherr Jesu-akert

³¹ “Thant apek arrantherrenh ilemeng, yeng Altjerrhenh Ler anem wart, arrantherr itja yengenh naketjeh. ³² Angey tjengenhel arrantherrenh ilemeng, yeng Jesu Ler kwerenh anem wart, arrantherr angketj kwerenh naketjeharlam. Yeng kaltj, angketj kwerenh arratj wart. ³³ Arrantherr nheng John-warn urrpey rrpwetj lanthek. John rang urrpey inenh angketj arratj ilek tjeng-akert. ³⁴ Yeng itja arnaratj John-henh angketjeh, rang tjerrtj war anem wart. Thang arrantherrenh John-henh angketj-akert war irlpangkelh-ilem, arrantherr yengenh naketjenheng, Altjerrel arrantherrenh twepelh-iletjenheng. ³⁵ Altjerrel nheng John ngkernek, rwang alngenth-arteh amperl-anetjeh, tjerrtj map parrtjelh-iletjeh. Arrantherr kangkek, angketj kwerenh awerl-anetjeh.

³⁶ “John rang arratj angkek tjeng-akert. Rang tjerrtj war. Angeyel yengenh lanthek, twer angerretjel rrwapemel mpwaretjeh. Lakenh thang mpwarerleh, arrantherr iterl-aretjeh, Angeyel yengenh lanthekarl. ³⁷ Angey rang yengenh lanthek, rang angketj tjeng-akert

ilekarl. Arrantherr Angey itja awek. Arrantherr renh itja arek. ³⁸ Rang yengenh arrehantherr-warn lanthek, arrantherr kenh yengenh itjarl nakek. Lakenheng angketj kwerenh itja arrehantherrel-ayeng antarl-irrem. Arrantherr angketj kwerenh itja nakek. ³⁹ Arrantherr Altjerr-henh angketj pipel-ayeng irlpareth kaltj-irrem. Arrantherr iterrem, angketj inang arrantherrenh kwel kwetant iteth-iletjenh. Angketj nhenhel-ayeng arrantherr tjeng-akert *read*-irrem. ⁴⁰ Arrantherr itja ahentj-anem, tjeng-warn petjetjeh. Arrantherr itja ahentj-anem, thang arrantherrenh kwetant iteth-iletjeh.

⁴¹ “Yeng itja ahentj-anem, tjerrtjel yengenh lakenh nakemel iletjeh, ‘Tjerrtj mwerram ntwang!’ Nhenh tjerrtj-henh-angkwerr. ⁴² Yeng arrehantherr kaltj, arrantherr itjam Altjerreh nyerrkem. ⁴³ Yeng arrehantherr-warn petjek, Angey rarrp yengenh lanthekarl. Arrantherr yengenh itja peltj-ilek. Kenh tjerrtj arrpenh petjemel ilelhemeng, rang tjerrtj angerr anemeng kwel, arrantherr renh kel peltj-ilemantarl. ⁴⁴ Arrantherr Altjerr renh itja nakem. Arrantherr kwet ahentj-anemeng, tjerrtjel arrantherrenh naketjeh. Arrantherr itja Altjerreh kweteth iterrerl-anem, nthakenh rang iterrem arrehantherr.

⁴⁵ “Arrantherr itja iterl-aretjeh, thang arrantherrenh Angeyeng ularr iltetjenh. Arrantherr kwenh Moses-henh mpwareng-areng-akert nakelhem. Mpwareng-areng nhenhel-ayeng Moses-el arrantherrenh Angeyeng ularr iltetjenh. ⁴⁶ Moses rang angketj tjeng-akert pip-warn arrernekarl. Arrantherr apek renh nakek-arleng, arrantherr yengenh nakemer. ⁴⁷ Arrantherr Moses-henh angketj itja nakek. Nthakenham arrantherr angketj tjen-genh naketjenh?”

6

Jesu-el artwang 5,000 wantek

(Matthew 14.13-21; Mark 6.30-44; Luke 9.10-17)

¹ Kelant arltang arrpenh-ingar Jesu kwatj alayel boat-el arrwengak alhek, kwertengerl kwerenh map-akert. Kwatj alay arreny kwerenh Galilee anak. Kwatj alay nhenh renh inang arreny arrpenh Tiberias iletjart. ²Tjerrtj map inang twer angerr kwerenh arek-arleng, rang tjerrtj irlkert map mwerr-ilemeng, inang kwereng ingkern-angkwerr alhek. ³⁻⁴ Tjerrtj Jew mapel irlpangketj anyenetjart, arreny kwerenh Anper Alhekarl. Inang tjenkerr arlk-wetjart. Inang irlpangketjart, Altjerrel arrwekeleny map angek mer Egypt-eng. Irlpangketjeh arltang angerr rang mpank-amparr anetjenh-anngernt. Jesu-emeh irrtanggeh antjek kwertengerl kwerenh map-akert. Inang arrernelhek.

⁵ Jesu-el arnarek, tjerrtj map aningk ularr petjerleh. Rang Philip renh pawenhek, "Nthenhengam nwern mern inemer, tjerrtj aningk lakenh wantetjeh?" ⁶ Jesu-el-artek Philip renh arrkernemel war pawenhek, nthakenh rang angketjenh. Jesu rang kel kaltj anak, rang tjerrtj map wantetjenharl.

⁷ Philip-el renh ilek, "Nwerneh maney kwek anthwerr! Nthakenham nwern tjerrtj aningk lakenheh mern payem-iletjenh?"

⁸ Andrew, Simon Peter-henh tjei kwertengerl nyent anak. Rang angkek, ⁹ "Kwer rrwey nyent nhenhel anem. Rang mern 5 kwek anyenem, ker irrpennng atherr. Mern kwek lakenhel tjerrtj arwenth ywarn wantemel anhwerlk-ilem!"

¹⁰ Arnam atherrk angerr anak mer kwerel. Jesu-el kwertengerl kwerenh map ilek, "Tjerrtj map arrernelhetjeh twernang." Kel artwang 5,000-arteh aningk kwerel

anek. ¹¹ Jesu-el mern inenh inek, Altjerr renh merneh pawenhek. Kwereng rang mern inenh kwertengerl mapeh antheke, irrarnpelh-iletjeh tjerrtj mapeh. Kwereng rang lakenh-artehe irrpenng renh-atherrenh inemel, Altjerr pawenhek. Kwereng rang ker irrpenng inenh kwertengerl mapeh antheke, irrarnpelh-iletjeh tjerrtj mapeh.

¹² Tjerrtj aningkel kel arlkwemel anhwelk-irrekemeh. Jesu-el kwertengerl kwerenh mapemeh twernek, mern ngkweltj ingkerrek kwetjetjeh. ¹³ Mern 5 ineheng kwertengerl inang panth 12-warn mern ngkweltj arlwelek.

¹⁴ Lakenh Jesu-el twer angerr-akertel rrwapek. Tjerrtj inang nhenh aremel, inang lakenh anwerlkemel angkek, “Nhenheh-apel Altjerr-henh angketj angenh-angenh tjeperr rang, renh Altjerrel ngkwey nwerneh alhelekarl, ahelh nhenh-warn lanthetjeh anekar!” ¹⁵ Jesu rang kaltj anak, inang iterremeng. Inang lakenh iterrek, “Nwern renh rrwetjeh, renh ngkernetjeh, *king* nwerneh anetjeh!” Jesu rang ahentj-kweny-irrek, twernk angerr ineh anetjeh. Lakenheng rang irntang-warn anam-irrek, nyent-areny anetjeh.

*Jesu rang kwatj alay kern-angkwerr ingkang alhek
(Matthew 14.22-27; Mark 6.45-52)*

¹⁶ Kel angwerr-angwerremeh irrek, Jesu-henh kwertengerl map kwatj alay iter-warn alhek. ¹⁷ Jesu itja ineh-warn petjekarl. Inang boat-el antjemel, kwatj alayel arrwengak ntwarl-kwer kwet kel alhetjam, Capernaum town-warn. ¹⁸ Kweny mpwepel irkang twerelemeh kwatj angelh-iletjeh mpwarek. Kwatj rang angerr-irrek. ¹⁹ Kwertengerl inang kwatj mpwep-warn boat-el anenhetjam, kel 5 *kilometres*-artek alhetjam, arnangel *push*-emilerl-apetjam. Kel inang Jesu renh arek, kwatj kernel ingkang ineh-warn ularr petjerleh. Rang ineh-warn itwek-

irremarleng, inang kwerrern-kweny-irrek ater-irremel.
²⁰ Jesu rang ineh arlkemel ilelhek, “Yengeyay! Ater-irretjal anerrerrang!” ²¹ Inang ahentj-anek, renh boat-eh antjelh-iletjeh. Boat rang parrp anhwerr kwatj iter itwek-irretj-alhek.

²² Arltang arrpenhel tjerrtj inang kwatj alayeng nt-warr antarl-irrekarl, inang irlpangkek, boat nyent war arrwekel anekarl. Inang irlpangkek, Jesu rang itja kwertengerl kwerenh mapel-ayeng boat-eh antjekarl, kwatj alayeng boat-el alhetjeh. ²³ Tjerrtj map boat rrpwet-jeng Tiberias town-eng petjek, keth nheng Jesu-el Altjerr merneh pawenhekarl-penh-warn, Jesu-el tjerrtj map 5,000 wantekarl-warn. ²⁴ Tjerrtj arwenth inang ywarek, Jesu ywerremel alhekarl, kwertengerl kwerenh map-arlk. Inang boat inehenh-warn antjemel, kwatj alayel alhek Capernaum town-warn. Inang ahentj-anek, Jesu-eh palenthwetjeh.

Jesu ilelhek, “Yeng mern iteth-ilenh rang anem.”

²⁵ Inang boat-eng anarnpek, kwer palenthwek. Inang Jesu renh aremel pawenhek, “Kaltj-anthenh-anthenhay! Nthakenham ntwang nhenh-warn petjek?”

²⁶ Jesu-el inenh ilek, “Wenham arrantherr tjeng palenthwem? Arrantherr-artek yengenh naketj-kwenh, itja kwenh! Arratj anhwerr, arrantherr-arteh tjeng palenthwek, arrantherr mern arwenth arlkwek-arleng war anhwerrlk-irrek-arleng wart. ²⁷ Arrantherr arltang arrpanenhel merneh palenthwem, angayelel. Arrantherr itja mern ahelh-arenyeh athek-irretjeh. Arrantherr kwenh mern kwer palenthwetjeh, nheng rang tjerrtj inenh kwe-tant iteth anyenem. Altjerr Angeyel Tjerrtj-henh Ler renh arrernek, rang arrantherrenh mern renh anthetjeh.”

²⁸ Inang renh pawenhek, “Nthakenham Altjerrel nwer-nenh twernem, nwarn mernelhetjeh?”

²⁹ Jesu-el inenh ilek, “Altjerrel arrantherrenh twernem, arrantherrenh yengenh naketjeh, urrpey renh rang lanthekarl.”

³⁰ Inang pwer anemel renh pawenhek, “Wenham ntwang twer angerrel mpwaretjenh, nwarn kaltj anetjeheng, ntwang arratj angkemeng? Nwarnemeh ngwenh naketjeheng? ³¹ Angerreat nwarn-henh mapel rrwalel alhemeng, inang mern alkereng anyekarl arlkwetjart. Angketj lakenh Altjerr-henh pipel-ayeng intem, ‘Rang inenh mern alkereng antheke arlkwetjeh.’”

³² Jesu-el inenh ilek, “Arratj anhwerr, Moses-el itjam arrantherrenh mern alker-areny renh anhwerr antheke. Angey alker-areny tjenghelant arrantherrenh mern alker-areny renh kwet anthem. ³³ Mern Altjerrelarl tjerrtj anthem, inenh iteth anyenetjenh. Mern nhenh rartek tjerrtj rang anem, nheng rang alkereng petjekarl.”

³⁴ Tjerrtj inang Jesu-ek nkek, “Mern nhenh renh nwerneh kweteth antherl-anay.”

³⁵ Jesu rang ilelhek, “Yeng kwenh mern rang anem, rang tjerrtj inenh kwetant iteth-ilem. Tjerrtj ngwenhel apek yeng merneh ankey nkemeng, inang itja wetham angayel irretjenh. Tjerrtj ngwenhel apek yengenh nake-meng, inang itja weth angkethel irretjenh. ³⁶ Thang arrantherrenh kel ilekarl, ‘Arrantherrenh yengenh kel arek, arrantherrenh yengenh itja kwet nakem.’ ³⁷ Tjerrtj inenharl Angey tjeyenhel anthem, inang tjeng-warn petjetjenh, tjerrtj inenh map thang itja alharlkwetjenh. ³⁸ Yeng itja petjek iterrentj tjengenh-akert. Yeng petjek iterrentj Altjerr-kenh-akert. Rang yengenh lanthekarl. Yeng ahentj-anem kwerant kangkwerretjeh. ³⁹ Nthakenham yeng kwer kangkwerrem? Thang tjerrtj nheng inenh rang

anthe Karl ingkerrek arratj arntarnt-arem. Itja nyent apek parlp-iletjeh. Thang inenh arltang ingkernel kemelh-iletjenh. ⁴⁰ Angey tjengenh ahentj-anem, tjerrtj ingkerrek Ler kwerenh-warn petjetjeh, renh naketjeh. Tjerrtj ngwenhel apek Ler kwerenh nakemeng, inenh Angey tjengenhel ilem, inang iteth ngampekarl anetjenh. Thang inenh arltang ingkernel kemelh-iletjenh.” Jesu lakenh ilelhek ineh-warn.

⁴¹ Rang ilelhek-arleng, “Yeng anem mern rang, nheng alkereng petjekarl”, lakenheng tjerrtj Jew mapemeh kwer mwekenh-irremel tjel-angkerrek, ⁴² “Nwern itja renh nakem! Nhenh kwenh Jesu, Joseph-kenh ler! Nwern angey matj kwerenheh kaltj anem. Nthakenham rang ilelhem, rang alkereng petjekarl kwel?”

⁴³ Jesu-el inenh ilek, “Tjel-angkerretjal anerrerrang!
⁴⁴ Angey rang yengenh lanthe Karl rant kwenh tjerrtj tjeng-warn anetjem. Tjerrtj inarrp ywarn tjeng-warn petjem. Tjerrtj inang tjeng-warn petjem, thang inenh arltang ingkernel kemelh-iletjenh. ⁴⁵ Altjerr-henh angketj angenh-angenh arrpenhel ngkwey ilek, ‘Altjerrel tjerrtj ingkerrek kaltj-anthetjenh.’ Lakenheng tjerrtj ngwenhel apek Angey tjengenh awemeng, kwer kangkwerremeng, inang kel tjeng-warn petjem. ⁴⁶ Tjerrtj nyentel Angey tjengenh itja arek apek. Artwang nheng rang Angeyeng petjekarl, rant Angey renh arek. ⁴⁷ Mantjel awerrerrang; tjerrtj ngwenhel apek yengenh nakemeng, inang iteth kwetant anetjenh. ⁴⁸ Yeng anem mern rang, nheng rang tjerrtj inenh kwetant iteth anyenem. ⁴⁹ Ngkwey angerrepat arrehantherr-henhel mern inang alkereng anyekarl arlkwetjart, inang rrwalel anekarl-rlwer. Inang ingkerrekarl ilwek. ⁵⁰ Mern arrpenh nhenh rang alkereng petjekarl, tjerrtjel renh arlkwemeng, inang itjarl ilwetjenh. ⁵¹ Yeng anem mern rang, nheng rang tjerrtj

inenh kwetant iteth anyenem. Yeng alkereng petjekarl. Tjerrtj ngwenhel apek mern nhenh arlkwemeng, inang iteth kwetant anetjenh. Mern nhenh tjelk tjengenh anem. Thang tjelk tjengenh tjenkerr-arteh anthem tjerrtj ahelhareny ingkerrekeh.” Lakenh Jesu ilelhek ineh-warn.

⁵² Tjerrtj Jew mapel angketj nhenh awemel, inang angkerrek, “Nthakenh artwang nhenhel tjelk kwerenh nwerneh arlkwetjeh anthetjenh?”

⁵³ Jesu-el inenh ilek, “Nhenh mwantj awerrerrang; arrantherr Tjerrtj-henh Ler-henh tjelk renh itja arlkwemeng, alhwang kwerenh itja antjwemeng, arrantherr itja kwetant iteth anetjenh. ⁵⁴ Tjerrtj ngwenhel apek tjelk tjengenh arlkwemeng, alhwang tjengenh antjwemeng, inang iteth ngampekarl anetjenh. Thang inenh arltang ingkernel kemelh-iletjenh. ⁵⁵ Tjelk tjengenh kwenh mern rang anem, alhwang tjengenh antjwentj rang anem. ⁵⁶ Tjerrtj ngwenhel apek tjelk tjengenh arlkwemeng, alhwang tjengenh antjwemeng, inang tjengel-ayel nyentirrekarl anetjenh. Yeng inehel-ayel nyentirrekarl anetjenh. ⁵⁷ Angey rang yengenh lanthekarl, rang arratj iteth anem. Thang iteth tjejenh inem kwer-angkwerr. Lakenh-arteh tjerrtj ngwenhel apek tjelk tjengenh arlkwemeng, thang inenh iteth kwetant anthetjenh. ⁵⁸ Nhenh kwenh mern rang anem, nheng rang alkereng petjekarl. Rang itja anem mern nheng-arteh angerrepat arrehantherrhenhel mer rrkwalel arlkwekarl. Inang mern renh arlkwemel kwenh ilwek. Tjerrtj ngwenhel apek mern nhenh arlkwemeng nhenh-atwetj tjelk tjengenh, inang kwetant iteth anetjenh.”

⁵⁹ Jesu-el tjerrtj map lakenh kaltj-anthek *church* kwenel mer Capernaum-el.

Angketj iteth ngampekarl-akert

⁶⁰ Kenh nakenh-nakenh arrpenh mapel angketj nhenh awemel palekalek-irrek, itja kangkwerrek. Inarrp angkerrek, “Angketj nhenh arrpenh anthwerr! Itja nwern kangkwerrem!”

⁶¹ Jesu kaltj anek, inang kwer tjel-angkemeng. Rang inenh pawenhek, “Thang arrantherrenh perrpert-ilek apek? ⁶² Kelant arrantherr aretjenh Tjerrtj-henh Ler, rang alker-warn alpemeng. Arrantherr yengenh naketjenh apek, itja apek? ⁶³ Altjerr-henh Kwerrernel kwenh tjerrtj inenh iteth-ilem. Itja tjerrtj-henh kwerrernel iteth-ilem. Angketj tjengenh Kwerrern anem. Lakenh-arteh angketj tjengenhel tjerrtj inenh iteth-ilem. ⁶⁴ Arrehantherreng arrpenh mapel inang yengenh itja nakem.” Lakenh Jesu-el inenh kaltj-anthek. Jesu arrwekel kwet kaltj anek tjerrtj ineh, nheng inang renh itja naketjenharleh. Rang artwang nyent kwer kaltj anek, nheng rang renh atwenh-atwenh mapeh anthetjenharl. ⁶⁵ Jesu rang weth angkek, “Angey tjengenhelant tjerrtj inenh tjeng-warn angetjem. Tjerrtj inarrp ywarn tjeng-warn petjem. Lakenh thang nheng arrantherrenh arrwekel ilekarl.”

⁶⁶ Kwereng nakenh-nakenh arrpenh map inang Jesu-eng ampakelhek. Inang itja weth kwerel-ayeng anharrel alhek. Inang itja ahentj-anek, nakenh-nakenh kwerenh weth anetjeh.

⁶⁷ Lakenheng Jesu-el kwertengerl 12 arlaltj kwerenh map pawenhek, “Arrantherr-arteh? Arrantherr tjengeng ampakelhetjeh?”

⁶⁸ Simon Peter-el renh ilek, “Ngkartay! Tjerrtj ngwenh-warnemeh nwern alhetjenhan? Angketj ngkwengenhelant kwenh tjerrtj inenh iteth ngampekarl anyenem! ⁶⁹ Nwern kwenh kaltj, nwern ngwenh nakem, ntwang Altjerr-henh artwang arratj anthwerr anemeng wart.”

⁷⁰ Jesu-el inenh ilek, “Thang kwenh artwang 12 arrantherrenh ngwek, kwertengerl tjengenh anetjeh. Kenh arrehantherreng artwang nyent arrentj anem.” ⁷¹ Jesu rartek Judas-penh angkek, Simon Iscariot-henh ler-penh. Judas rartek Jesu-kenh kwertengerl anekarl. Rang Jesu renh kelant artwang atwenh-atwenh mapeh anthetjenharl.

7

Jesu-henh tjey mapel renh itja nakek

¹ Tjerrtj Jew twernk map ahentj-anekarl, Jesu renh irrernng atwetjeh. Lakenheng Jesu rang itja ahentj-anek, mer Judea-warn alhetjeh. Rang mer Galilee-angkwerr alherl-apek. ² Lyet-atheh lhwerrp-irrentj irlpangkentjeh arltang rang anak, arreny “Tak artetjeh” Inang lhwerrp-henh tak artetjart. ³ Jesu-henh tjey mapel renh ilek, “Ntwarteh arrwekel mer Judea-warn alhemer! Nakenh-nakenh ngkwengenh mapel ngwenh keth aretjehheng, ntwang twer anthwerrel mpwaremarleng. ⁴ Tjerrtj ngwenh apek rang ahentj-anemeng, tjerrtj arrpenh mapel renh alhengk-aretjehheng, rang alengk-welhetj-kweny alhetjeh. Kel tjerrtj mapeng angetherr twer renh mer-nelhang!” ⁵ Lakenh inang palekalek war angkek. *

⁶⁻⁸ Jesu-el inenh ilek, “Mpank-amparr. Tjerrtj ahelhareny map itja arrehantherr arnkely-irrem. Tjeng inang arnkely-irrem, thang inenh ilemeng, inang anetj kwet mernelhemeng. Kel arrantherr irlpangkentjeh tjenkerr-warn alherrerrang. Yeng itja lyet irlpangkentjeh tjenkerr-warn alhem, mpank.” Lakenh rang tjey kwerenh map ilek. ⁹ Mpank-amparr Jesu mer Galilee-el kwet antarl-irrek.

* **7:5 Keth-ilentj:** Inang alhengk-aretj-kweny anak, Altjerrel kwenh arrwekel-antey renh urrarekarleh.

*Jesu rang lhwerrpeh irlpangkentjeh
Jerusalem-warn alhek*

¹⁰ Jesu-henh tjey map lhwerrpeh irlpangkentjeh alhekemeh Jerusalem-warn, tjenkerr arlkwetjeh. Kwereng Jesu ingkern-angkwerr alhek, anyenng-anyenng. ¹¹ Tjerrtj map lhwerrpeh irlpangkentj arltang arrwekel kwerel Jerusalem-el arraw-irrek. Tjerrtj Jew twernk mapel Jesu-eh palenthwek. Tjerrtj map inang pawenherlapetjam, “Nthenham artwang nhengan?”

¹²⁻¹³ Tjerrtj inang twernk map ineheng ater-irrek-arleng wart, inang itja Jesu kwer-penh angetherr angkerrek. Arrpenh map arretjemel war kwer-penh angketjam, “Rang artwang mwerram anem!” Kenh arrpenh map arretjemel war angketjam, “Rang tjerrtj mapeh rrtjwerremel ilelhem.” ¹⁴ Arltang irlpangkentjek arrpenhel, Jesu church angerr-warn alhek, rang tjerrtj map kaltj-anthek. ¹⁵ Tjerrtj Jew twernk mapel renh awek-arleng, inang anwerlkek. Inang lakenh patemel pawenherrek, “Nthakenharl artwang nhenh kaltj anthwerr anem? Ngwenhelam renh kaltj-anthek? Nwern itjam renh kaltj-anthek!”

¹⁶ Jesu-el inenh ilek, “Thang arrantherrenh itja angketj tjengenh ilem. Altjerrel-artek yengenh lanthek, thang arrantherrenh angketj kwerenh ilem. ¹⁷ Tjerrtj ngwenh apek Altjerr-henh angketjeh kangkwerrem, rang kel kaltj anetjenh, thang arrantherrenh arratj ilem, thang Altjerr-henh angketj kaltj-anthemeng, itja angketj tjengenh. ¹⁸ Tjerrtj ngwenh apek rang ahentj-irrem, tjerrtj mapel renh naketjeh, rang angketj kwerenh ilem, itja arrpenh-henh angketj. Rang rrtjwerremel war angkem. Kenh tjerrtj ngwenh apek ahentj-irrem, tjerrtj mapel arrpenh naketjeh, rang urrpeyel-arteh iletjeh arrpenh-henh angketj. Rang itjarl rrtjwerrem. Lakenh thang

arratj arrantherrenh ilem, itja rrtjwerremel. ¹⁹ Moses-el arrantherrenh Altjerr-henh mpwareng-areng renh ilek, arrantherrenh kenh mpwareng-areng kwer itja kangkwerrem. Arrehantherrenh rrpwetj ahentj-anem, yengenh irrernng atwetjenh. Lakenh arrantherrenh Altjerr-henh mpwareng-areng itja kangkwerrem. Wenhengam arrantherrenh ahentj-anem, yengenh irrernng atwetjeh?”

²⁰ Tjerrtj inang renh ilek, “Wenhengam ntwang lakenh angkem? Ntwang arert-arert war angkem! Ngwenhelam ngwenh irrernng atwetjeh? Ntwartek arrentj-akert!”

²¹ Jesu-el inenh ilek, “Thang arltang angerr Saturday-el twer anthwerrel nyent-ingar mpwarek, arrantherrenh ingkerrek tjeng anwerlkek. ²² Moses-el nheng arrantherrenh twernek, kwer rrwey map arrantherrenh artwang-iletjeh, inang arltang 8 anemarleng. Itja Moses anthwerrel arrantherrenh twernekarl, angerrepat arrehantherrenh-henhel-atwetj. Arltang angerr Saturday-el arrantherrenh kwenpel artwang-ilem, mpwareng-arengel wart. ²³ Arrantherrenh inenh artwang-ilem, Moses-el arrantherrenh twernek-arleng, arltang angerr Saturday-el apek artwang-iletjeh. Thang artwang nyent Saturday arltel mwerr-ilek. Wenhengam arrantherrenh yeng ilem, ‘Nhenh itja arratj anem?’ ²⁴ Arrantherrenh itja tjerrtj arrpenh pelkel ahang-irremel pawenhetjeh! Kel tjerrtj-penh arratjant angkay!”

*Tjerrtj pawenherrek,
“Artwang nhenh apek Christ anemam?”*

²⁵ Tjerrtj Jerusalem-areny rrpwetj arrpenh mapelemeh anwerlkemel pawenherrek, “Artwang nhenham inang irrernng atwetjeh ahentj-anem? ²⁶ Kel rang tjerrtj map angetherr kaltj-anthem. Inang renh itja arnpakem. Twernk nwern-henh map inang kaltj apek, nhenh rang Christ anemeng, Altjerrel ngkwey alhelekarl? ²⁷ Nwern

kaltj, rang mer Nazareth-areny anemeng. Christ-henh merek kwenh tjerrtj itja kaltj anem. Nthakenharl rang Christ anem?”

²⁸⁻²⁹ Jesu-el inenh awek, lakenh angkemeng, rang kaltj-anthetjam-rlwer. Rang inenh angketj wentarel ilek, “Arrantherr tjeng arratj kaltj key? Mer tjengenheh arrantherr kaltj key, nthenheng yeng petjek? Itja kwet! Yeng ahelh nhenhel anem, Altjerrel yengenh lanthekarl. Yeng itja rrwkwapem iterrentj tjengenh-akert. Yeng Altjerrhenh iterrentj-akert rrwkwapem. Arrantherr kenh kwer akwenarl. Yeng kwer kaltjarl, yeng kwereng petjekarl wart.”

³⁰ Tjerrtj inang Jesu renh antwerrketjeh ahentj-anek. Itja antwerrketj-kweny, arltang kwer ilwetjeh mpank kwet. ³¹ Tjerrtj arrpenh mapel renh nakekarl-penh wart, lakenh angkek, “Christ rang petjemarlang, rang twer angerr-akertel mpwaremeng, artwang nhenhelarl mpwaretjenh-arte? Itja kwenh! Nhenh kwenh Christ rang!” ³² Artwang Pharisee mapel tjerrtj map awek, Jesu-akert angkerrekarl. Pharisee inang *priest* twernk mapel thwen, inang *church* arntarnt-arenh-arenh rrwkwentj inenh lanthek, Jesu renh antwerrketjeh.

³³ Jesu-el inenh ilek, “Yeng kwek war weth arrehantherrel-ayeng anetjenh. Kwereng yeng kwer-warn alpetjenh, rang wart yeng lanthekarl kwer-warn. ³⁴ Arrantherr tjeng palenthwetjenh, arrantherr kenh yengenh itja aretjenh. Mer kwer-warn yeng alhem, kwer-warn arrantherr ywarn alhem.”

³⁵ Tjerrtj Jew mapel patemel pawenherrek, “Nthenh-warnam artwang nhenh alhetjeh angkem? Wenheng nwern kwer ywarn palenthwetjenh? Peltj nwern-henh map-warn apek rang alhetjenh, inang mer Greece-el anemeng, inenhemeh rang kaltj-anthetjenh? ³⁶ Wenh lakenh

rang nwernenh ilek, ‘Arrantherr tjeng palenthwetjenh, arrantherr kenh yengenh itja aretjenh. Mer kwer-warn yeng alhetjenh, kwer-warn arrantherr ywarn alhem?’” Lakenh inang pawenherrek.

³⁷ Irlpangkentjeh arltang ingkern kwerel Jesu rang kemerrek, rang tjerrtj map ineh wentarel ilek, “Tjerrtj ngwenh apek inang angkethel anemeng, inang tjeng-warn petjetjeh antjwetjeh. ³⁸ Tjerrtj ngwenh apek inang yeng nakem, angketj Altjerr-henh pipel-ayel ineh-akert lakenh intem, “Tjerrtj inehel-ayel kweneng kwatj iteth rang rew-arteh alhetjenh.” ³⁹ Jesu rang kwatj iteth-akert angketjam. Kenh angketj kwenameny† intek, rang Kwerrern Alngaltar-akert angketjam. Kwerrern renh Altjerrel tjerrtj nakenh-nakenh map-warn lanthetjeh-anngernt. Jesu rang Kwerrern Alngaltar renh mpank-amparr lanthetj-kwenh, rang itja mer alker-warn alpek.

⁴⁰ Tjerrtj arrpenh mapel nhenh awek, inang lakenh angkek, “Artwang nhenh-artek arratj Altjerr-henh angenh-angenh rang anem!”

⁴¹ Arrpenh map angkek, “Nhenh kwenh arratj Christ rang anem, Altjerrel ngkwey alhelekarl.” Arrpenh mapel ilek, “Christ rang itjam mer Galilee-areny anem. ⁴² Angketj Altjerr-henh pipel-ayeng arrernekarl intem, ‘Christ rang David-henh peltj anetjenh, mer Bethlehem-areny. Bethlehem kwenh David-henh mer anak.’” ⁴³ Tjerrtj inang ularrek-ularr ilterrek Jesu-eng arrngel. ⁴⁴ Arrpenh mapel renh kel antwerrketjeh ahentj-irrek. Inang renh itja antwerrkek.

Artwang Pharisee map priest twernk map thwen inang Jesu renh itja nakekarl

† 7:39 Angketj kwenarl intem, arrpenh-arrpenh anthwerr.

⁴⁵ Rrkwentj nheng map iltjant alpek. Artwang Pharisee mapel *priest* twernk mapel thwen inenh pawenhek, “Wenhengarl arrantherr Jesu renh mentj impek, antwerrketj-kwenh? Nwerneh-warn arrantherr angetjemer?”

⁴⁶ Rrkwentj inang inenh ilek, “Rang kwenh tjerrtj map mwerr anthwerr kaltj-anthek. Nwern itja angketj lakenh-arte h arrwekel awek apek.”

⁴⁷ Artwang Pharisee mapel inenh ilek, “Arrantherrenh-arlkemeh rang perrpert-ilek! ⁴⁸ Tjerrtj nwern-henheng itja nyentel Jesu renh nakem. *Priest* twernk mapel itja renh nakem. ⁴⁹ Tjerrtj nhenh map palekalek-irrem inang Moses-henh mpwareng-areng h akwen anemeng. Lak-enheng inang Jesu renh nakem. Altjerrel kwenh inenh atwetjenh.”

⁵⁰ Nicodemus artwang Pharisee nheng rang Jesu-warn kwenyel alhekarl, rang inenh awek, lakenh angkerleh. Rang inenh ilek, ⁵¹ “Mpwareng-areng nwern-henhel kwenh nwernenh arnpakem. Itja tjerrtj arrpenh war atwetjehant, nwern renh awetjeh-amparr.”

⁵² Artwang Pharisee arrpenhel Nicodemus renh ilek, “Ntwam artwang Galilee-areny? Altjerr-henh angketjeh *read-irray!* Ntwang kaltj anetjenh, Altjerr-henh angketj angenh-angenh itja anthwerr mer Galilee-eng petjetjenh apek.”

⁵³ Inang ingkerrek kel mer-warn alpek.

(Angketj verse 1-eng verse 11-ek-atwetj inang iterlarem, ingkern alhengk-arekarl.)

8

Angketj arrweketj nyent-akert

¹ Jesu rang irrtang-warn alhek. Irrtang arreny kwerenh Olive. ² Kweny-rtweh rang weth *church*

angerretj-warn petj-alpek. Tjerrtj map kwer-warn arnek-irremel petjek. Rang arrernelhek, inenh kaltj-anthetjeh. ³⁻⁶ Moses-henh mpwareng-areng kaltj-anthenh-anthenh map artwang Pharisee map thwen inang ahentj-anek, Jesu renh arrkernetjeh. Lakenheng inang marl nyent Jesu-warn angetjek. Marl nhenh renh-artek arrpenh mapel arekarl, artwang arrpenhel-arleng intek-arleng, itja anew kwerenhel-arleng. Inang marl renh tjerrtj mapeng mpwepel ngkerne. Inang Jesu renh arrkernemel pawenhek, “Kaltj-anthenh-anthenhay, awang-athew! Marl nhenh tjerrtjel arek, rang anetj mpwarek. Mpwareng-areng nwern-henhel-ayeng Moses-el nwer-nenh twernek, nwern tjerrtj nhenh irntel iltewetjeh kwel, irrernnggeh-atwetj. Nthakenham ntwang iterrem? Nhenh key arratj, lakenh mpwaretjeh? Nwern renh irrernng atwemer key?”

Jesu-emeh intert anek. Rang artep arrernelhemel iltjang kantj kwerenhel aherneh mpatj arrernek. ⁷ Inang kwet anhwerr pawenhek marl nhenh-penh. Rang irnemel inenh ilek, “Tjerrtj ngwenh apek mwerr anemeng anetj-kweny, rek-amparr renh irntel iltewetjeh.” ⁸ Kwereng rang wetham artep arrernelhemel aherneh angketj mpatj arrernek.

⁹ Tjerrtj mapel angketj kwerenah awemarleng, inang lakenh iterrek, “Ay! Nwern kwenh anetj-akert!” Inang ingkerrek nyerr-irremel alhek, nyentam-nyent alhek. Awang mapek-amparr, kwereng anthetj map alhek. Ingkern Jesu-emeh marl thwen anek. ¹⁰ Jesu-el irnemel marl renh pawenhek, “Nthenhameh tjerrtj inarl ngwenh marl arlkwer-arkwer ilekarl? Nyentel apek ngwenh irntel iltewetjenh?”

¹¹ Marl rang angkek, “Itjaw, twernkay!”

Jesu-el renh ilek, “Thang ngwenh itja urrarn ilem. Kel alpay. Ntwang mwerr anetjeh, anetj mpwaretjal anay!”

Jesu ilelhek, “Yeng parrtj anem tjerrtj ahelh-areny ingkerrekeh”

¹² Jesu-elemeh inenh weth ilek, “Yeng parrtj rang anem tjerrtj ahelh-areny ingkerrekeh. Tjerrtj ngwenh apek tjengel-ayel anharrel petjem, inang itja ngwemerntel nthwerl-apedjenh. Inang parrtjel kwet nthwerl-apem, inang kwetant iteth anetjenh.”

¹³ Artwang Pharisee mapel renh ilek, “Ntwang kwenh ngkwewaleny ilelhem! Nthenham tjerrtj angerrepat nwerneh ilelhem, angketj ngkwengenhel-arleng twer mpwaretjeh, nthakenh-nthakenh apek ntwang ilelhem? Lakenhehant nweren ngwenh naketjeh apek! Lakenheng angketj ngkwengenh itja arratj anem!”

¹⁴ Jesu-el inenh ilek, “Yeng kaltj anem, mer kwereng wart yeng petjekarl. Yeng kaltj mer kwer-warn yeng angkep alpetjenh. Lakenheng yeng nyent apek arrehantherr ilelhem, arrantherr kel angketj tjengenh naketjeh kwet. Arrantherr itja kaltj anem, mer kwereng yeng petjekarl. Arrantherr itja kaltj, mer kwer-warn yeng angkep alpem. ¹⁵ Arrantherr tjeng kaltj-kwenh anem, arrantherr tjeng tjel-angkerrem, arrantherr ahelh-areny wart. Kenh thang nyentel itja tjerrtj *judge-em-iletjehan*. ¹⁶ Angeyel tjerrtj ingkerrek *judge-em-iletjenh*. Angeyel yengenh lanthek ahelh nhenh-warn. Lakenh ilernakan ingkerrek arratj *judge-em-iletjehan* anem. ¹⁷ Angketj mpwareng-areng arrehantherr-henhel-ayeng intem, ‘Tjerrtj atherr apek angketj nyent angkemeng, tjerrtj arpenh mapel angketj kwer-atherr-henh kel naketjehant, lakenh angkemeng, “Angketj nhenh arratj.”’ ¹⁸ Yeng ilelhem, yeng Altjerr-henh Ler anemeng. Angeyel yengenh lanthekarl,

rang tjeng-akert angkek, 'Nhenh Ler tjengenh anem.' Angketj nhenh atherr anem." Lakenh Jesu-el inenh ilek.

¹⁹ Inang Jesu renh pawenhek, "Nthenham angey ngkwenghan?"

Jesu-el inenh ilek, "Arrantherr tjeng itja kaltj, angey tjengeneh thwen. Arrantherr tjeng kaltj anemer, kwereeng arrantherr Angey tjengeneh kaltj anemer. Itja."

²⁰ Jesu rang lakenh ilelhek, rang tjerrtj map *church* angerretj kwenel kaltj-anthemeng, rang *room* ngkweltj tjenkerr map-akertel iterel anekarl. Tjerrtj nyentel renh itja antwerkke, Altjerrel inenh arnpakekarl. Arltang rang ilwetjeh irretjenharl, mpank kwet wart.

*Jesu-el tjerrtj Jew map ilek,
kenh inang angkep tjernemel iltek*

²¹ Jesu-el tjerrtj Jew map weth ilek, "Yeng mer arrpenh-warn alhetjenh, arrantherr kwer-warn ywarn alhem. Arrantherr ywarn tjeng palenthwetjenh. Arrantherr anetj-akert ilwetjenh, anetj arrehantherrel-ayel anemarleng-antey."

²² Inang angketj nhenh pal awek. Inang pawenherrek, "Wenheng rang nheng angkek-arleng wart, 'Mer kwer-warn yeng alpetjeh, arrantherr ywarn alhetjenh.? Rang key irrernng atwelhetjenh?"

²³ Jesu-el inenh ilek, "Arrantherr kwenh ahelh kwen-areny, yeng kenh kern-arenyarl. Yeng itja kwetarl ahelh-areny anem. ²⁴ Thang nheng arrantherrenh ilek, arrantherr anetj-akert ilwetjenh, anetj arrehantherrel-ayel anemarl-antey. Arrantherr itja yengenh nakemeng, yeng Angey-kenh Ler anemeng, Altjerrel anetj arrehantherrenh itja rrpwaremel wetjenh. Arrantherr anetj-akert kwet ilwetjenh."

²⁵ Inang Jesu renh pawenhek, "Ngwenham ntwang?"

Jesu-el inenh ilek, “Thang arrantherrenh arrwekel nheng kaltj-anthekarl. ²⁶ Ayeng angketj angerr arrpenh-arrpenh-akert anem, arrantherrenh iltetjeh. Mentj thang impem. Altjerr rang yeng lanthekarl, angketj kwerenh arratj anem. Thang angketj kwerenh awak, thang angketj kwerenhant ilem tjerrtj ahelh-areny ingkerrekeh.”

²⁷ Rang inenh angketj Angey-akert iter-angkwerr ilek. Inang angketj kwerenh itja iterl-arek. ²⁸ Jesu ineh weth ilelhek, “Kelant arrantherr Tjerrtj-henh Ler renh kern-iletjenh, kwereng arrantherr kaltj anetjenh, yeng Angey-henh Ler anemeng. Arrantherr kaltj anetjenh, Angeyel yengenh kaltj-anthekarl-arteh, lakenh yeng angkem. ²⁹ Angey rang yengenh lanthekarl, rang tjengel-ayel anem. Rang yengenh itja mentj impem. Yeng kwer kwet kangkwerrem.” ³⁰ Tjerrtj mapel angketj nhenh awak, inang Jesu renh nakek.

Angketj Jesu Abraham atherr-akert

³¹ Jesu-el tjerrtj nakenh-nakenh irrekarl map inenh ilek, “Arrantherr apek angketj tjengenheh kwet kangkwerremeng, kel arrantherr arratj kwertengerl tjengenh anetjenh. ³² Arrantherr angketj arratj tjengenheh kaltjemeh anetjenheng. Angketj arratjel arrantherrenh aratelhelem tjej anetjeng, arrantherr kethelemeh tjej arratjel alhetjenheng.”

³³ Tjerrtj mapel renh ilek, “Nwern kwenh arrwekeleny Abraham-kenh peltj anem! Nwern kel tjej arratjel alhem! Tjerrtj arrpenh map nwerneh itjemeh twernk apek anem! Wenheng ntwang nwernenh twernem, nwern tjej arratjel kwel alhetjeh?”

³⁴ Jesu-el inenh ilek, “Arratj anhwerr, tjerrtj ngwenh apek rang alherrentj anetj kwerenhek kangkwerrem, alherrentj anetj rang tjerrtj renh kwet antwerrketjenh.

Tjerrtj rang rrwapenh-apenh-arte anem twernk kw-erenheh. ³⁵ Thang arrantherrenh ilem angketj mer-akert. Rrwapenh-apenh rang itja merek-artwey anetjenh. Ler ngwenh-kenh apek anem, rant merek-artwey anetjenh. Kwerant anem, merel kwet antarl-irretjeh. ³⁶ Kwereng Ler nhengel arrantherrenh tjej arratjeh arrernemeng, arrantherr itja weth alherrentj anetj arrehantherr-henh kangkwerretjeh. Kwereng alherrentj anetj rang itja weth twernk arrehantherr anem, arrantherr kel kethelemeh anetjenh. ³⁷ Yeng kaltj, arrantherr Abraham-henh peltj anemeng. Arrantherr angketj tjengenheh ahentj-kwenh anemeng, lakenheng arrantherr ahentj-anem, yeng ir-rernng atwetjeh. ³⁸ Yeng Angeyel-ayeng anak, thang arrantherrenh angketj kwerenh ilem. Arrantherr angketj nhengeh kangkwerrekarl, angey arrehantherr-henhel angketj ilekarleh.” ³⁹ Inang Jesu renh ilek, “Nwern arratj kwenh angey Abraham-henh peltj anem!”

Jesu-el inenh ilek, “Arrantherr apek Abraham-henh peltj arratj anemeng, arrantherr Abraham-arte mernelhemer. ⁴⁰ Arrantherr kenh ahentj-anem, yeng ir-rernng atwetjehant. Wenheng? Thang arrantherrenh arratj anhwerr ilek-arleng, angketj renh thang Altjerr-reng awekarl. Abraham itja arrantherr-arte mernelhek. ⁴¹ Arrantherr-arte arrehantherr-henh angey-arte mernelhem.”

Inang Jesu renh ilek, “Nwern itjam kwetjentj anem, Altjerr rarrp Angey nwern-henh anem.”

Arrentj-kenh ler map

⁴² Jesu-el inenh weth ilek, “Yeng kwenh Angeyeng petjek, rarrp yengenh arrehantherr-warn lanthek. Yeng itja nyent iterrek, petjetjeh. Arrantherr tjeng itja nyerrkem, lakenheng Altjerr itja angey arrehantherr-henh anem.

⁴³ Wenhengam arrantherr angketj tjengenh itja nakem?

Thang arrantherrenh ileyay, arrantherr-artek alhengk-aretj-kweny war anem. ⁴⁴ Arrentj rang kwenh angey arrehantherr-henh anem. Arrantherr ahentj-anem kwer kangkwerretjeh. Rang kweteth irrernng atwenh-atwenh anganentj anentjek. Rang kweteth angketj rrtjwerrentj ilem, rang kwenh urrtjalth anem. Rang tjerrtj rrtjwerrenh-rrenh mapek angey anem. ⁴⁵ Thang arrantherrenh angketj arratj ilek-arleng-artany, arrantherr yengenh itja nakem. ⁴⁶ Ngwenhel yengenh ilemer, thang anetj mpwarekarl? Itja kwenh! Yeng arratj angkem. Wenhengam arrantherr yengenh itja nakem? ⁴⁷ Tjerrtj ngwenh apek Altjerr-henh peltj anem, inang arratj awem, Altjerrel inenh ilemeng. Arrantherremeh itja Altjerr-henh peltj anem, lakenheng arrantherr Altjerr-henh angketj itja arratj awem.”

⁴⁸ Tjerrtj mapel Jesu renh ilek, “Nwern ngwenh arratj anthwerr ilem, ntwang Samaria-areny anemeng, artwang arrentj-akert.”

⁴⁹ Jesu-el inenh ilek, “Yeng itjam arrentj-akert. Thang angey tjengenhant nakem. Arrantherr yengenh rrtjwekel-wemar. ⁵⁰ Yeng itja tjwenelherl-apem, Angey rarrp yengenh tjwenerl-apem. Rang ahentj, tjerrtj mapel yengenh naketjeh. Rang kwenh *judge-em-iletjenharlam*. ⁵¹ Angketj nhenh arratj anthwerr, tjerrtj ngwenh apek angketj tjengenhew kwet kangkwerrem, rang itja kwetaril ilwetjenh.”

⁵² Tjerrtj inang renh ilek, “Nwern kaltjam, ntwang arrentj-akert anemeng. Abraham rang ilwek, Altjerr-henh angketj angenh-angenh ngkweyeny map ilwek. Kenh ntwang ilem, tjerrtj rang angketj ngkwengenh kangkwerremeng, rang kwel itja kwetaril ilwetjenh. ⁵³ Abraham Altjerr-henh angketj angenh-angenh ngkweyeny map thwen inang ingkerrek ilwek. Ntwang key

Abraham-eng angerr-lkwer anem? Rang peltj nwern-henh. Ngwenhemeh ntwang ilelhem? Ntwartek itja Abraham-arteh anem!”

⁵⁴ Jesu-el inenh ilek, “Yeng itja tjwenelhem. Angketj tjengenh itja pelkel war anem. Angey rang tjeng nyerrkem. Arrantherremeh ilelhem, rang Altjerr arrehantherr-henh kwel anemeng. ⁵⁵ Arrantherr kwer akwenarl. Yeng kenh kwer kaltjarl. Yeng apek tjerrtj arrpenhek ilelhemeng, yeng kwel Altjerr kwer akwen anemeng, lakenh yeng rrtjwerrem war, arrantherarl rrtjwerrem-arteh. Yeng itja lakenh ilelhem. Yeng kwer kaltjarl, yeng angketj kwerenheh kangwerrem. ⁵⁶ Peltj arrehantherr-henh Abraham tjeng kaltj anek, yeng ahern nhenh-warn petjetjenharl. Rang arrken anthwerr anek.”

⁵⁷ Inang Jesu renh ilek, “Mentjemeh impay! Ntwang itjam angerrepat anem! Ntwang Abraham renh itja arek!”

⁵⁸ Jesu-el inenh ilek, “Mantjel awerrerrang! Abraham itja anek ahern nhenhel, yeng kweteth anentjek alker kernel.” ⁵⁹ Tjerrtj mapel pwert inek, Jesu renh irntel iltewetjeh. Jesu ineheng alengk-welhemel, *church*-henh *yard*-eng arratenhek.

9

Jesu-el artwang pweng alngampelh-ilek

¹ Jesu tjevel alhep-alhetjam, rang artwang pweng renh arek. Artwang aywang pweng anek kwekeng-ntjel. ² Kwertengerl inang Jesu renh pawenhek, “Kaltj-anthenh-anthenhay, wenh-penh rang anngang pweng kwet anek kwekeng-ntjel? Ngwenham anetj mernelhek? Artwang

pweng nhenh key? Itja apek, angey kwerenh apek? Matj kwerenh apek?” *

³ Jesu-el inenh ilek, “Itjam artwang nhenh anetj mpwarelhek. Angey matj kwerenh itja anetj mpwarelhek. Artwang yanh anek anngang pweng kwekeng-ntjel, thang apek renh mwerr-iletjehng. Kwereng tjerrtj ingkerrekel aretjenh, Altjerr rang twer anthwerr anem. ⁴ Altjerrel kwenh yengenh ahelh nhenh-warn lanthek, kwer rrwapetjeh. Lyet arltang angerremeh anem, nwern rrwapetjeh. Kel kweny-irremel tjerrtj ywarn rrwapem. ⁵ Yeng tjerrtj ahelh-areny mapel-ayeng anemarleng, yeng parrtj ineh anem.”

⁶ Kwer-penh Jesu-el ahelh-warn apelh-wek, apelh ahelh anthwerrng mpwarek. Kwereng rang artwang pweng kwer anngang anthwerrngel pernek. ⁷ Rang renh ilek, “Alhay Siloam-warn, kwatj angentj-warn. Anngang ngkwengenh lhewelhetjeh.” Arreny Siloam nhenh Anmatjerrel-ayel intem “Lanthe Karl”. Artwang rang kel alhek, anngang lhewelhetjeh. Kwer-penh rang anngang mwerrelemeh arek, kethemeh. Kwer-penh rang merwarn alpek.

⁸ Tjerrtj mer-areny map inang renh arek, mwerremeh aremel talkw alherleh ineh-angkwerr. Inang patemel pawenherrek, “Artwang nhenhan pweng nheng key? Artwang pwengek-amparr anekarl-penh. Rang merneh ankey nketj-alhetjart? Rang key?” ⁹ Arrpenh map angkek, “Rang anthwerram yanh!” Kenh arrpenh map angkek, “Itjaw! Artwang arrpenham yanh! Inngerr rarteh.”

Artwang rang ilelhek, “Yeng kwenh rang!”

* **9:2** Tjerrtj map lakenh iterretjart, “Tjerrtj apek anetj mpwarelhek, lakenheng Altjerrel renh atwekarleh-athen.”

¹⁰ Inang renh pawenhek, “Nthakenham anngang ngkwengenh mwerr-irrek?”

¹¹ Rang inenh ilek, “Artwang nyentel ahern anhwerrng mpwarek, anngang tjengenh pernek. Kwerenh arreny Jesu. Kwereng rang yengenh kwatj angentj-warn lanthek, anngang lhewelhetjeh. Kwatj angentj nhakan arreny Siloam. Yengemeh alhek, anngang lhewelhetjeh. Thangan arek keth-anem.”

¹² Inang renh pawenhek, “Nthenham artwang yang?”
Artwang pwengarl anek angkek, “Ywek.”

*Artwang Pharisee mapel artwang pweng
kwekeng-ntjel anekarl renh pawenhek*

¹³⁻¹⁴ Arltang kwerel Jesu-el ahern anhwerrng mpwarek, artwang pweng yanh anngang mwerr-iletjeh, arltang angerr kwenh anek, Saturday. Kwer-penh tjerrtj inang artwang pweng wekeng-ntjelarl anek renh artwang Pharisee map-warn tjey-angek. ¹⁵ Artwang Pharisee mapelemeh artwang pweng wekeng-ntjel anekarl renh pawenhek, “Nthakenham anngang ngkwengenh mwerr-irrek?”

Rang inenh ilek, “Rang anngang tjengenh ahern anhwerrngel pernek, yengemeh anngang kwatjel lhewelhek. Thang keth-anem.”

¹⁶ Artwang Pharisee rrpwetj angkek, “Artwang alenh rang arltang angerr Saturday-el rrwapek. Nhenh itja arratj anem. Angketj mpwareng-areng nwern-henhel-ayeng intemeng wart. Nwern kwer mwekenh-irrem mpwareng-areng nwern-henheng. Lakenheng artwang rang itja Altjerr-henh anem.”

Kenh artwang Pharisee arrpenh map lakenharl angkek, “Artwang anetjel itja ngangkarel mpwarem! Artwang mwerrelant kwenh ngangkarel mpwarem!”

¹⁷ Lakenheng inang weth pawenhek artwang pweng kwekeng-ntjearl anek renh, “Nthakenh apek ntwang iterl-arem? Artwang nhengel ngwenh anngang mwerr-ilekarl, ngwenham rang? Nwernenh ilang!”

Rang inenh ilek, “Rang Altjerr-henh angketj angenh-angenh anem.”

¹⁸ Twernk mapel artwang renh itja nakek. Inang tjweker-irrek, rang kwewaleny ilelhek, rang pweng kwekeng-ntjel anentjekarl-penh wart. Inang kwer-artwey atherreh ntangelhemel ngwek. ¹⁹ Inang renh-atherrenh pawenhek, “Artwang nhenh mpwel-kenham? Rang kwel anngang pweng kwekeng-ntjel kwet anentjekarl? Nthakenham rang arem?”

²⁰⁻²³ Angey mwek thwen kwerenh ratherr twernk mapeng ater-irrek. Inang lyet mpwareng-areng nhenh ngkernek-arleng, “Tjerrtj ngwenh apek rang Jesu-akert angkemeng, iterl-aremeng Jesu rang Christ anemeng, Altjerrel ngkwey alhelekarl, renh *church*-eng alharlkwetjeh.” Lakenheng ratherr inenh ilek, “Ilern kaltj, rang ler ilern-henh anemeng. Ilern kaltj, rang anngang pweng kwet kwekeng-ntjel anekarl. Nthakenham rang lyet arem? Ilern nhenhek itja kaltj. Ngwenhel renh anngang mwerr-ilek, ilern itja kaltj anek. Rang itja kwer anem, renhant pawenhay! Rang kel arrehantherr kwewaleny ilelhet-jenh!”

²⁴ Inang artwang pweng kwekeng-ntjel anekarl kwer weth-antey ntangelhek, inang renh pawenhetjeh. Inang angkek, “Altjerrel ngwenh arem, arratj anthwerr ilelhang! Nwern kwenh kaltj, artwang nheng rang ngwenh mwerr-ilekarl, rartek artwang anetj anem!”

²⁵ Artwang pweng anekarl rang inenh ilek, “Yeng itja kaltj, artwang alenh anetj apek anemeng, mwerr apek.

Yeng nhenhekant kaltj, yeng pweng anekarl, lyet thang keth-anem arem!”

²⁶ Inang renh pawenhek, “Nthakenh anthwerram rang ngwenh anngang mwerr-ilek?”

²⁷ Rang inenh ilek, “Thang arrantherrenh kalam ilek. Arrantherr angketj tjengenheh itja kangkwerrek! Wenh-heham arrantherr yengenh kwet pawenhem? Arrantherr kwer nakenh-nakenh anetjeh ahentj-irrem?”

²⁸ Inang renh arrampewek, “Ntwang kel nakenh-nakenh kwerenh anem! Nwern Moses-henh nakenh-nakenh anem! ²⁹ Nwern kaltj, Altjerr rang ngkwey Moses-el-ayel angkekarl. Kenh nwern artwang arrpenh nhenh mer kwerenhek-arlk kaltj-kwenyar!”

³⁰ Artwang rang inenh pawenhek, “Nthakenharl artwang rang yengenh anngang mwerr-ilek? Kenh arrantherr mer kwerenhek-arlk kaltj-kwenyar! ³¹ Nwern kaltj, Altjerr rang itja tjerrtj anetjeh kangkwerrem. Tjerrtj inang Altjerreh kangkwerremel nakem, Altjerr rang tjerrtj inehant kangkwerrem. ³² Ngkweyeng-ntjel nwern itja kwet awentjek, tjerrtj nyentel apek tjerrtj anngang pweng kwekeng-ntjelarl anngang mwerr-ilekarl. ³³ Artwang nhenh apek itja Altjerr-areny key? Nthakenham rang yengenh ngangkarel mpwarek?”

³⁴ Inang renh ilek, “Ntwang kwer kwekeng-ntjel anetj kwet mernelhek! Ntwang iterrem, ntwang kwel nwer-nenh kaltj-anthetjenharl! Itjeng alhang!” Inang renh *church* kwereng keth-warn alharlkwek, kweteth.

Artwang rang pweng anekarl Jesu renh angerr nakek

³⁵ Jesu-el awek-arleng, Pharisee inang artwang nheng *church*-eng alharlkwekarl, rang kwer palenthwek. Rang renh aremel pawenhek, “Ntwang Christ renh nakem kwey, Altjerrelarl ngkwey alhelekarl?”

³⁶ Artwang rang renh ilek, “Artwangay, ngwenham rang? Tjeng ilay, thang renh naketjenheng!”

³⁷ Jesu-el renh ilek, “Ntwang renh awek, ntwang renh arek, ntwang kwere angkem.”

³⁸ Artwang rang Jesu renh alhengk-aremel ilek, “Ngkartay! Thang ngwenh nakem!” Rang amperel-ayeng ar-rernelhemel renh kangkemel nakek.

³⁹ Jesu angkek, “Yeng ahelh nhenh-warn petjek, tjerrtj map ahelh apanpel *judge-em-iletjeh*. Tjerrtj arrpenh map inang tjerrtj pweng-arte war anem, yengenh iterl-aretj-kweny anem. Thang inenh anngang alngampelh-iletjenh. Thang inenh kaltj-anthem, inang yengenh iterl-aretjehemeh. Tjerrtj arrpenh map inang nakelhem, inang mwerr-arrpantey, inang tje y anetjel kwet alherl-aretjenh, artwang pweng-arte ngwemerntel-arte alherl-apem. Inang yengenh iterl-aretj-kweny anem, nakentj-kweny anem. Thang inenh itja mwerr-iletjenh, itja kaltj-anthetjenh.”

⁴⁰ Artwang Pharisee rrpwetj inang kwere angkerle. Inang renh pawenhek, “Ntwang nwernenh ilek, anngang pweng kwel?”

⁴¹ Jesu-el inenh ilek, “Arrantherr apek pweng anem, arrantherr itja anetj-akert anem. Arrantherr ilelhem, arrantherr kwel Altjerr-henh angketj iterl-arem. Arrantherr anetj-akert kwetarl anem!”

10

Jesu-el angketj yep-yep map-akert ilek

¹ Jesu-el inenh weth ilek, “Thang arrantherrrenh angketj nhenh ilem, artwang atherr-akert yep-yep map-akert thwen. Yep-yep map parrik kwenel irnetjam. Artwang ngwenh apek parrik-angkwerr kwen irrpem,

rang itja arrew-angkwerr irrpem, lakenh nwern alhengk-arem, artwang rang anyenngamp anem, atwenh-atwenh apek. ² Kenh artwang arrpenh rang arrew arratj-angkwerr irrpenhem, nwern alhengk-arem, rang yep-yeppek-artwey anem. Rang arntarnt-arenh-arenh mwerr anem yep-yep ineh. ³ Artwang arrewek-artwey rang arntarnt-arenh-arenh kwerr arrew altjwer-ilem, arntarnt-arenh-arenh rang arrew-angkwerr irrpenhet-jengah. Yep-yep mapel arntarnt-arenh-arenh inehenh awem. Arntarnt-arenh-arenh rang yep-yep kwerenh map arreny anewemel ngwem, rang ineh parrik kweneng keth-warn arratelh-ilemel angem. ⁴ Kwereng rang ineh arratelh-ilekarl-penh, arntarnt-arenh-arenh rang ineheng arrwekel-irrem. Kwereng yep-yep inang kwereeng ingkern-angkwerr alhem, inang angketj kwerenheh kaltjeng wart. ⁵ Inang itja tjerrtj lwerenyeng ingkern-angkwerr alhem, itja. Inang kel aterel arerl-alhem, inang angketj kwerenhek kweneng wart.” ⁶ Jesu-el ineh angketj kwenameny* nhenh ilek. Inang angketj renh pal awek.

Jesu rang ilelhek, “Yeng arrew tjeperr rang anem.”

⁷ Jesu rang ilelhek, “Arratj anthwerr, yeng anem arrew-arteheh yep-yep tjengenh mapeh. ⁸ Arntarnt-arenh-arenh arrpenh inang tjeng arrwekel anekarl, inang ingkerrek anyenngamp atwenh-atwenh anak. Yep-yep inang ineh itja kangkwerrek. ⁹ Yeng arrew tjeperr rang anem. Tjerrtj ngwenh apek tjeng-angkwerr irrpenhem, inang tjengel-ayeng kwetant iteth anetjenh. Inang irrperl-anetjenh arraterl-anetjenh yep-yep-arteheh. Inang mern angerr kwet arlkwerl-anetjenh. ¹⁰ Anyenngamp kenh

* **10:6** Angketj kwenarl intem, arrpenh-arrpenh anthwerr.

petjem, yep-yep inenh anyenngel inetjeh, irrernng atwet-jeh apek, ywerrelh-iletjehant apek. Yeng itja lakenh-arte anem. Yeng petjek, yep-yep inenh iteth anyenetjeh, inang tjengel-ayeng kwetant iteth anetjeh-anngernt.”

Jesu ilelhek, “Yeng yep-yep arntarnt-arenh-arenh mwerr rang anem.”

¹¹ Jesu rang weth ilelhek, “Yeng arntarnt-arenh-arenh mwerr rang anem. Arntarnt-arenh-arenh mwerr rang kel yep-yep kwerenh mapek tjang-ilwem. ¹²⁻¹³ Arntarnt-arenh-arenh arrpenh ngwenhel apek yep-yep map maneyek war arntarnt-arem. Rang itja yep-yep-arte anem. Rang angwely arnwer nhwenh-nhwenh aremeng, rang aterel arrtjanem, yep-yep inenh aterel imperl-alhemel. Arnwer rang yep-yep inenh nhwem, inenh nhwemel irrarnpelh-ilem.

¹⁴ “Yeng anem arntarnt-arenh-arenh mwerr rang. Yeng yep-yep tjengenh mapeh kaltj anem. Inang tjeng kaltj anem. ¹⁵ Yeng ineh kaltj, Angey rang tjeng kaltj anemarl-arte. Yeng Angey kwer kaltjarlam. Yengemeh yep-yep tjengenh mapeh tjang-ilwetjenh, inang iteth anetjenheng. Yeng iteth tjengenh ineh mentj anthelhetjenh. ¹⁶ Yep-yep arrpenh map inang tjeng mpank-antey anem. Inang itja yep-yep nhenh mapel-ayeng anem. Inang angketj tjengenh awetjenh, kwereng thang inenh Altjerr-warn angetjetjenh. Kel yep-yep map nyentemeh anetjenh, arntarnt-arenh-arenh nyent ingkerrekeh anetjenh. ¹⁷ Angey ahentj, yeng iteth tjengenh mentj anthelhetjeh. Yeng kwer kangkwerremeng, lakenheng rang tjeng angerr anthwerr nyerrkem. Kelant rang iteth tjeng angkep anhetjenheng. ¹⁸ Arrpenhel yengenh ywarn irrernng atwem. Yengarrp Angeyek kangkwerremel ilwetjenh. Tjengan anem ilwetjeh, kwer-penh kemerretjenh.

Angey rarrp yengenh lakenh twerneke.” Lakenh Jesu rang ilelhek.

¹⁹ Tjerrtj inang angketj nhenh awekarl-penh, inang angkerrek. ²⁰ Arrpenh map arnpakemel angkek, “Jesu rartek arrentj-akert, artwang ahert. Tjerrtj itja kwer kangkwerretjeh.”

²¹ Arrpenh map lakenharl angkek, “Nthakenh Jesu arrentj-akert anem? Artwang arrentj-akert ywarn lakenh angkem. Artwang arrentj-akertel ywarn tjerrtj pweng anngang aretjeh mpwarem!”

Tjerrtj mer-areny mapel itja Jesu renh nakek

²² Kel lhwerrpemeh anak. Lhwerrpel tjerrtj Jew map kweteth Jerusalem-el arraw-irretjart, tjenkerr anyenetjeh. Tjenkerr arreny kwerenh Church Angerr Ngkernentj. Lakenheng Jesu rang anak Jerusalem-el. ²³ Arltang arrpenhel Jesu rang lywang nyent kwerel nthwetjam. Lywang rang anak church angerr iterel. Lywang renh inang iletjart King Solomon-kenh lywang. ²⁴ Tjerrtj map kwer-warn arraw-irrek. Inang renh pawenhek, “Nwern-artek ngkweng-akert ywarn iterrek. Ntwang arratj ilelhay nwerneh! Ntwang Christ key, Altjerrel ngkwey arrwekeleny nwern-kenh mapek alhelekarl, ngwenharl ahelh nhenh-warn lanthetjenhar!”

²⁵ Jesu-el inenh ilek, “Thang arrantherrrenh kel ilek, kenh arrantherr yengenh itjarl nakek. Thang twer angerrel mpwarek, lakenh yeng mernelhek, Angeyelarl yengenh lanthek. Lakenheng arrantherr kaltj anemer, yeng Christ anemeng. ²⁶ Arrantherr itja yep-yep tjengenh anem, lakenheng arrantherr itja yengenh nakem. ²⁷ Yep-yep tjengenh mapel yengenh arratj alhengk-awem, tjeng inang kaltj wart. Yeng ineh kaltj. Yeng ineheng arrwekel alhem, inang tjengeng anharrel petjem. ²⁸ Thang inenh

iteth-ilem, inang tjengel-ayeng kwetant iteth anetjenh. Inang itja kwetant ilwetjenh. Arrpenhel inenh itja tjeng-geng raketjenh. ²⁹ Angey tjengenhel tjeng yep-yep map antheke. Rang arrentjeng-arlk twer-lkwer anem. Arrpenhel inenh ywarn kwet Angeyeng raketjenh. ³⁰ Angey ilernak nyent kwet anem.” ³¹ Tjerrtj inang angketj kwerenheh ahentj-kweny awalhek. Inang irrtang inek, irntel renh wetjeh anek, renh irrernng atwetjeh.

³² Jesu-el inenh ilek, “Angeyel yengenh twernekarl wart, thang tjerrtj mapeng alngetherr twer angerrakertel wenh-wenh mpwarek. Thang lakenh mpwarek map-ingar. Thang tjerrtj irlkert map mwerr-ilek, arrpenh-ingar thang arrentj map alharlkwek. Wenheng arrantherr tjeng mwekenh-irrem, yengenh irntel wetjeh arrantherr ahentj-anem?”

³³ Inang renh ilek, “Nwern ngwenh itja pelkel irntel iltewetjeh ahentj-anem, ntwang mwerr mpwarekarlpenheh. Nwern ngwenh irntel iltewetjenh, ntwang Altjerr renh arrampewekarl-penh! Ntwang kwenh tjerrtj war, kenh ntwang lyet ilelhek, ntwang kwel Altjerr anem.”

³⁴ Jesu-el inenh ilek, “Angketj nhenh Altjerr-henh pipel-ayeng intem, ‘Arrantherr altjerr yeng-arteh anetjek.’ ³⁵ Lakenh Altjerr twernk angerrepat arrehantherr-henh-warn angkek. Rang inenh ilek, ‘Arrantherr altjerr anem.’ Altjerr kwenh itja rrtjwerrem. ³⁶ Rarrp yengenh ngakek, ahelh nhenh-warn lanthetjeh-anngernt. Yeng arrehantherr ilelhek, ‘Yeng Altjerr-henh Ler rang anem.’ Wenheng arrantherr tjeng ahang-irrem, thang kwel Altjerr renh arrampewek-arleng? ³⁷ Yeng apek Angey tjengenheh itja kangkwerremeng, itja rrwapentj kwerenheh mpwaremeng, arrantherr yengenh itja naketjeh. ³⁸ Yeng kwenh Angey tjengenheh kangkwerrem, arrantherr yengenh nakemer. Yeng kaltj, arrantherr itja

yengenh nakem. Arrantherr Angey renh nakem key? Rang yengenh twer-ilek, twer mpwaretjeh angerr anth-werr. Arrantherr twer tjengenh aremeng kaltj anemer, Angey rang tjengel-arleng kwet anem, yeng Angeyel-arleng kwet anem.” Lakenh Jesu rang ilelhek. ³⁹ Inang weth ahentj-anek, renh antwerrketjeh. Rang rllkwerr-angkwerr rwerrenhek.

⁴⁰ Kwer-penh Jesu kwertengerl kwerenh map-akert Jordan kwatj ulpay-angkwerr anper kwet alhek. Inang keth nheng kwer-warn alhek, kwerel John-el arrwekel tjerrtj map kwatj-warn irrpelh-ilemel *baptise-em-iletjamarl*. Mer kwerel inang anetj-alpek kwek war. ⁴¹ Tjerrtj map Jesu kwer-warn petjek. Inang pawenherrek, “John-el itja twer angerrel mpwarek. Angketj nhenh John-el nwarnenh Jesu-penh ilekarl, angketj nhenh arratj-irremel keth-irrekemeh.” ⁴² Tjerrtj arrpenh mapel Jesu renh nakewarrek, kenh tjerrtj rrpwetjel itjarl. Mer-areny arrpenh mapel Jesu renh aretj-alhek, inang renh kwetemeh nakek.

11

Jesu-henh peltj arreny Lazarus ilwek

¹⁻² Artwang Lazarus irlkert-irrek, rang Bethany town-areny anak. Kwerenh angkwer atherr Mary Martha thwen town alenh kwer-areny anak. Mary nhenhel kwenh Jesu-henh ingkang anter npwang mwerrel theletjenharl-anngernt. Rang renh kapert kwerl kwerenhelemeh ingkang renh arnngelhetjenharl. ³ Mary-el Martha-el thwen angketj urrpey lanthek Jesu-warn ateng-iletjeh, “Ngkartay, peltj ngkwengenh irlkert-irrek.”

⁴ Jesu-el angketj nhenh awak. Rang angkek, “Lazarus kwel irlkert-irrekaw. Rang itja kwet ilwetjenh. Rang irlkert-irrek, tjerrtj mapel Altjerr Ler kwerenh thwen

naketjeheng.”⁵ Jesu angkwerenheng-atherrek Martha-ek Mary-ek tjej kwer-atherrenh Lazarus-ek thwen nyer-rkek.⁶ Kwer-penh Jesu rang atherr-ingar antarl-irrek.⁷ Kwer-penh rang kwertengerl kwerenh map ngwek, “Mpa, nwern mer Judea-warnemeh angkep alpey.”

⁸ Kwertengerl inang renh ilek, “Kaltj-anthenh-anthenhay! Angwerreh war tjerrtj Jew map ngkweng palenthwek, ngwenh irntel iltewetjeh. Ntwang kenh alpetjeharl angkem!”

⁹ Jesu-emeh angkek, “Parrtj angerr anem kweny-rtweheng-ntjel angwerr-angwerreh-atwetj. Tjerrtj ngwenh apek parrtjel nthwerl-apedtjeh, rang mwerr aretjenh. Rang itja ahern-warn anyetjenh.¹⁰ Tjerrtj ngwenh apek kwenyel nthwerl-apem, rang ywarn arem. Renh kel arnel-ark arkwatetjenh.” Jesu rang iter-angkwerr angkek, rang kwenh parrtj anem.

¹¹ Kwereng Jesu-el inenh ilek, “Peltj Lazarus ankwang war intem. Yeng kel nhenh kwer-warn alhem, renh kemelh-iletjeh.”

¹²⁻¹³ Kwertengerl inang iterl-arek, Jesu-el inenh ilek, Lazarus rang kwel ankwang intemarl. Kenh Jesu-el inenh iter-angkwerr iletjam, Lazarus rang arrwetj intemarl. Kwertengerl mapel renh ilek, “Ngkartay, rang apek ankwang intemarl, rang kel mwerr-irretjenh.”

¹⁴ Lakenh Jesu-el inenh keth ilek, “Lazarus kwenh ilwek.¹⁵ Yeng itja kwerel-ayel anak, nheng rang ilwekarl. Nhenh mwerr arrehantherr anem, arrantherr alhengkaretjeh. Ngwenh war yengenh arrantherr naketjenh. Mpa, nwern kwer-warn alheyemeh.”¹⁶ Thomas kwertengerl arrpenh rang anak. Rang kwertengerl arrpenh map ilek, “Nwern kel ilwetjeh-anngernt wart alhey kwerel-ayell!” Thomas arreny arrpenh kwerenh anak Tjew-atherr.

*Jesu-el angkwerenheng renh-atherrenh
alngwelng-ilek*

¹⁷ Jesu rang kel mer kwek Bethany-ek itwekemeh irretj-alhek, kwertengerl kwerenh map-akert. Rang awek, Lazarus rang kel arltang 4 irrernng intek. Inang arrwekel renh intey-warn kwernewarrek. ¹⁸ Mer Bethany rang Jerusalem-eng angath anak, 3 kilometres. ¹⁹ Tjerrtj map anthwerr Martha Mary thwen angkwerenheng-atherr-warn lharrp petjek Jerusalem-eng, renh-atherrenh alngwelng-ilemel tjep-tjep-iletjeh. ²⁰ Arrpenh mapelanem ilek Martha renh, Jesu rang angath petjerleh. Martha-emeh kwern-warn arnekarner alhek. Mary rang merel antarl-irrek.

²¹ Martha-el Jesu renh ilek, “Ngkartay! Ntwang parrp petjemer, tjejtjengenh itja ilwemer. ²² Ntwang lyet Altjerr pawenhetjeh. Yeng kwenh kel kaltj, rang ngwenh kel awetjeheng. Ntwang renh pawenhetjeh, rang kel mpwaretjeheng.”

²³ Jesu-el renh ilek, “Tjejtjengenh iteth-irremel kemerretjeh.”

²⁴ Martha-el renh ilek, “Yeng kel kaltj, rang kemerretjeh arltang ingkernel, Altjerrelarl tjerrtj map ingkerrek kemelh-iletjeh.”

²⁵ Jesu-el renh ilek, “Tharrp tjerrtj irrernng map iteth-ilem. Tjerrtj kwenh ilwetjeh. Kenh tjerrtj ngwenhel apek yengenh nakem, inang iteth kwet anetjeh. ²⁶ Inang itja irrernng kwet intetjeh. Ntwang key angketj nhenh nakem?”

²⁷ Martha-el renh ilek, “Arratj, Ngkartay. Thang ngwenh nakem. Ntwang Christ rang anem, Altjerr-henh Ler. Altjerrel angerrepat map nwern-henh ngkwey alhelekarl, rang Ler kwerenh tjerrtj ahelh-areny ingkerrek-warn lanthetjenharl.”

²⁸ Martha lakenh angkekarl-penh, rang warl kwerenh-warn angkep alpek. Rang tjey kwerenh Mary renh intert-intertel war ilek, “Kaltj-anthenh-anthenh rang kel petjek. Rang ngkweng ntangelhek.”

²⁹ Mary-el renh awemel parrp kemerrek, Jesu-warn arnekarnet alhek. ³⁰ Jesu rang itja-antey town kwek kwer-warn petjek. Rang keth kwerel-antey anetjam, kwerelarl rang Martha-el-ayeng angkekarl. ³¹ Tjerrtj map inang Mary-henh merel anek, inang renh alngwelng-ilemel tjep-tjep-iletjeh. Inang arek, rang parrp kemerrentjek, keth-warn arratenhek, inang iterrek rang kwel intey-warn alhemarlengeh-athen, arnetjeh. Lakenh inang anharrel ingkern alhek.

³² Mary rang Jesu-warn petjek. Rang kwereng ularr amperel-ayeng arrernelhek. Rang renh ilek, “Ngkartay! Ntwang apek nhenhel anemer, tjey tjengenh kwenh itja ilwemer. Itja.”

³³ Jesu-el Mary arek arnerleh. Tjerrtj arrpenh map thwen akay anek. Rang rrwampey awalhek. * ³⁴ Rang inenh pawenhek, “Nthenheham arrantherr irrerng renh arrernek?”

Inang renh ilek, “Ngkartay, petjang aretjeh.”

³⁵ Jesu-emeh anek. ³⁶ Tjerrtj mapel renh aremel ilerrek, “Arerrerrang, rang kwenh Lazarus-ek nyerrkek angerr anthwerr.”

³⁷ Rrpwetj arrpenhel lakenharl ilerrek, “Rang kwenh artwang pweng nheng-henh anngang mwerr-ilekarl. Rang apek irrerng nhenh renh arrwekel kwet mwerr-ilemer!” Lakenh inang pwer anemel angkek.

Jesu-el Lazarus renh arrwetjengemeh kemelh-ilek

* **11:33 Keth-ilentj:** Rang angerr iterrek, inang kwer iterrek, rang itja tjerrtj irrerng iteth-ilem.

³⁸ Jesu lharrp kwet awelhemel alhek. Rang intey-warn alhek. Intey rang anak irntang angerrelarl martekarl.

³⁹ Jesu-el inenh ilek, "Irttang renh arnangelh-ilang!"

Martha rang renh ilek, "Ngkartay! Rang kel intertemeh intjem. Rang kwenh arltang 4 arrwetj intekarl!"

⁴⁰ Jesu-el renh ilek, "Thang ngwenh nheng ilek, ntwang yengenh nakemer. Ntwang aretjenh, Altjerr rang alker-areny anhwerr anemarl, twer anthwerrel mpwarerleh."

⁴¹ Inang irntang angerretj renh arnangelh-ilek. Jesu rang alker-warn-athek arek. Rang angkek, "Angeyay, ntwang yengenh awek, lakenh yeng ngkweng nyerrkem.

⁴² Thang ngwenh kweteth pawenherl-anem. Yeng kaltj, ntwang yengenh kweteth awerl-anem. Thang ngwenh angetherr pawenhem, tjerrtj nhenh map kaltj anetjenheng, ntwang yengenh lanthekarl."

⁴³ Kwereng Jesu rang arnterrel arlkemel angkek, "Lazarus-ay, arratang!" ⁴⁴ Lazarus kel arratekemeh intey kweneng mantarr artaper-ilekarl-akert. Inang arrwekel nheng renh rnwanentjel ayernekarl, iltjang kwerenh ingkang kwerenh ayernekarl. Inang inggerr kwerenh rnwanentj arrpenhel arltwekarl.

Jesu-el inenh ilek, "Rnwanentj inenh kwereng kap-rlwerrerrang, rang kethel nthwetjenheng."

*Sanhedrin Council inang angerrek,
Jesu renh irrernng atwetjeh*

⁴⁵ Tjerrtj map Mary-el-ayel anekarl inang arek, Jesu-el Lazarus renh iteth-ilek. Tjerrtj map angerrel Jesu renh kwet nakek. ⁴⁶ Kenh rrpwetj arrpenh artwang Pharisee map-warn angketj-akert alhek. ⁴⁷ Kwereng *priest* twernk mapel artwang Pharisee mapel thwen Sanhedrin Council inenh arrawelh-ilek.

Council inang angkerrek, “Artwang nhenhel twer anthwerrel mpwarek tjerrtj mapeng anngetherr. Nwern-artek renh arnpaketjeh. ⁴⁸ Nwern-artek apek renh itja impetjeh, tjerrtj mapel renh nakehetjeng! Rome-areny atwenh-atwenh map petjehetjeng, inang mer nwern-henh *church* angerr-ark ingkerrek ulpert-ilehetjeng. Nwern nthakenh irretjenh? Inang nwernenh ingkerrek ywerrelh-ilehetjeng!”

⁴⁹ *Priest* twernk angerr anek, arreny kwerenh Caiaphas. Rang *priest* twernk angerr anek *year* nyent war. Rang inenh ilek, “Arrantherr iterl-aretj-kweny! ⁵⁰ Nhenh angerr anem: artwang nyent tjerrtj mapeh tjang-ilwetjeh. Itjeng apek, Rome-areny atwenh-atwenh mapel tjerrtj ingkerrek ywerrelh-ilehetjeng.”

⁵¹ Rang itja nyentarrp angkek, rang angkek tjerrtj kwerenh mapel-ayeng. Altjerr-henh Kwerrernel-artek renh ilekarl, Jesu rang tjerrtj Jew ingkerrekeh tjang-ilwetjenharl. ⁵² Jesu rang tjerrtj Jew mapeh war itja ilwetjenh kwel, rang Altjerr-henh peltj ilwetjenh, ahelh apanpelarl anem ingkerrekeh. Lakenh rang inenh ingkerrek arraw-iletjenh. ⁵³ Arltang lyeteng Sanhedrin *Council* inang ahentj-anek, Jesu renh irrernng atwetjeh. Inang angkerrek, “Nthakenh nwern Jesu renh irrernng atwetjeh?”

⁵⁴ Jesu tjerrtj Jew mapeng alengk-welhek. Rang *Ephraim town* kwek-warn alhek. *Town* nhenh rartek rrkwaleng angath war anek. *Town* kwerel Jesu rang antarl irretj-alhek kwertengerl kwerenh map-akert.

⁵⁵ Kel tjerrtj map mer mapeng arrwekel kwet Jerusalem-warn arraw-irrek. Moses-henh mpwareng-arengel-ayeng angketj anek: inang kwatj-warn-amparr irrpjetjeh, inang lhewelhetjeh, tjenkerr arlkwetjenh-anngernt. Tjenkerr arreny kwerenh “Anper Alhekarl”

anek. Tjerrtj Jew map irlpangketjart, Altjerrel arrwekeleny map angek mer Egypt-eng. ⁵⁶ Inang Jesu-eh ywarn palenthwek. Inang church angerretj iterel nthwerl-apetjam. Inang pawenherl-apek, lakenh iterl-aremel, “Rang apek tjenkerreh petjehetj.” ⁵⁷ Priest twernk mapel artwang Pharisee mapel thwen tjerrtj map ilekarl, “Arrantherr Jesu renh apek aremarl, nwernenh ilerrerrang. Nwern renh antwerrketjeheng.”

12

Mary-el Jesu renh ingkang arnngelhek

(Matthew 26.6-13; Mark 14.3-9; Luke 7.37-39)

¹ Arltang 6-penh inang kelant tjenkerr irlpangkemel arlkwetjeh-anngernt, mpank anak. Tjenkerr arreny kw-erenh Anper Alhekarl anak. Tjerrtj Jew map irlpangketjart, Altjerrel arrwekeleny map angek mer Egypt-eng. Jesu-emeh Bethany town-warn alpek, kwertengerl kw-erenh map-akert. Town nheng-warn Lazarus anetjamarl-warn. Jesu-el nheng renh irrernngeng kemelh-ilekarl-warn. ² Angkwerenheng-atherr Martha Mary atherrel ineh mern tjang-itek. Inang arrernelhek, mern arlkwetjeh. Lazarus rang anak. Kwereng Martha-el mern ineh irrarnpelh-ilemel antheke. ³ Mary-elemeh tjampet anter npwang mwerr-akert inek. Arrwekel rang anter renh maney angerrel payem-ilek. Kwereng rang tjampet-akert Jesu-warn alhek. Anter renh rang Jesu-henh ingkang-warn thelek. Kwereng rang Jesu-henh ingkang arnngelhek kapert kwerl kwerenhel. Warl kwenelemeh inang npwang renh intjernek.

⁴ Judas Iscariot rang Jesu-henh kwertengerl nyent anak. Rang Jesu renh kelant atwenh-atwenh mapeh anyenng-anyenngel anthetjenharl. Judas rang ahentj-kweny-irremel angkek, ⁵ “Marl yanhel anter intjarlkwek!

Rang anter renh arrehantherr anthemer, arrantherr renh maney angerreh *sell-em-iletjeh*. Arrantherr maney inemel inenh tjerrtj mern-kweny rrwanentj-kweny mapeh anthemer, inang mern-arlk rrwanentj-arlk inetjeheng.”

⁶Judas rang tjerrtj mern-kweny rrwanentj-kweny mapeh itja lharrp-irrek. Rang ahentj-anek anter-penh maney kwerarrp inetjeh. Rang anyengalth anek. Tjerrtj map inang Jesu-henh kwertengerl mapeh maney anthetjart. Maney inenhemeh inang Judas renh anthetjart, rang inenh arntarnt-aretjeh kwel. Rang maney nhenheng rwengkel inetjart.

⁷ Jesu-el inenh ilek, “Marl renh impay! Rang yengenh anterel pernek, lakenh-arte h inang yengenh pernetjenh, aweng-warn arrernetjeh-anngernt.

⁸ Tjerrtj mern-kweny rrwanentj-kweny map kwenh arrehantherrel-ayeng kweteth anerl-anem. Yeng kenh itjarl arrehantherrel-ayeng kwet anetjenh.”

⁹ Tjerrtj mapel awak, Jesu rang Bethany-el anetj-alhek. Inang petjek, Lazarus-arlk aretjeh. Lazarus nheng Jesu-el renh iteth-ilek arrwetj-penh. ¹⁰⁻¹¹ Tjerrtj arrpenh mapel angketj awak Lazarus-akert. Inang *priest* mapeng ampakelhek. Inang Jesu-antem nakek. *Priest* twernk map ahentj-anek, Lazarus renh irrernng atwetjeh, Jesu thwen.

Jesu rang king petjek town Jerusalem-warn

(Matthew 21.1-11; Mark 11.1-11; Luke 19.28-40)

¹² Tjerrtj map Jerusalem-warn kel arraw-irrek, tjenkerr renh arlkwetjeh. Tjerrtj Jew map irlpangketjart, Altjerrel arrwekeleny map angek mer Egypt-eng. Tjerrtj inang awak, Jesu rang tjenkerr-warn tjeysel petjerleh. ¹³ Inang arnang waly akemel, waly-akert kwer-warn arnek-irrek. Inang arlkerl-apetjam,

“Altjerray, nwern ngwenh nakem!

Nyerrkentj mernelhang angketj angenh-angenh ngkwen-
genheh!

Rang nwerneh-warn lyet petjem.

King nwern-kenh twer-ilang!

Ntwang kwer nyerrkentj mernelhang!”

¹⁴ Jesu-el tangkey kwek arek, tangkey kwer rang antjek.
Angketj nhenh Altjerr-henh pipel-ayel intem,

¹⁵ “Tjerrtj Jerusalem-areny mapay,
arrantherr itja ater-irretjeh!

Arerrerrarray, *king* arrehantherr-henh rang petjem,
tangkey kwekel-ayel anerl-aperleh.”

Angketj nhenh lyet arratjemeh irrek. *

¹⁶ Kwertengerl mapel Jesu renh aremel, tangkeyel
anerl-aperleh, inang Altjerr-henh angketj nhenhek itja
irlpangkek. Kelant Altjerrel Jesu renh iteth-ilekarl-
penh, Jesu rang alker-warn alpekarl-penh, inang angketj
renh alhengk-arekemeh, angketj rang arratjemeh irrek.
Angketj nheng Altjerr-henh pipel-ayel intem, *king* rang
tangkey-akert petjetjenharl Jerusalem-warn. †

¹⁷ Tjerrtj nheng map inang Jesu renh arekarl, rang
Lazarus renh arrwetjeng iteth-ilek, inang nhenh-penh
kwet irlpangketjart. ¹⁸ Tjerrtj arpenh map angketj nheng
kwer-penh inang awek, inang Jesu-warn pwert arnek-
arner alhek. ¹⁹ Kwereng artwang Pharisee map angker-
rek, “Nwern kwenh renh ywarn arnpakek! Nthakenham
nwern irretjenh? Lyet tjerrtj ingkerrekemeh kwereng
anharrel alhem!”

Jesu ilelhek, rang ilwetjenharl

²⁰ Tjerrtj Greece-areny rrpwetj Jerusalem-el yatjarr
petjek, inang petjekarl tjenkerr arlkwetjeh, Altjerr kwer

* **12:15** Zechariah 9.9 † **12:16** **Keth-ilentj:** Angketj arrwekeleny intek,
rang *king* tangkeyel petjemarl, Zechariah 9.

kangkemel. Tjenkerr arreny kwerenh Anper Alhekarl.
²¹ Philip rang anak. Philip rang artwang Bethsaida-areny anak. Bethsaida town rang mer Galilee-el anak. Tjerrtj alethang nheng inang Philip kwer-warn alhek, pawenhetjeh-amparr. Inang Philip renh pawenhek, “Twernekay! Nwern ahentj, Jesu renh aretjeh.”
²² Philip rang Andrew kwer-warn-amparr alhek. Kwereng ratherr Jesu-warn urrpey alhek, renh iletjeh.

²³ Jesu rang kwewaleny ilelhek, “Arltang tjengenh angathemeh irrerl-apem, Angey tjengenhel tjerrtj ingkerrekeh mernetjeh, Tjerrtj-henh Ler rang alker-areny anthwerr anemeng, twer angerr-akert.
²⁴ Thang arrantherrenh angketj tjeperr ilem anngang-penh. Tjerrtjel ipert inyemel *wheat* anngang aherneh arrernemel arltwem. Kwereng *wheat* anngang rang ilwem-amparr. Arnamek-amparr lyapem kwek war anngang kwereng. Kwereng arnam rang annga-akert-irrem. Lakenh anngang nyent ilwemeng, kwereng anngang map-anem-irrem. Anngang nyent ilwetj-kwenyeng, rang nyent kwetarl anem, ywarn anngang map-akert irrem. †
²⁵ Lakenh-arteh tjerrtj ngwenh apek athek-irrem kwewaleny war iterremel, ahelh nhenh-areny war iteth anetjeh, inang kwetant ilwetjenh. Kenh tjerrtj inang itja athek-irrem ahern nhenhel iteth anetjeh, inang iteth ngampekarl anetjenh.
²⁶ Tjerrtj ngwenh apek ahentj-anem tjeng kangkwerretjeh, inang kel tjengeng anharrel petjetjeh. Kwereng inang tjengel-ayel kwet anetjenh. Tjerrtj inang tjeng kangkwerremeng, Angey tjengenhel inenh naketjenh.”

† **12:24 Keth-ilentj:** Lakenh artwang nyenteng angerram-angerr-irretjenh. Artwang rang ilwek. Inang renh kwernek ahern intey-warn, anngang kwernem-arteh. Kwer-penh rang iteth-irremel kemerretj-alpek, mern anngangeng arnam lyapem-arteh. Ngkart-henh-angkwerr lakenh intem. Mapel ngwenhel apek renh nakem, inang iteth kwetant anetjenh.

²⁷ Jesu kwertengerl kwerenh mapek ilelhek, “Yengan lyet lharrp awelhem. Yeng iterrem, nthakenh yeng Altjerr-warn angketjenh. Yeng itja lakenh angkem, ‘Angeyay, yeng itja ahentj-anem, irlkert angerr inet-jeh.’ Lakenheh kwel yeng ahelh nhenh-warn petjek. ²⁸ Angeyay, ntwemeh tjerrtj ingkerrekeh mernelhay, ntwang alker-areny anhwerr anemarl, parrtj angerr-akert.”

Altjerrel alkereng tjerneke, “Yeng kel mernelhek, yeng alker-areny anhwerr anemarl, twer angerr-akert. Yeng weth mernelhetjenh!” ²⁹ Tjerrtj inang awek, arrpenh angkemarl-arteh. Arrpenh map angkek, “Angel alker-areny-artek kwer-warn angkek.” Kenh arrpenh map angkek, “Kwatj angkemeng awerrerrang!”

³⁰ Jesu-el inenh ilek, “Altjerr rang itja tjeng-warn angkem, rang arrehantherr-warn angkek. ³¹ Lyet Altjerrel tjerrtj ahelh-areny *judge*-em-iletjenh, mwerr map anetj mapeng ngakemel. Lyet Altjerrel ahelhek-artwey arrentj renh anpwetjenh. ³² Kelant inang yengenh tjwenetjenh aherneng, tjerrtj ingkerrek tjeng-warn arraw-irrentjem.” ³³ Rang lakenh angkek, inang kaltj anetjenheng, rang ntwerlkel ilwetjenharl.

³⁴ Tjerrtj inang lakenh ilek, “Angketj nhenh Altjerr-henh pipel-ayel intem, ‘Christ rang iteth kwet anetjenharl.’ Nthakenham ntwang ilem, ‘Inang Tjerrtj-henh Ler renh tjwenetjenharl.’? Ngwenham Tjerrtj-henh Ler rang anem?”

³⁵ Jesu-el inenh ilek, “Kwek war parrtj rang arrehantherrel-ayeng anetjenh. Parrtj-antem anemarleng nthwerl-apang kweny-irrehetjeng-athath. Tjerrtj ngwenh apek kwenyel nthwem, rang pal-pal war nthwerl-apem. ³⁶ Arrantherr renh naketjeh, nheng rang arrehantherr parrtj anemarl. Kwereng arrantherr parrtj

kwer ler map anetjenh.” Kwer-penh Jesu alhek tjerrtj mapeng alengk-welhemel.

Tjerrtj mapel Jesu renh itja kwet nakek

³⁷ Jesu-el arrwekel kwet rrwapentj kwerenh mpwaretjam twer kwerenhel tjerrtj mapel-ayel. Tjerrtj inang kenh renh itja kwet nakek. ³⁸ Altjerr-henh angketj angenh-angenh nheng Isaiah rang arrwekel-antey angketj pipwarn arrernek. Angketj nhenh arratjemeh irremel arlpaw-irrek.

“Ngkartay, tjerrtj ngwenhelam angketj nwern-henh nakek?

Itja kwenh!

Tjerrtj ngwenhel renh alhengk-arek,

Ngkart rang twer anthwerrel mpwaremeng?

Itja kwenh!” §

³⁹ Tjerrtj inang Jesu renh ywarn nakek. Isaiah-el angketj arrpenh nhenh pipwarn arrernek,

⁴⁰ “Altjerrel anngang tjerrtj map-henh pweng-ilek, inang anngang inehenhel arehetj.

Rang iterrentj inehenh perrpert-ilek,

inang arratj iterl-arehetj.

Kwereng inang twep-irrehetj,

Altjerrel inenh mwerr-ilehetj.” *

⁴¹ Isaiah rang arrwekel kwet kwerrern-angkwerr arek, Jesu rang alker-areny anthwerr anerleh, parrtj angerrakert. Rang ilek arrwekel kwet Jesu-akert.

⁴² Tjerrtj twernk arrpenh mapel Jesu renh nakek. Kenh inang itja ilelhek, inang renh nakemarl, artwang Pharisee mapel inenh *church*-eng alharlkwehetjeng. ⁴³ Twernk

§ 12:38 Isaiah 53.1 * 12:40 Isaiah 6.10

inartek angerr ahentj-anek, tjerrtj mapel inenhant naketjeh. Inang kwek war ahentj-anek, Altjerrel inenh naketjeh.

⁴⁴ Jesu-el inenh wentarel ilek, “Tjerrtj ngwenhel apek yengenh nakemarl, inang Altjerr renh nakem. Altjerr rang yengenh lanthek-arleng wart. ⁴⁵ Tjerrtj ngwenhel apek yengenh aremel alhengk-arem, inang Altjerr renh aremel alhengk-arem. Altjerr rang yengenh lanthek-arleng wart. ⁴⁶ Yeng ahelh nhenh-warn petjek, tjerrtj ingkerrekeh parrtj anetjeh. Lakenheng tjerrtj ngwenhel apek yengenh nakemarl, inang itja weth kwenyel-arteh anem.

⁴⁷ “Tjerrtj ngwenhel apek angketj tjengenh awemarl, inang angketj kwer itja kangkwerrem, thang inenh itja *judge-em-iletjenh*. Yeng kwenh petjek, tjerrtj ahelhareny map anetjeng twepeh-iletjeh. Yeng itja ahentjanem, inenh *judge-em-iletjenh*. ⁴⁸ Tjerrtj ngwenhel apek tjeng ahentj-kweny anemarl, inang angketj tjengenh itja nakem, inenh Altjerrel *judge-em-ilemel anpwetjenh arltang ingkernel*. ⁴⁹ Angketj tharl arrantherrenh ilem, itja angketj tjengenh anem. Angey rang yengenh arrehantherr-warn lanthekarl, rang yeng twernek, angketj nhenh arrantherrenh iletjeh. ⁵⁰ Yeng kaltj, angketj kwerenhel tjerrtj iteth-ilem, inang kwetant iteth anetjeh. Lakenheng thang angketj kwerenhant arrantherrenh ilem.”

13

Jesu-el kwertengerl kwerenh mapeh ingkang lhewek

¹ Arltang irlpangketj rang mpank anak. Arreny kwerenh Anper Alhekarl. Tjerrtj Jew map irlpangketjart, Altjerrel arrwekeleny map angek mer Egypt-eng.

Jesu kel kaltj anak, lyet-atheh war rang ahelh nhenheng Angey-warn alpetjeh-anngernt. Rang nakenh-nakenh kwerenh mapeh nyerrkek. Rang ineh kwet nyerrkek, rang ilwetjeh-atwetj.

² Angwerr-angwerr Jesu kwertengerl kwerenh mapakert arraw-irrek, mern arlkwetjeh. Arrentjel-artek arrwekel-antey Judas kel twernekarl, Judas-el Jesu renh artwang atwenh-atwenh mapeh anyenng-anyenngel anhetjeh-anngernt. Judas nheng rang Simon Iscariot-henh ler anak. ³ Jesu rang kaltj anak, Angeyelarl renh twer-ilek, rang twernk angerr tjerrtj kwerenh mapeh anetjeh. Rang kaltj anak, rang Altjerreng petjekarl, rang angkep Altjerr-warn alpetjenharl. ⁴ Inang mern arlkwetjam-rlwer, Jesu rang kemerremel mantarr kernpenh kwerenh rang rlwelhek. Rang towel inemel, kwere ayernelhek-amparr. ⁵ Rang kwatj rnwang-warn thelek, kwereng rang kwertengerl kwerenh mapeh nyentamnyent-henh ingkang lhewek, towel kwere rang ingkang inehenh arnngelhek.

⁶ Rang Simon Peter-henh ingkangeh lhewetjeh ahentj-irrek. Peter angkek, “Ngkartay, yeng ahentj-kweny, ntwang yeng ingkang lhewetjeh!”

⁷ Jesu-el renh ilek, “Ntwang lyet itja iterrem, thang ingkang ngkwengenh lhewetjeh. Kelant ntwang kaltj-irretjenh.”

⁸ Peter-el renh arnpakek, “Ntwang itja ingkang tjengenh lhewetjeh!”

Jesu-el renh ilek, “Thang apek ngwenh lhewetj-kweny, ntwang kwenh itja peltj tjengenh anetjenh!”

⁹ Peter kwer-warn angkek, “Ngkartay, itja ingkang tjeyenhant lhewetjeh, iltjang inngerr tjengenh-arlk lhewetjeh!”

¹⁰ Jesu-el renh ilek, “Tjerrtj ngwenh apek rang lhewel-hekarl, rang ulpert-kweny anem. Kel ingkang kwerenhant weth ulpert-irrem. Thang kwenh arrantherrenh kel lhewek. Arrantherr ulpert-kweny anem. Artwang nyent war ulpert-akert kwet anem.” ¹¹ Jesu rang kel kaltj anek artwang kwer, rang renh atwenh-atwenh mapeh anyenng-anyenngel anthetjeh-anngernt. Lakenheng rang ilek, “Artwang nyent war ulpert-akert kwet anem.”

¹² Jesu kel ingkang inehenh lhewekarl-penh, rang weth mantarr kern-penh kwerenheh irrpek. Rang arrernelhek, inenh pawenhek, “Wenheng thang ingkang arrehantherr-henh lhewek? ¹³ Arrantherr yengenh ilem, yeng kaltj-anthenh-anthenh anemeng, Ngkart thwen. Lakenh arrantherr arratj ilem. ¹⁴ Yeng kaltj-anthenh-anthenh arrehantherr-henh anem, Ngkart thwen. Thang ingkang arrehantherr-henh lhewek. Lakenheng arrantherr nyentam-nyentel arrpenh-henh ingkang lhewetjeh. ¹⁵ Yengarl arrehantherr mernelhekarl-arte, lakenh arrantherr tjerrtj arrpenheh mernelhetjeh. ¹⁶ Thang arrantherrenh nhenh arratj ilem, rrwapenh-apenh ngwenh apek inang itja twernk inehenheng angerr anem. Thang angketj arrpenh nhenh ilem. Urrpey ngwenh apek inang itja angerr anem, tjerrtj kwereng rang inenh lanthekarl. ¹⁷ Arrantherr angketj tjengenh kel awek. Arrantherr angketj tjengenh kangkwerrem apek, kwereng arrantherr arrken anetjenh.

*Jesu-el kwertengerl kwerenh map inenh arrwekel
ilek, kwertengerl nyentel renh artwang
atwenh-atwenh mapeh anthetjeheng*

¹⁸ “Yeng tjerrtj nyent-akert war angkem. Thang arrantherrenh alhengk-arem. Kenh arrehantherreng tjerrtj

nyent anetj anem. Rang yengenh atwenh-atwenh mapwarn anyenng-anyenngel anthetjenh. Rang yengenh atwenh-atwenh mapeh anthemarleng, angketj nhenh Altjerr-henh pipel-ayeng intemeng, arratjemeh irremel arlpaw-irretjenh, 'Artwang nyent rang nwernehel-ayeng mern arlkwem, rang kwenh tjengeng ntjwem-irrek.'

¹⁹ "Thang arrantherrenh nhenh arrwekel ilem, kwereeng nhenh arratj-irremarleng, arrantherr kaltj anetjenh, Altjerr-henh angketj nhenh tjeng-akert angkemeng, arrantherr yengenh naketjenheng. ²⁰ Angketj nhenh awerrerrang. Tjerrtj ngwenh apek urrpey tjengenheh kangkentj mernelhemeng, inang tjeng kangkentj mernelhem. Tjerrtj ngwenh apek tjeng kangkentj mernelhem, inartek Altjerr kwer kangkentj mernelhem. Altjerrel yengenh lantheek."

²¹ Jesu lakenh angkekarl-penh rang rrwampey awalhek. Rang inenh ilek, "Arratj anthwerr, kwertengerl nyentel yengenh atwenh-atwenh mapeh anyenng-anyenngel anthetjenh."

²² Kwertengerl inang ywarn iterremel, patemel arerrek. Inang pawenherrek, "Ngwenheh rang angkem?" ²³ Kwertengerl arrpenh kwerarl Jesu angerr nyerrkek, rang Jesu-eng rtwang anak. ²⁴ Simon Peter kwertengerl kwer iltjerrek, rang Jesu renh pawenhetjeh, "Ngwenheham ntwang angkem?"

²⁵ Kwertengerl rang Jesu-warn angath-irremel pawenhek, "Ngkartay! Ngwenheham ntwang angkem?"

²⁶ Jesu-el kwertengerl renh ilek, "Artwang kwerarl kwey thang mern ngkweltj nhenh ker kwatj arwek-wemel anthetjenharl, ntwang alhengk-aretjenh, artwang rangathew anem." Kwereng Jesu-el mern ngkweltj arwek-wemel Judas-eh anthek. Judas rang Simon Iscariot-henh

ler anak. ²⁷ Judas-el wart mern renh inek, kel arrentj rang kwer-warn irrpek.

Jesu-elemeh Judas renh ilek, “Wenh apek ntwang mpwaretjeh ahentj, kel alhang!” ²⁸ Kwertengerl map inang Jesu-henh angketj itja alhengk-arek. ²⁹ Judas-el nheng maney inehenh anyenetjart. Kwertengerl arrpenh map iterrek, Jesu-el kwel renh ilemeng, tjenkerreh mern in-etjeh. Kenh kwertengerl arrpenh map inang iterrek, rang kwel Judas renh lanthek, tjerrtj rnwanentj-kweny map ineh maney anthetjeh-anngernt. ³⁰ Judas-el mern ngkweltj renh inemel-arteh, rang keth-warn arratemel alhek. Kel kwenyemeh anak.

Mpwareng-areng lyeteny

(Matthew 26.33-35; Mark 14.29-31; Luke 22.33-34)

³¹ Judas kel alhekarl-rlwer, Jesu-el inenh ilek, “Lyet Altjerrel keth-ilem, Tjerrtj-henh Ler rang alker-areny anthwerr anemeng, twer angerr-akert. Ler nhenhel-arleng Altjerr rang mernelhem, rang alker-areny anthwerr anemeng, twer angerr-akert wart. ³² Ler nhenhel tjerrtj map mernem, Altjerr rang alker-areny anthwerr anemeng. Altjerrel tjerrtj map mernem, Ler rang alker-areny anthwerr anemeng, ngwenth-lkwer.

³³ “Kwer tjengenh mapay! Yeng kwek waremeh arrehantherrel-ayeng anetjenh. Kwereng arrantherr tjeng palenthwetjenh, arrantherr yengenh itja aretjenh. Thang nheng tjerrtj map ilekarl, thang nhenh arrantherrrenh weth ilem, ‘Yeng mer arrpenh-warn alhetjenh, arrantherr kwer-warn ywarn alhem.’

³⁴ “Thang arrantherrrenh mpwareng-areng lyetenyemeh ilem, yengarl arrehantherr nyerrkekarl-arteh, lakenh arrantherr ularrek-ularr nyerrkentj mernelhetjeh.

³⁵ Arrantherr ularrek-ularr nyerrkentj mernelhemeng,

lakenh tjerrtj ingkerrekel alhengk-aretjenh, arrantherr nakenh-nakenh tjengen anemeng.”

³⁶ Simon Peter-el Jesu renh pawenhek, “Ngkartay, nthenh-warnam ntwang alhetjenh?” Jesu-el renh ilek, “Mer kwer-warn yeng alhetjenh, ntwang lyet ywarn tjeng anharrel petjem. Kelant ntwang tjengel-ayeng anharrel petjetjenh.”

³⁷ Peter-el renh weth pawenhek, “Ngkartay, wenhen-garl yeng lyet ngkwengeng ywarn anharrel alhetjenh? Yeng kel ngkweng tjang-ilwemer!”

³⁸ Jesu-el Peter renh pawenhek, “Arratj key ntwang tjeng tjang-ilwetjenh? Peter-ay, arratj anthwerr, tjwek-tjwek rrwey rang arlketj-kwenyeng-antey, ntwang yengenh kel rrpwetj-ingar ywep-arrernetjenh.”

14

Jesu-el kwertengerl kwerenh map alngwelng-ilek

¹ Jesu-el kwertengerl kwerenh map ilek, “Arrantherr itja lharrp awelhetjeh. Altjerr renh nakewarrang, yeng thwen. ² Angey tjengenh-henh mer angerretj anthwerr. Yeng itja rrtjwerrem, yeng arratj angkem. Yeng alpetjenh, arrehantherr nyentam-nyenteh mer mpwaretjeh. ³ Kwer-penh yeng petj-alpetjenh, thang arrantherrenh ngwerl-alpetjenh. Arrantherr tjengel-ayeng kwet anetjenheng Angey tjengenh-henh merel. ⁴ Tjey rang Angey-henh mer-warn intnhem, kwer arrantherr kaltj.”

⁵ Kwertengerl nyent arreny kwerenh Thomas rang renh pawenhek, “Ngkartay, nwern-artek mer kwer akwen. Tjey nthenhelam nwern alhetjenh?”

⁶ Jesu ilelhek, “Yeng kwenh tjey rang anem. Thang angketj arratj ingkerrekeh kaltj-anthem. Thant tjerrtj inenh iteth-ilem, mwerr anetjeh. Tjeng-kwenyel tjerrtj inang Angey-warn ywarn alhem. ⁷ Arrantherr apek

yengenh arratj alhengk-arek-arleng, arrantherr kwenh Angey tjengenh alhengk-aretjeh. Lyet arrantherr kel kwer kaltjemeh anem, arrantherr renh kel arek-arleng wart.”

⁸ Kwertengerl arrpenhel arreny kwerenh Philip-el renh pawenhek, “Ngkartay, nwern ahentj-anem Angey renh aretjeh. Kel renhant nwerneh mernang, nwern kwer kangketjeh wart!”

⁹ Jesu-el renh ilek, “Philip-ay, yeng kwenh kwet anentjekarl arrehantherrel-ayel. Kenh ntwang yengenh itja alhengk-arem! Tjerrtj ngwenhel apek yengenh arekarl, inartek Angey renh arek. Wenheham ntwang yengenh pawnhem, thang Angey renh arrehantherr mernetjeh? ¹⁰ Wenhengam ntwang angketj tjeyenh itja nakem, yeng kwenh Angeyel-ayeng anem, Angey rang tjengel-ayeng anem, Angey ilernak kwenh nyent anem? Angketj tjengenh angketj kwerenh anem. Angey rang tjengel-ayeng arrehantherr-warn angkem. Lakenh ilernak pwert rrwapem. ¹¹ Angey rang tjengel-ayeng kwet anem, yeng kwerele-arleng kwet anem, Angey iler-nakemeh pwert anem, arrantherr angketj nhenh naketjehant. Itjeng apek, arrantherr rrwapentj tjengenh-penh irlpangkemel yengenh naketjeh. ¹² Arratj anthwerr, tjerrtj ngwenhel apek yengenh nakemeng, inang twerel mpwaretjeh, thang mpwarem-arteh. Inang twer angerr-akertel mpwaretjeh, yeng Angey tjengenh-warn alpemarl-rlwer. ¹³ Arrantherr apek yeng pawnhemeng arreny tjengenhel-ayeng, wenheh apek, thang arrehantherr mpwaretjenh. Lakenh thang tjerrtj ingkerrekeh mernetjenh, Angey tjengenh rang alker-areny anthwerr anemeng, twer angerr-akert. ¹⁴ Arrantherr apek arreny tjengenhel pawnhemeng, thang kel arrantherrenh awetjenh, thang lakenh arrehantherr mpwaretjenh.”

*Jesu-el inenh alhelek, Kwerrern Alngaltar
inew-warn lanthetjeh-annernt*

¹⁵ “Arrantherr apek tjeng nyerrkem, arrantherr tjeng kangkwerretjeh. ¹⁶ Thang Angey pawenhetjenh, rang Ilperrepwentj renh arrehantherr-warn lanthetjenheng, arrantherrenh arntarnt-aretjeh. Rang rlkwatherr arrehantherrel-ayeng kwet anetjenh. ¹⁷ Kwerrern nhenh rang arrehantherr arratj mernem. Tjerrtj ahelh-areny inang Kwerrern Alngaltar renh itja arem, inang akwen kwer anem. Lakenh inang Kwerrern kwer ahentj-kwenyarl anem. Arrantherr kenh kwer kaltjarl, rang arrehantherrel-ayeng kwet rlkwerrel anetjenh. ¹⁸ Yeng alpetjeh angkem. Thang arrantherrenh itja lhamp-arteh imperl-alhetjenh. Yeng weth arrehantherr-warn petj-alpetjenh. ¹⁹ Ngwenth war tjerrtj ahelh-areny mapel yengenh itja weth aretjenh. Arrantherr kenh yengenh weth aretjenh. Yeng iteth kwet anemeng, lakenheng arrantherr iteth kwet anem. ²⁰ Kelant arrantherr kaltj anetjenh, yeng Angeyel-arleng pwert kwet anemeng. Arrantherr kaltj anetjenh, arrantherr tjengel-ayeng kwet anem, yeng arrehantherrel-ayeng kwet anem. ²¹ Tjerrtj ngwenh apek tjeng nyerrkem, inang angketj tjengenheh kangkwerrem. Angey tjengenheh rang ineh nyerrketjenh. Yeng ineh nyerrkentj mernelhetjenh.” Lakenh Jesu-el inenh ilek.

²² Kwertengerl arrpenh anak, arreny kwerenh Judas. Itja Judas arrpenh nheng, rang Jesu atwenh-atwenh mapeh anthetjenharl, Judas nhenh mwerr. Judas-el Jesu renh pawenhek, “Ngkartay, nthakenharl ntwang nwernehant mernelhetjenh? Wenh-apert tjerrtj arrpenh mapeharl ntwang mernelhetj-kweny?”

²³ Jesu-el renh ilek, “Tjerrtj ngwenh apek tjeng nyerrkem, inang angketj tjengenheh kangkwerrem. Angey

tjengenh ineh nyerrketjenh. Kwereng Angey ilernak ineh-warn petjetjenh, inehel-ayeng kwet anerl-alpetjenh. ²⁴ Tjerrtj ngwenh apek tjeng itja nyerrkem, inang angketj tjengenheh itja kangkwerrem. Angketj arrantherrarl awem, rang itja angketj tjengenh anem. Nhenh-artek Angey-henh angketj anem, Angeyel yengenh lanthekarl.

²⁵ “Thang arrantherrenh nhenh ingkerrek ilek, yengarl arrehantherrel-ayeng anem-rlwer-antey. ²⁶ Angeyel lperrepwentj renhemeh tjeng-angkwerr arrehantherrenh lanthetjenh, Kwerrern Alngaltar renh. Rang arrantherrenh ingkerrek kaltj-anthetjenh. Rang arrantherrenh irlpangkelh-iletjenh, angketj ingkerrek thang arrantherrenh kel ilekarl. ²⁷ Thant kwenh arrantherrenh kel Altjerrel-ayeng peltj-ilek, arrantherrenh ngwerleny arrken kwet awelhetjenh. Lakenh arrantherrenh itja lharrp awelhetjenh, itja ater-irretjenh.

²⁸ “Thang nheng arrantherrenh arrwekel ilek, ‘Yeng alpetjenh, yeng weth petj-alpetjenh.’ Yeng Angey-warn-amparr alpem. Arrantherrenh apek tjeng arratj nyerrkemeng, arrantherrenh arrken awelhemer, yengarl angkep alpetjenharl Angey-warn. Angey rang tjengeng angerr anem. ²⁹ Thang arrantherrenh nhenh arrwekel war ilem, arrantherrenh yengenh naketjenheng. Kelant angketj nhenh arratj anthwerr-irremel arlpaw-irrekarl-penh, arrantherrenh lakenh angketjenh, ‘Angketj kwerenh kwenh kel arratj anthwerr!’ ³⁰ Yeng itja arrehantherrel-ayeng weth angerr angketjenh. Tjerrtj ahelh-areny map-henh twernk angerr, arrentj rang kwenh arrer-irrem. Rang yengenh ywarn twernem. ³¹ Tjerrtj ahelh-areny map kaltj anetjenheng, yeng Angey tjengenheh nyerrkemeng, yeng kwer kangkwerremeng. Mpa, nwern mer nhenheng arratemel kel alheyemeh.”

15

Angketj arnang grapes-akert

¹ “Yeng anem arnang *grapes* rang. Angey tjengenh arnang arntarnt-arenh-arenh anem. ² Arnang arntarlkw arpenh tjejenh map apek mern-kweny anemeng, Angeyel arntarlkw inenh akemel taly-wem. Arntarlkw tjengenh arrpenh map mern ngwerrm-akert anemeng, Angeyel arntarlkw kwek war akem, inang weth-antey mern-akert irretjenh. ³ Lakenh arrantherrenh Angeyel kwek war kek angketj tjengenhel-arleng, arrantherr alyelkemeh ulpert-kweny anetjeh. * ⁴ Arrantherr tjengel-arleng kwet anetjeh, kwereng yeng arrehantherrel-arleng kweteth anetjenh. Arnang inenh kek-arleng nthakenham inang mern lyapetjenh? Itja kwet. Arrantherr apek itja tjengel-arleng kwet anem, lakenh arrantherr ywarn mern anngang-akert-irrem.

⁵ “Yeng anem arnang *grapes* rang. Kenh arrantherr-artek arnang arntarlkw-arteh anem. Tjerrtj ngwenh apek inang tjengel-ayel kwet anem, yeng inehel-ayel kwet anem, inang mern angerr lyapelh-ilem. Tjengkwenyel apek arrantherr mern ywarn lyapelh-ilem. Lakenheng arrantherr itja mwerr mernelhem. ⁶ Tjerrtj ngwenh apek itja tjengel-ayel kwet anem, inang arntarlkw mern-kweny-artek anem. Angeyel inenh akemel taly-wetjenh, inang antjerrk-irretjenh. Kwereng tjerrtj inang arntarlkw antjerrk map kwetjemel taly-wetjenh rwang-warn. Tjerrtj lakenh nakentj-kweny antjerrk-irrem. ⁷ Arrantherr tjengel-ayel kwet anetjeh, arrantherr angketj tjengenhel kwet irlpangketjeh, kwereng arrantherr yengenh pawenhemeng, wenheh apek,

* **15:3 Keth-ilentj:** Altjerrel nwernenh arratj-ilem angketj kwerenhel-arleng, nwern alyelkemeh anetjek, arntarlkw mwerr-arteh anetjeh.

thang arrantherrenh kel awetjenh. ⁸ Arrantherr mern angerr lyapelh-ilem apek, lakenh-arte arrantherr arpenh mapeh mernelhetjeh, arrantherr nakenh-nakenh tjengenh anem. Arrantherr mwerr mernelhemeng, kel tjerrtj inang arrantherrenh aretjenh, inarlk lakenh angketjenh Angey nakemel, 'Angey rang alker-areny anthwerr anem, twer angerr-akert!'

⁹ "Yeng kwenh arrehantherr nyerrkem, Angey tjengenh tjeng nyerrkem-arte. Arrantherr itja tjeng-hetj ntjwem-irretjeh. Kwet tjengel-ayel anerrerray! ¹⁰ Yeng Angey tjengenheh kangkwerrek-arleng, lakenheng rang tjeng kwet nyerrkem. Lakenh-arte arrantherr tjeng kangkwerretjeh, yeng arrehantherr kwet nyerrkemarkeng. ¹¹ Thang arrantherrenh nhenh ilek, arrantherr anetjenh arrken anthwerr. ¹² Angketj nhenh thang arrehantherr arrernem: yeng arrehantherr nyerrkentj mernelhem, lakenh-antim arrantherr ularrek-ularr nyerrkentj mernelhetjeh. ¹³ Tjerrtj nyent ngwenh apek peltj kwerenheh tjang-ilwem, lakenh-arte tjerrtj rang kel mernelhem, rang peltj kwer angerr nyerrkem. † ¹⁴ Arrantherr tjeng kangkwerrem, lakenheng arrantherr kel peltj tjengenh map anem. ¹⁵ Thang arrantherrenh ilem rrwapenh-apenh-akert. Rrwapenh-apenh ngwenh apek inang itja twernk inehenheh iterentj alhengk-arem. Inang patem. Yeng itja twernk-arte anem arrehantherr. Angketj nheng Angeyel tjeng anthekarl-penh, lwerenh thang arrehantherr keth-ilemel ilek. Twernk mapel anewem inenh rrwapenh-apenh inehenharl kwel. Thang kenh arrantherrenh peltj map war anewem, itja rrwapenh-apenh anewetjeh. ¹⁶ Arrantherr tjeng itja ahentj-anem, yengarrp arrehantherr ahentj-

† 15:13 **Keth-ilentj:** Jesu iter-angkwerr kwewaleny war ilelhek.

anem. Thang arrantherrrenh ngakek, arrantherr mern angerr lyapelh-iletjeh. Mern inang kwet anetjenh, ywerretj-kweny anetjenh. Lakenh arrantherr mwerr mernelhetjeh, tjerrtj mapel alhengk-aretjeh, arrantherr kwenh Altjerr-henh anem. Kwereng arrantherr Angey tjengenh pawnhem arreny tjengenhel-ayeng, rang arrantherrrenh kel awetjenh. ¹⁷ Thang arrantherrrenh twernem, arrantherr ularrek-ularr nyerrkentj mernelhetjeh.

Tjerrtj map arrehantherr arnkely-irretjenh

¹⁸ “Tjerrtj map inang arrehantherr arnkely-irretjenh. Arrantherr irlpangketjeh, inang tjeng-amparr arnkely-irrekarl. ¹⁹ Arrantherr kwel peltj ineh anem, inang kel arrehantherr nyerrkemer. Arrantherr kenh itja peltj ineh anem. Thang arrantherrrenh ayerrp-ilek, peltj tjengenhemeh anetjeh. Lakenheng inang arrehantherr arnkely-irretjenh. ²⁰ Arrantherrremeh irlpangketjeh, thang nheng arrantherrrenh ilek, rrwapenh-apenh inang itja angerr anem. Twernk inehenhant angerr anem. Tjerrtj inang yengenh alwernekarl atwetjeh, lakenh inang kel arrantherrrenhemeh alwernemel atwetjenh. Tjerrtj arrpenh ngwenh apek tjeng kangkwerrem, lakenh inang arrehantherr kangkwerretjenh.

²¹ “Tjerrtj inang tjeng ahentj-kweny-irrek, lakenh inang arrehantherr ahentj-kweny-irretjenharlam, arrantherr tjengenh anemeng wart. Inang Angey kwer kaltj-kweny wart alartem. Angey rang yeng lanthekarl-arteh. ²² Yeng kel petjek, ineh-warn angkek. Inang anetj kwet wart anemeng, anetj anthwerr mpwarekarl. Lakenhmpernenh Altjerrel tjerrtj inenh anpwetjenh. ²³ Tjerrtj ngwenh apek inang tjeng arnkely-irrem, inang Angey

tjengenheh arnkely-irrem-arlk. ²⁴ Thang twerel mpwarek aningk-ingar tjerrtj mapeng anngetherr. Tjerrtj arrpenhel itja lakenh mpwarek. Tjerrtj inang yengenh arek. Inang tjeng Angey tjengenheh thwen arnkely kwet anem. Lakenheng inang anetj-akert kwet anem, inang nhenh map arek-arleng-artany. ²⁵ Lakenh angketj nhenh Altjerr-henh pipel-ayel intemeng arratj-irremel arlpaw-irrek, 'Tjerrtj inang tjeng pelkel war arnkely-irrek.'

²⁶ "Thang Ilperrepwentj nheng arrehantherr-warn lanthetjenh, Kwerrern Alngaltar renh. Rang ingkerrek arratj mernem Angeyeng. Rang Angeyeng petjemarleng, rang angketj tjeng-akert arrantherrenh iletjenh. ²⁷ Arrantherr kwenh tjengel-ayeng kwet anentjek-arleng, lakenheng arrantherr tjerrtj map tjeng-penh iletjenheng.

16

¹ "Thang arrantherrenh angketj angerrel ilek, arrantherr tjengehetj ntjwem-irrehetjeng. ² Tjerrtj inang arrantherrenh werlamparenyeng alwernemel alharlkwetjenh. Ngwenth war, tjerrtj map lakenh pal-pal iterretjenh, 'Ay! Jesu-henh nakenh-nakenh map anem anetj! Tjerrtj lakenh-lkweran irrernng atwetjeh! Lakenh Altjerr nwerneh nyerrkentj mernelhetjenheng.' ³ Wenheng inang lakenh mpwaretjenh? Inang Angey ilernehak akwen anemeng wart. ⁴ Thang arrantherrenh nhenh arrwekel war ilem, kelant arrantherr iterl-aretjenheng, thang arrantherrenh ilekarleh.

*Angketj Kwerrern Alngaltarek
rrkwapentj kwerenh-akert*

"Thang itja arrantherrenh arrwekel ilek, yeng arrehantherrel-ayeng anetjam-rlwer. ⁵ Yeng kel kwern warn alpetjenh, rang yengenh ahelh nhenh-warn lanthekarl-warn. Arrantherr yengenh itja pawenhek,

‘Nthenh-warn ntwang alpetjenh?’ ⁶ Yeng alpetjeh angkek-arleng, arrantherr tjeng lharrp awelhem. ⁷ Arratj anthwerr, angketj nhenh-artek mwerr arrehantherr anetjenh, yeng alpemarleng-rlwer. Yeng alpemarleng, thang Ilperrepwentj renh lanthetjenh arrehantherr-warn. Ilperrepwentj nhenh Kwerrern Alngaltar rang anem. ⁸ Kwerrern rang petjetjenh, rang tjerrtj ahelhareny map *judge-em-ilemel* iletjenh, inang anetj mernelhekarl. Rang inenh iletjenh, inang ularrek-ularr arratj mernelhetjeh. Rang inenh iletjenh, inang anetjakert kwet anek-arleng, Altjerrel inenh anpwetjenh. ⁹ Wenheng Kwerrern rang tjerrtj inenh iletjenh, inang anetjakert kwet anemeng? Inang yengenh itja nakekarleng. ¹⁰ Tjerrtj inang itja Altjerr arratj alhengk-arek. Lakenheng Kwerrern rang inenh iletjenh, inang itja arratj mernelhek. Tjerrtj inang arratjant alhengk-aremel mernelhetjeh. Yeng Angey-warn alpetjenh, arrantherremeh yengenh itja weth aretjenh. ¹¹ Altjerrel tjerrtj ahelhareny mapek-artwey kel alharlkwek. Tjerrtj mapel alhengk-aretj-kweny anem angketj nhenh-akert. Lakenheng Kwerrernel inenh *judge-em-ilemel* iletjenh, inang itja arratj anemeng.

¹² “Thang rrwem angketj arrpenh map, thang itja arrantherrenh ilem. Wenheng thang arrantherrenh iletj-kweny anem? Arrantherr angketj nhenh patetjenharl. ¹³ Kwerrern rang petjetjenh, rang arrantherrenh angketj tjengenh iletjenh, arrantherr wetham-weth kaltj-irretjenheng. Angketj kwerenh rang arratj anthwerr anetjenh. Kwerrern rang itja arrehantherr angketj kwerenharrp iletjenh. Angketj rang tjengeng awekarl, rang renh arrantherrenh iletjenh. Rang arrantherrenh ateng-iletjenh, nthakenh kelant anetjenharl, arrantherr kaltj anetjenheng. ¹⁴ Kwerrern rang arrantherrenh angketj

tjengenh iletjenh, lakenheng rang arrantherrenh mer-netjenh, yeng alker-areny anhwerr anemeng, arrantherr yengenh nyerrkemel naketjengheng. ¹⁵ Angey rang ingkerrekeh-artwey anem, rang ingkerrek twer kwerenhel rrwkem. Yeng Angey tjengenh-arteh anem, wenhwenh ingkerrekeh-artwey. Ilernak anem ingkerrekeh-artwey. Lakenheng thang arrantherrenh ilek, Kwerrern rang arrantherrenh angketj tjengenh iletjenh, arrantherr kaltj anetjengheng.

*Jesu-el kwertengerl kwerenh map ilek,
inang kwek war ltarrp anetjenh*

¹⁶ “Arltang rrpwetjeh-atwetj arrantherr yengenh itja weth aretjenh. Kwereng arltang rrpwetj arrpenh-penh arrantherr yengenh weth aretjenh.” ¹⁷ Inang awak-arlang, kwertengerl inang lakenh pawenherrek, “Wenhengam rang nheng nwerneh lakenh ilelhek, ‘Arltang rrpwetjeh-atwetj arrantherr yengenh itja weth aretjenh. Kwereng arltang rrpwetj-penhel arrantherr yengenh weth aretjenh.’? Wenhengam rang nheng nwerneh ilelhek, rang Angey-warn alpetjeh?” ¹⁸ Inang weth pawenherrek, “Wenham arltang rrpwetj inang? Nwern itja nhenh alhengk-arem.”

¹⁹ Jesu kaltj anak, inang ahentj-anek, renh pawenhetjeh. Lakenh rang inenh ilek, “Arrantherr kwenh pawenherrem, angketj nheng yengarl angkekarl-penheh, ‘Arltang rrpwetjeh-atwetj arrantherr yengenh itja weth aretjenh, kwereng arltang rrpwetj arrpenh-penh arrantherr yengenh weth aretjenh.’” ²⁰ Arratj anhwerr, arrantherr tjeng ltarrp-irremel arnetjenh, kenh tjerrtj ahelh-areny arrpenh map angketj tjeng-akert awemel arrken awelhetjenharl. Arrantherr kenh tjeng ltarrpel arnetjenh. Kelant Altjerrel arrantherrenh weth arrken-iletjenh. ²¹ Thang

ilem angketj kwer kwek-akert. Kwer kwek ngwerrm-irretjeh irremeng, arrwekel marl ngwenh apek inang irlkert awelhem. Kelant kwer kwek ngwerrm intemeng, lakenh-arteh marl inang kel arrken awelhem, kwer kwek inehenh ngwerrm-irrek-arleng wart. ²² Lakenh-arteh arrantherr lyet ltarrp anem. Kelant thang arrantherrenh weth aretjenh, kwereng arrantherr arrken anetjeheng. Arrpenhel itja arrken arrehantherr-henh Itwaketjenh. ²³ Arltang alenh kwerel arrantherr yengenh itja weth pawenhetjenh. Arratj anhwerr, arrantherr Angey pawenhetjeh wenheh apek, arreny tjeyenhel-ayeng, rang kel arrantherrenh awetjenh. ²⁴ Arrwekel arrantherr itja Angey renh pawenhek arreny tjengenhel-ayeng. Lyeteng renh pawenhay, kwereng rang arrantherrenh kel awetjenh. Lakenheng arrantherr arrken anetjenh.

²⁵ “Thang kwenh arrantherrenh angketj kwenameny* Angey-akert ilekarl. Kelant thang arrantherrenh Angey-akert keth anhwerr iletjenh. ²⁶ Kelant tjengan itja anetjenh, Angey renh pawenhetjenh arrehantherr. Arrantherrarrp renh pawenhetjenh arreny tjengenhel-ayeng. ²⁷ Thang arrantherrenh ilek, yeng Angey kwereng petjek-arleng wart. Arrantherr yengenh nakek-arleng, kwerpenh arrantherr tjeng nyerrkek. Lakenheng Angey rang arrehantherr nyerrkem. ²⁸ Yeng nheng Angeyeng ahelh nhenh-warn petjek. Lyet thang ahelh nhenh imperl-alhetjenhemeh, yeng Angey-warn angkep alpetjenh.” Lakenh Jesu ineh ilelhek.

²⁹ Kwertengerl inang renh ilek, “Lyet ntwang nwerneh kethemeh angkem. ³⁰ Nwern kel alhengk-arem, ntwang ingkerrekeh kaltj. Nwern ngwenh itja weth pawenhetjenh. Ntwang ilelhekarl, ntwang Altjerreng petjekarl,

* **16:25** Angketj kwenarl intem, arrpenh-arrpenh anhwerr.

nwern ngwenh nakem.”

³¹ Jesu-el inenh pawenhek, “Arratjam arrantherr yengenh nakem? ³² Ngwenth war arrantherr ingkerrek tjengeng ater irrarnp-irremel arrtjanetjenh, nyentam-nyent mer arrehantherr-henh-warn alpetjenh. Arrantherr yengenh nyent-areny imperl-alhetjenh. Yeng itja ingareny anetjenh, Angey rang wart tjengel-ayeng anemengemeh.

³³ “Thang arrantherrenh nhenh ilem, arrantherr angketj nhenh alhengk-aremeng, arrantherr arrken kwet anetjengheng. Tjerrtj ahelh-areny mapel arrantherrenh rwekenth-kenth-iletjenh. Arrantherr anew-anew kwet anetjeh. Thang angketj ahelh-areny ingkerrek kel rlpw-errkek.”

17

Jesu rang Angey kwer ilelhek

¹ Jesu kwertengerl kwerenh mapek angkekarl-penh rang alker-warn-atheh arek. Rang Altjerr pawenhek, “Angeyay, lyet kwenh tjengan anem, yeng ilwetjehemeh. Ntwang tjerrtj ingkerrek ineh mernang, Ler ngkwengenh alker-areny anhwerr anemeng. Kwereng Ler ngkwengenhel ngwenh tjerrtj ingkerrekeh mernetjengheng, ntwang alker-areny anhwerr anemeng, twer angerrakert. ² Ntwang kwenh Ler ngkwengenh ngkernek, tjerrtj ingkerrekeh-artwey anetjeh. Tjerrtj map ntwarl anthekarl, Lerel inenh iteth ngampekarl anyenetjenh. ³ Tjerrtj ngwenh apek kaltj anem angketj ngkwengenh, inang iteth ngampekarl anem. Ntwang Altjerr nyentant arratj anem. Ngkweng inang kaltj anem, tjeng thwen, Jesu Christ rang, ntwang ahelh nhenh-warn lanthekarl. ⁴ Yeng kel rrwapek ahelh nhenhel, ntwarl yengenh twernekarleng. Lakenh thang ngwenh tjerrtj

ingkerrekeh mernek, ntwang alker-areny anthwerr anemeng, twer angerr-akert. ⁵ Angey, ntwang yengenh weth alker-areny mpwaretjeh ngkwengel-arleng parrtj angerr-akert. Lakenh yengarl alker-areny kwet anentjekarl, parrtj angerr-akert, ilernak kwenh arrwekel alker-areny anak, ahelk nhenh-kwenyel-amparr.

*Jesu-el Angey pawenhek kwertengerl
araltj kwerenh mapehemeh*

⁶ “Tjerrtj ahelk-areny arrpenh mapeng ntwang tjerrtj nhenh map antheke, kwertengerl tjengenh anetjeh. Thang ineh ngwenh mernek. Kwertengerl inang ngkwengenh anak. Ntwang ineh tjeng antheke. Inang angketj ngkwengenh kangkwerrek. ⁷ Inang kel kaltj anem, angketj ingkerrek tharl ineh ilek, angketj rang ngkwengenh anem, ntwarl yeng ilekarl. ⁸ Thang ineh angketj ngkwengenh kaltj-antheke. Inang angketj ngkwengenh nakek. Inang kaltj, yeng ngkwengeng petjekarl, ntwarl yengenh ahelk nhenh-warn lanthekarl. ⁹ Lyet thang ngwenh kwertengerl ineh pawenhem. Itja tjerrtj ahelk-areny arrpenh mapeh, kwertengerl nhenh mapehant, ntwarl tjeng antheke. Inang kwenh ngkwengenharl anem. ¹⁰ Tjerrtj tjengenh map ngkwengenh anem. Tjerrtj ngkwengenh map tjengenh anem. Tjerrtj nhenh inang kwenh yengenh tjerrtj arrpenh mapeh mernek, yeng alker-areny anthwerr anemeng. ¹¹ Yeng kwenh ngkweng-warn angkep alpetjenh, yeng itja weth ahelk nhenhel anetjenh. Inang kenh ahelk nhenhel antarl-irretjenharl. Angey Kangkentjay, ntwarrp ineh arntarnt-arang twer ngkwengenh-akertel. Twer ngkwengenh arreny ngkwengenhel-arleng intem. Ntwang arreny yanh-arteharlam tjeng-arlk antheke. Ntwang ineh anetjeng arntarnt-arang, inang kel nyent anetjenheng,

ilernakarl nyent anem-arteh. ¹² Yeng inehel-arleng anemarleng, thang inenh arntarnt-arek, ntwang wart yengenh twer-ilekarl. Twer nhenh arreny ngkwengenhel-arleng kwet intem. Thang inenh arntarnt-arek-arleng, thang itja tjerrtj nyent parlp-ilek. Artwang nyent nhengant thang parlp-ilek, rang ngkwengeng ntjwem-irrekarl. Rant parlp-irrekan, kweran anek-arleng wart. Lakenh angketj nheng Altjerr-henh pipel-arleng arratj anthwerr-irremel arlpaw-irrek.

¹³ “Angeyay, yeng lyet ngkweng-warn alpetjenh. Yeng nhenh kwertengerl tjengenh map-warn angkem, yeng ahelhel anemarl-rlwer. Yeng ineh-warn angkem, inang arrken anetjenheng, yengarl arrken anem-arteh. ¹⁴ Thang inenh angketj ngkwengenh ilek. Inang itja tjerrtj ahelh-areny arrpenh map-arteh iterrem, inang yeng-arteh iterretjeh. Lakenh tjerrtj ahelh-areny arrpenh map arnkely anem ineh. ¹⁵ Thang itja ngwenh pawnhem, inenh ahelh nhenheng inerl-alhetjeh, itja. Thang ngwenh pawnhem, ntwang inenh arrentjeng arntarnt-aretjehant. ¹⁶ Inang itja ahelh-areny, inang yeng-arteh iterrem. Yeng alker-arenyarl anem. ¹⁷ Angketj ngkwengenh kwenh arratj anem. Kwertengerl inenh twer-ilang angketj ngkwengenhel-arleng, inang ngkweng arratj rrwapetjenheng kweteth. ¹⁸ Ntwang yengenh tjerrtj ahelh-areny map-warn lanthek-arteh, lakenh thang inenh tjerrtj ahelh-areny map-warn lanthamarlam. ¹⁹ Yeng ngkweng kwet iterremel ngkwengant kangkwerrem. Yeng kel iteth tjengenh mentj anthelhek, tjerrtj inang ngkwengenh anetjeh-anngernt. Ntwang inenh kaltj-anthang, inang ngkweng kwet iterretjeh, ngkwengant kangkwerretjeh, ngkwengenh anetjenheng.”

*Jesu-el pawenhek tjerrtj nakenh-nakenh
arrpenh mapek, ingkerneny mapeh-arlk*

²⁰ “Angey, thang lyet nakenh-nakenh arrpenh mapeh-arlk ngwenh pawenhem, inang yengenh kelant naketjenharl, angketj mwerr awemel. ²¹ Yeng ahentj, inang ingkerrek nyent anetjeh, awelhentj nyent, iterrentj nyent, angketj nyent. Angey, ntwang tjengel-ayeng kwet anem-arteh, yeng ngkwengel-ayeng kwet anemeng-arteh. Yeng ahentj, inang ilernakel-ayeng kwet anetjeh. Kwereng tjerrtj ahelh-areny mapel alhengk-aretjenh, ntwarl yengenh ahelh-warn lanthekarl. ²² Ntwang yengenh ilek, yeng alker-areny anthwerr anemeng, twer angerr-akert. Lakenh-arteh thang inenh ilek, inang alker-areny anthwerr anem, twer angerr-akert, inang nyent anetjenheng, ilernan nyent kwet anem-arteh. ²³ Yeng inehel-ayeng kwet anem, ntwarl tjengel-ayeng kwet anem-arteh. Lakenh inang ingkerrek nyent anetjenh, awelhentj nyent, iterrentj nyent, angketj nyent. Kwereng tjerrtj ahelh-areny map kaltj anetjenh, ntwarl yengenh ahelh-warn lanthekarl. Inang kaltj anetjenh, ntwarl ineh nyerrkem, ntwarl tjeng nyerrkem-arteh.

²⁴ “Angeyay, ntwang tjeng nakenh-nakenh map antheh. Yeng ahentj-anem, inang ingkerrek tjengel-ayeng anetjeh, mer kwerel yengarl anetjenh. Inang aretjenharl, yeng alker-areny anthwerr anemeng, parrtj angerr-akert. Angeyay, ntwang kwenh tjeng nyerrkek ahelh nhenh-kwenyel-amparr. ²⁵ Angey arratjay, tjerrtj ahelh-areny map kwenh itja ngkweng kaltj. Yengant ngkweng kaltj, thant ngwenh alhengk-arem. Kwertengerl nhenh map kaltj, ntwang yengenh ahelh-warn lanthekarleh. ²⁶ Thang inenh kel ngkweng-penh kaltj-antheh, thang inenh weth kaltj-anthetjenh. Kwereng inang nyerrkentj mernelhetjenheng, ntwarl tjeng nyerrkentj mernelhemarl-arteh.

Yengemeh inehel-ayeng kwet anetjenheng.”

18

Atwenh-atwenh mapel Jesu renh antwerrkek

(Matthew 26.47-56; Mark 14.43-50; Luke 22.47-53)

¹ Jesu rang Altjerrek angkekarl-penh, rang kwertengerl kwerenh map-akert alhekemeh. Mer rrpwang kwereng inang anarnpenhewarrek kwenelak, intjer-warn-atheh anarnpenhek. Intjer rang arreny Kidron Valley. Kwereng inang kern-atheh weth antjenhek, rrpwang arrpenh-warnemeh antjenhek. Inang lywang-warn alhek arnang *olive* map-warn.

² Kwertengerl nyent nheng Judas rang kelant Jesu renh atwenh-atwenh mapeh anthetjenh. Judas kaltj anak, Jesu rartek lywang kwer-warn alhetjart, kwertengerl kwerenh map-akert. ³ Kel Judas rang lywang nhenh kwer-warn alhek, atwenh-atwenh map-akert rrkwentj map-akert thwen. Rrkwentj inenh *priest* twernk mapel lanthekarl, artwang Pharisee mapel thwen. Inang Jesu kwer ankang petjek rwang alngenth-akert arrawey-akert thwen.

⁴ Jesu rang kel kaltj anak, inang renh antwerrket-jenharl, kelant inang renh atwetjenh-ark. Rang ineh-warn arnek-arner alhek. Rang inenh pawenhek, “Ngwenheham arrantherr palenthwem?”

⁵ Inang renh ilek, “Jesu Nazareth-areny kwer.”

Jesu rang ilelhek, “Yeng kwenh!” Judas rang inehel-ayeng rtwang irnek. ⁶ Jesu ineh ilelhek-arleng, atwenh-atwenh arrpenh map tjenelhemel ahelh-warn anyerl-alhek, kwerrern-kweny.

⁷ Jesu-el inenh weth pawenhek, “Ngwenheham arrantherr palenthwem?”

Inang renh ilek, “Nwern palenthwem Jesu Nazareth-areny kwer.”

⁸ Jesu-el inenh tjerneke, “Thang nheng arrantherrenh kel ilek, ‘Yeng kwenh.’ Arrantherr tjeng wart palenthwem, arpenh nhenh map kel imperrerrang.”

⁹ Lakenheng angketj nhenh arratj-irremel arlpaw-irrek rang arrwekel-antey angkek, “Tjerrtj map ntwarl tjeng anthe Karl arntarnt-aretjeh, thang nyent itja parlp-ilek.”

¹⁰ Kwer-penh Simon Peter-el *knife* alkey kwerenh rlpwentjek. Rang artwang nyent irlpang kwerenh rlweth-akek. Artwang rang *priest* twernk angerr-kenh rrwapenh-apenh anek, arreny kwerenh anek Malchus.

¹¹ Jesu-el Peter arnpakek, “*Knife* alkey angkep arrernang! Tjengan anem, irlkert angerr inetjenh, Angey tjengenhel yeng twernekarl wart.”

Atwenh-atwenh mapel Jesu renh antwerrkek

(Matthew 26.57,58; Mark 14.53,54; Luke 22.54)

¹² Kwereng atwenh-atwenh mapel twernk inehenhel-ark tjerrtj Jew rrwentj mapel-ark inang Jesu renh antwerrkemel *rope*-el ayernek. ¹³ Inang Jesu renh Annas-warnek-amparr angerrerreke. Annas rartek Caiaphas-kenh rtwaltj anek. Caiaphas rang *year* nhenh kwerel *priest* twernk angerr anek. ¹⁴ Caiaphas nheng rang tjerrtj Jew map inenh arrwekel ilekarl, “Nhenh mwerr kwenh tjerrtj nyent nwerneh tjang-ilwetjeh.”

Peter rang ilelhek, “Yeng-artek Jesu kwer akwen.”

(Matthew 26.69,70; Mark 14.66-68; Luke 22.55-57)

¹⁵ Rrwentj mapel Jesu renh angek-arleng, Simon Peter kwertengerl nyent arpenh thwen ratherr ingkerneng alherrek. *Priest* twernk angerr rang kwertengerl arpenh nhenh kwer kaltj anek. Kwertengerl nhenh rang Jesu-eng ingkern-angkwerr *priest* twernk angerr-henh *yard*-warn irrpenhek. ¹⁶ Peter rang arreweng rtwang anek, *yard*-eng kethel. Kwertengerl arpenh nheng rang weth arratek,

Peter renh ngwetjeh *yard-warn* kwen. Rang marl renh pawenhek, rang arrew renh arntarnt-aretjart. Kwereng kwertengerl ratherr *yard-warn* kwen irrpentjek.

¹⁷ Marl rang Peter renh alhengk-aremel pawenhek, “Ntwang key artwang nheng-henh kwertengerl anem?”

Peter-el renh ilek, “Yeng itja.”

¹⁸ *Yard* kwenel rwang ampetjam nywateyeng wart. Rrkwapenh-apenh map rrkwentj map thwen inang rwang kwerel ntjwetj-irretjam. Peter rang petjemel rwang iter kwerel irnemel ntjwetj-irretjam.

Priest twernk angerrrel Jesu renh pawenhek

(Matthew 26.59-66; Mark 14.55-64; Luke 22.66-71)

¹⁹ *Priest twernk angerr* Annas rang Jesu renh pawenhek, “Ngwenh kwertengerl ngkwengenh map? Nthakenham ntwang inenh kaltj-anthem?”

²⁰ Jesu-el renh tjernemel ilek, “Thang kwenh tjerrtj map alngetherr kaltj-anthem. Thang kweteth *church* kwek mapel kaltj-anthetjam, *church* angerrretj nyentel thwen, keth nheng tjerrtj Jew map arraw-irretjartarl kwerel thwen. Thang itja kwet tjerrtj map anyenng-anyenngel kaltj-anthek. Alngetherr kwet. ²¹ Wenheng ntwang yengenh pawenhem lakenh, ‘Nthakenham ntwang tjerrtj map kaltj-anthem?’ Tjerrtj inenh pawenhang, inang yengenh awetjartarl, tharl inenh kaltj-anthetjam-penh. Inang kwenh angketj tjengenhheh kaltj anem.” Lakenh Jesu-el renh ilek.

²² Rrkwentj nyent Jesu-eng iterel irnetjam. Jesu rang ilelhek-arleng, rang renh rlkey atwek. Rang Jesu renh ilek, “Ntwang itja *priest twernk angerr-warn* lakenh angketjeh!”

²³ Jesu-el rrkwentj renh ilek, “Yeng apek pal angkek-arleng, yengenh ilay! Yeng apek arratj angkek-arleng,

wenheharlam ntwang yeng atwekan?” ²⁴ Annas-el Jesu renh *priest* twernk angerr Caiaphas-warn lanthek. Inang itja rope kwereng rlwek.

Peter rang weth ywep-arrernemel ilelhek,
 “Yeng itja kaltj kwer.”

(Matthew 26.71-75; Mark 14.69-72; Luke 22.58-62)

²⁵ Simon Peter rwang iterel irnemel ntjwetj-irretjam. Arrpenhel renh pawenhek, “Ntwang key artwang nheng-henh kwertengerl anem?”

Peter rang weth ywep-arrernelhek, “Yeng itja kaltj kwer!”

²⁶ *Priest* twernk-henh rrkwapenh-apenh arrpenh anek. Artwang peltj kwerenh artwang nheng anek, Peter-el nheng irlpang kwerenh rlweth-akekarl. Artwang rang Peter-ek ilemel irlpangkek, “Thang ngwenh arek, kwerel-ayeng irnerleh lywang nhengell!” ²⁷ Peter weth ywep-arrernelhek. Kel tjwek-tjwek rrweyemeh arlkek.

Pontius Pilate-el Jesu renh pawenhek

(Matthew 27.1,2,11-14; Mark 15.1-5; Luke 23.1-5)

²⁸ Kel kweny-rtweh anek. Inang Jesu renh Caiaphas-henh warleng weth angek twernk Rome-areny angerr-henh warl-warn. Tjerrtj Jew twernk map inang itja warl angerr-warn kwen irrpek, inang kethel irnek. Inang lakenh angkek, “Nwern akethel irnetjeh, tjenkerr ingkernant arlkwetjeh-anngernt.” Tjenkerr arreny kwereh “Anper Alhekarl”. Inang iterrek inang ulpert-ilelhehetjeng. * ²⁹ Lakenheng twernk angerr rang ineh-warn arratemel alhek. Arreny kwereh Pilate. Rang in-

* **18:28 Keth-ilentj:** Inehenh mpwareng-areng-angkwerr, inang itja mer lwereny-henh irrpetjart, ulpert-ilelhehetj. Inang ahentj-anek, ulpert-kwenh mern tjenkerr arlkwetjeh.

enh pawenhek, “Wenhengam arrantherr artwang nhenh angetjewarrek? Wenh anetj rang mpwarek?”

³⁰ Inang renh tjerneke, “Rang kwenh artwang anetj. Rang apek artwang mwerr anek-arleng, nwern renh itja ngkweng-warn angetjemer. Itja kwetarl.”

³¹ Pilate-el inenh ilek, “Kel arrantherrarrp court arrehantherrel-ayeng renh pawenherrerrang, mpwareng-areng arrehantherr-henh-angkwerr.”

Tjerrtj inang renh ilek, “Nwern ahentj, renh atwetjeh. Kenh nwernehan itja anem, tjerrtj renh irrernng atwetjeh, ntwerlkeh arrernetjeh apek. Lakenh.” ³² Jesu-el arrwekel-antey kwertengerl kwerenh mapek angketj ilek, nthakenh rang ilwetjenharl. Angketj nhenh arratjemeh arlpaw-irrek.

³³ Pilate rang warl angerr-warn kwen weth angkep irrpenhek. Kwereng rang Jesu renh weth ngwerl-alhek. Rang renh pawenhek, “Arratj key ntwang tjerrtj Jew map-henh *king* anem?”

³⁴ Jesu-el renh tjerneke, “Ntwarrp key lakenh iterremel yengenh pawnhem? Itjeng apek, ngwenhelam ngwenh ilek?”

³⁵ Pilate rang renh ilek, “Yeng itjam tjerrtj Jew anem! Tjerrtj ngkwengenh mapel *priest* twernk mapel-arlk inang ngwenh tjeng anthekarl. Wenh-penharlam inang ngwenh nhenh-warn angetjewarrek?”

³⁶ Jesu kwer ilelhek, “Yeng apek ahelh nhenhel *king* anek-arleng, tjerrtj tjengenh map tjeng-arrngel atwerremer, twernk map inenh arnpaketjeh, twernk mapel yengenh antwerrkehetj. Itja kwet, yeng mer arpenhel *king* anem.”

³⁷ Pilate-el renh pawenhek, “Arratjam ntwang *king* anem?”

Jesu-el renh ilek, “Ntwang arratj angkek, yeng *king* rang anem. Yeng-artek ahelh nhenhel kwer ngwerrm-irrekarl, thang tjerrtj ingkerrekeh angketj arratj renh iletjeh. Tjerrtj ngwenh apek ahentj-anem, angketj arratj renh awetjeh, tjerrtj inang tjeng kangkwerrem.”

³⁸ Pilate-el Jesu renh pawenhek, “Nthenham angketj arratj?”

Pilate rang weth warl angerr kwerenheng arratemel alhek. Rang tjerrtj map ilek, “Thang artwang nhenh renh pawenhek, rang itja merrentj anem. ³⁹ Tjenkerr arltangel thang kweteth artwang tjayel-areny nyent war arrehanherr arratelh-ilem. Wenhek arranherr ahentj-anem? *King* arrehanherr-henh key thang arratelh-ilemel lanthetjeh?”

⁴⁰ Inang arnterrel arlkemel ilek, “Itja renh! Barabbas renh-atwetj anhang!” Barabbas rartek artwang merrentj anak, atwenh-atwenh. Rang *Government* mapel-ayeng atwerretjart, itja ineh kangkwerretjart. Lakenheng Rome-areny inang renh arrwekel tjayel-warn kwernek.

19

Pilate-el atwenh-atwenh map ilek, Jesu renh ntwerlkeh arrernetjeh-anngernt

(Matthew 27.27-31; Mark 15.16-20)

¹ Pilate-el atwenh-atwenh kwerenh map twernek, inang Jesu renh *whip*-el atwetjeh. ² Atwenh-atwenh inang irketj mpwarek lyek apapeth-akert, kapert kwerenheh arrernetjeh. Inang rnwanentj athethek alkeyeh renh irrpelh-ilek, arrkentj-ilemel rang *king*-arrpantey. ³ Kwereng inang kwer-warn itwek-irrek, inang renh arrkentj-ilek, “Nthakenhay? *King* tjerrtj Jew map-henh key?” Inang renh rlkey atwek.

⁴ Pilate weth warl angerr kwerenheng arratetj-alhek tjerrtj twernk map-warn. Rang inenh ilek, “Thang renh weth arrehantherr mernetjenh, arrantherr kaltj anetjenheng, yeng iterrem, rang itja merrentj anem.” ⁵ Jesu keth-warn arratek, irrketj lyek apapeth kapertel-ayelakert mantarr athethek alkey nheng-akert. Pilate-el inenh ilek, “Artwang renh arerrerrang!” ⁶ Priest twernk mapel priest-henh rrwapenh-apenh mapel-ark renh arek-arleng, inang arlkemel ilek, “Renh ntwerlk-arleh arrernewarrang! Renh ntwerlk-arleh arrernewarrang!”

Kwer-penh Pilate-el inenh ilek, “Arrantherrarrp renh ntwerlkeh arrernewarrang. Tjengeng ularr rang itja merrentj anem.”

⁷ Tjerrtj twernk mapel renh ilek, “Nwern mwekeny-irrem kwer. Rang ilelhek, rang kwel Altjerr-henh Ler anemeng. Rang lakenh ilelhek-arleng, rang Altjerr renh arrampewek. Rang mpwareng-areng nwern-henheh itja kangkwerrek, lakenheng nwern renh irrerngant atwetjenh.”

⁸ Pilate-el nhenh lakenh awemel ater-irrek. ⁹ Rang weth warl angerr-warn kwen irrpenhek. Rang Jesu renh pawenhek, “Mer nthenh-arenyam ntwang?” Jesu rang intert kwet irnek, rang itja renh tjerne. ¹⁰ Pilate-el renh weth pawenhek, “Wenhengarl ntwang tjernetj-kweny anem? Ntwang key itjam kaltj, thang ngwenh apek mer-warn lanthehetj? Ntwerlk-warn apek ngwenh arrernehhetj? Nthakenh ntwang iterrem?”

¹¹ Jesu-el renh tjerne, “Altjerrel ngwenh ngkerne, *judge* tjengan anetjeh, yeng atwetjeh apek. Itjeng apek itjarl. Tjerrtj ngwenhel apek yengenh lanthekarl ngkwengwarn, kenh tjerrtj rang ngkwengeng anetj-lkwer anem.”

¹² Kwereng Pilate ahentj-anek, Jesu renh lanthemel arratelh-iletjeh. Tjerrtj twernk map kwet arlkemel ilek,

“Ntwang apek artwang nhenh renh lanthemel arratelh-ilem, ntwang itja Rome-areny twernk angerr Caesar-henh peltj anetjenh! Artwang rang ilelhem, rang kwel *king* anemeng. Rang lakenh ilelhemeng, rang kel Caesar-ek kangkwerrenh-rrenh itja anem!”

¹³ Kwereng Pilate rang Jesu renh weth warl angerr kwereng arratelh-ilek. Rang *judge*-henh *chair*-eh arrernelhek. *Chair* kwerel-ayeng arrwekel tjertj inang ahernel arrernelhek. Mer rang arreny Irntangerr. Angketj *Hebrew*-el inang mer nhenh iletjart Gabbatha. ¹⁴ Nhenh kwenh arltang rang anak, kwerelarl tjertj Jew mapel tjenkerr mpwaretjart, arlkwetjeh-anngerntel. Inang arltang arrpenhel arlkwetjeh-anngerntel. Tjenkerr renh inang anewem Anper Alhekarl. Kel twern irntarel anak. Pilate-el tjertj twernk map ilek, “*King* arrehantherr-henh arerrerrang!”

¹⁵ Inang kwet arlkemel ilek, “Renh angerrerrang! Renh angerrerrang! Renh ntwerlkeh arrernewarrang!”

Pilate rang pawenhek, “Arrantherr ahentj-anem kwey, thang *king* arrehantherr-henh ntwerlkeh arrernetjeh?”

Priest twernk mapel kwer pwer anemel renh ilek, “Twernk angerr Caesar-ant nweren-henh *king* anem!”

¹⁶ Kwereng Pilate-el Jesu renh atwenh-atwenh mapehemeh antheke, inang renh ntwerlkeh arrernetjeh-anngerntel.

Inang Jesu renh ntwerlkeh arrernewarrek

(Matthew 27.32-44; Mark 15.21-32; Luke 23.26-43)

Atwenh-atwenh mapel Jesu renh antwerrkemel angerrerek. ¹⁷ Jesu rang ntwerlk kwewaleny angerl-apatjam Kapert Ngkwern-henh mer-warn. Mer inang iletjart

Hebrew-henh angketjel arreny Golgotha. ¹⁸ Mer Golgotha-el atwenh-atwenh mapel renh *nail*-el tanthemel ntwerlkeh arrernewarrek. Kwer-angkwerr inang arrernewarrek artwang atherremeh wetharlam ntwerlkeh, kwereng iterel akalk atherr. Jesu-eng itepelant atherr ntwerlkeh arrernewarrek, kenh Jesu rang mpwepelarl.

¹⁹⁻²⁰ Pilate-el artwang arpenh arrwekel kwet ilek, rang angketj kwek war tanthetjeh arnang kwek-arleh, tjerrtjel alhengk-aretjeh. Angketj yanh kwenh intek lakenh, “Jesu Nazareth-areny rang tjerrtj Jew map-henh *king* rang anem.” Angketj rrpwetjel rang tanthekarl, angketj *Hebrew*-el angketj *Latin*-el angketj *Greek*-el thwen. Inang arnang kwekel-ayeng ampek-arrernek ntwerlkeh kaperteng kern. Mer Golgotha rartek Jerusalem-eng kethel anek, ntware-kweny war anek. Tjerrtj map angketj nhenh *read*-irremel arek. ²¹ Lakenheng *priest* twernk inang Pilate-warn alhemel, inang Pilate kwer mwekeny-irrek, “Wenhekarlam lakenh arreny ntwang tanthek? Ntwang arreny Jew map-henh *king* arrernekarl! Nwern mwekeny-irrem lakenh angketj ntwang tanthek-arleh! Ntwang angketj arpenh-lkwer arrernemer, ‘Rang ilelhek, rang kwel tjerrtj Jew map-henh *king* rang anemeng.’”

²² Pilate-el inenh ilek, “Angketj nheng thang tanthekarl, itja arranherr angart-wetjeh!”

²³ Atwenh-atwenh artwang atherram-atherr Jesu renh ntwerlkeh arrernekarl-penh, inang mantarr Jesu-henh kwereng rlwek. Mantarr arpenh map inang irrarnpelh-ilek nyentam-nyenteh. Mantarr arpenh nyent anek, arterrp alkey kwet.

²⁴ Inang angkerrek, “Nwern itja kwet mantarr nhenh tjep-aketjeh. Rang mwerr anhwerr. Nwern kwer kel kartengant arrken-irreyay!” Atwenh-atwenh inang mantarr kwer arrken-irrek.

Angketj nhenh Altjerr-henh pipel-ayeng intekarl,
 “Inang mantarr tjengenh nyentam-nyenteh irrarnpelh-
 ilemel
 antherrek.
 Lwerenh-penh inang mantarr tjengenh arrpenh arrkenel
 anthe Karl.” *

Angketj nhenh arratj-irremel arlpaw-irrek.

²⁵ Marl map angath irnetjam. Marl nyent anek mwek
 Jesu-ek-artwey, arreny kwerenh anek Mary. Kenh marl
 arrpenh irnetjam tjeyarl Mary-kenh. Mary marl arrpenh
 irnetjam Clopas-kenh anew. Marl arrpenhemeh irnetjam
 Mary Magdalene-ark inehel-ayel. ²⁶ Jesu-el matj kw-
 erenh arek, kwertengerl kwerenh nyent thwen irnetja-
 marl. Kwertengerl nheng kwer rang nyerrketjart angerr.
 Rang matj kwerenh ilek, “Artwang nhenhemeh kel amp-
 engkw ngkwengenh aney!” ²⁷ Jesu-el kwertengerl renh
 ilek, “Artwangay! Rang mwekemeh ngkwengenh aney!
 Ntwang renh arntarnt-aretjehemeh.” Kelant kwertengerl
 rang marl renh warl kwerenh-warn anginek, renh matj
 kwerenh-arteh arntarnt-aretjeheng.

Jesu ilwek

(Matthew 27.45-56; Mark 15.33-41; Luke 23.44-49)

²⁸ Jesu rang kaltj anek, rrwapentj kwerenh kel ywer-
 rekemeh. Angey kwerenhel anthe Karl rrwapentj kwer
 mpwaretjeh. Jesu rang angkek, “Yeng angkethelemeh
 anem.” Rang lakenh angkemel, angketj arrpenh Altjerr-
 henh pipel-arleng intemarl angketj rang arratj-irremel
 arlpaw-irrek. ²⁹ Wine tjekert rang tjampetel-ayeng irnek.
 Tjerrtj nyentel mantarr kwek inek, mantarr wine kwer-
 warn arrernemel arwek-wek. Kwereng rang mantarr
 kwek arnang alkey-warn ayernek. Kwereng rang arnang
 mantarr-akert renh angek Jesu kwer-warn. Rang arnang

* 19:24 Psalms 22.18

renh kern-ilek Jesu-warn, rang kwer antheke antjwetjeh.
³⁰ Jesu-el *wine* renh antjwekarl-penh rang angkek, “Thang kel rrwapentj tjengenh ywerrelh-ilek!” Kwereng rang kapert kwen-irremel kel ilwekemeh.

³¹ Nhenh kel arltang rang tjerrtj Jew mapeh anek, tjenkerr renh inang mpwaretjart arrwekel-arrwekel arlkwetjeh-anngernt. Tjerrtj inang angkerrek, “Ngwenth kwenh Saturday arltang rang anetjenh, arltang tjeperr anthwerr. Nhenh itja arratj anem, artwang inehenh mpwerrk ntwerlkel arlpar-irnetjeh. Arrwekel-arrwekel artwang inehenh mpwerrk anarnpelh-iletjeh!” Lakenh kwereng tjerrtj inang Pilate pawenhek, “Artwang nhak map ngkwern lyweper rltwakang, inang parrp ilwetjeh. Mpwerrk inehenh ntwerlkeng anarnpelh-iletjeh-anngernt.” Pilate rang ineh kangkwerrek.

³² Kwereng atwenh-atwenh mapel artwang atherr-henh lyweper ngkwern ltwakek, ratherr parrp ilwetjeheng.

³³ Kwereng inang Jesu-warn alhek. Inang renh arek, rang kel ilwekarl. Lakenheng inang ngkwern kwerenh itja ltwakek.

³⁴ Atwenh-atwenh nyentel irrtjartel Jesu-henh ltwang tanthemel altjwer-ilek. Kel alhwang kwatj thwen thelelhek. ³⁵ Thang anngetherr nhenh arek, irrtjartelarl renh tanthek. Thang arrantherrenh ilem, angketj nhenh arratj, arrantherremeh angketj nhenh naketjeheng.

³⁶ Angketj nhenh intem arrwekel arrernekarl-penh Altjerr-henh pipel-ayeng, “Inang itja ngkwern nyent kwerenh ltwaketjenh.” Angketj nhenh arratj-irremel arlpaw-irrekemeh. ³⁷ Angketj arrpenh arrwekel arrernekarl-penh Altjerr-henh pipel-ayeng intem, “Inang renh tanthetjenharl, kenh tjerrtj arrpenh map inang alhem renh aretjeh war.” Angketj nhenh arratj-irremel arlpaw-irrek.

*Inang Jesu-henh mpwerrk intey-warn kwernek
(Matthew 27.57-61; Mark 15.42-47; Luke 23.50-56)*

³⁸ Joseph mer Arimathea-areny rang Jesu-henh kwertengerl mapel-ayeng iterel nthwerl-apedjart. Rang tjer-tj Jew twernk mapeng ater-irrek-arleng, rang itja kwe-waleny ilelhek arrpenh mapeh, “Yeng Jesu-henh nakenh-nakenh kwenh anem.” Jesu ilwekarl-penh, Joseph rang Pilate pawenhek Jesu-henh mpwerrkeh. Pilate-el renh kel ilek, rang Jesu-henh mpwerrk renh inemel angetjeh. Joseph rang Jesu-henh mpwerrk ntwerlkeng anarnpelh-ilemel angek. ³⁹ Nicodemus rang kwerele-ayel rlkwatherr alhek, rang anter npwang mwerr-akert angek. Anter rang 34 kilos anek. Nicodemus nheng rarl arrwekel Jesu-warn kwenyel petjekarl. ⁴⁰ Joseph ratherr Jesu-henh mpwerrk anter kwerele renh pernek. Ratherr mantarrel arltwemel ayernerl-anerrek. Lakenh tjertj Jew map-henh mpwareng-areng anek. ⁴¹ Ntwarr-kweny war arrer nheng Jesu ilwekarl, mer atherrkenyel anek. Irntang rang anek angath iter war. Irntang kwerele intey lyeteny anek, tjertjel mpwarekarl. Intey nhenhel tjertj irrernng arrpenh itja arrernekarl. ⁴² Intey nhenh rang arrer wart anem-arleng, kwenyengemeh wart, ratherr parrp Jesu-kenh mpwerrk renhant intey nhenh kwerele-arerrek.

20

*Jesu rang arrwetj-penh kemerrek
(Matthew 28.1-10; Mark 16.1-8; Luke 24.1-12)*

¹ Sunday ntwely mpankel aherlkentjel Mary Magdalene rang intey-warn alhek, awenng-warn. Kwerele rang aretj-alhek irntang renh anamelh-ilekarl intey arrew kwerele. ² Mary Magdalene rang angkep twep-irremel

arrtjanek kwertengerl atherr-warn. Nheng Simon Peter-warn kwertengerl arrpenh nheng-warn thwen, kwerarl Jesu nyerrketjart. Mary rang renh-atherrenh ateng-iletj-alhek, “Arrpenh mapel kwenh Ngkart-henh mpwerrk intey nhengeng inemel alengk-wek. Nwern itja kaltj, nthenh inang renh arrernekarl.”

³ Peter kwertengerl arrpenh nheng thwen arrtjanerl-annerrek intey-warn, aretjeh. ⁴ Kwertengerl arrpenh nheng arrenker arrtjanek, Peter kwereng arrwekel-irrek. Rek-amparr intey kwer irnetj-alhek. ⁵ Rang kwen-irremel kert-arek intey kwen renh. Rang mantarr interleh arek. Mantarr *bandage*-arteh alkey map. Rang itja intey-warn irrpek, kethel ntwarreng war rang arek. ⁶ Kwereng Peter rang intey-warn kwen irrpenhek, mantarr inenhant interleh aretj-alhek. Mantarr alkey map *bandage*-arteh. ⁷ Mantarr arrpenh kapert-henh rang arek iterel interleh, artaper kwer interleh. ⁸ Kwertengerl arrpenh nheng intey-warn kwen irrpenhek, arratjekart aretjeh. Rang arek mantarr alkey map *bandage*-arteh, kenh Jesu-henh mpwerrk rang ywarek. Rang nakek, Jesu rang kemerrekarl. ⁹ Kwertengerl inang itja alhengk-arek, angketj nheng Altjerr-henh pipel-arleng interleh, Jesu rang arrwetj-penh iteth-irremel kemerretjenharl. ¹⁰ Ratherr mer-warn angkep alperrek.

Jesu mernelhek Mary Magdalene-ek

¹¹ Mary rang inteyeng kethel ingkern akay arnetjam. Rang arnetjam-rlwer, rang kwen-irremel intey kwen kert-arek. ¹² Rang angel alker-areny atherr arek, mantarr mperlker-akert. Angel nyent Jesu-henh kapert intekarl-penh kwerel anetjam. Angel arrpenh Jesu-henh ingkang intekarl-penh kwerel anetjam.

¹³ Angel ratherr renh pawenhek, “Arrweketjay! Wenheng ntwang arnem?”

Mary-el renh-atherrenh ilek, “Inang kwenh Ngkart-henh mpwerrk angek! Yeng itja kaltj, mer nthenhel apek, inang mpwerrk renh alengk-wekarleh.” ¹⁴ Lakenh rang angkekarl-penh rang alngarelhek, artwang irnerleh arek. Rang itja alhengk-arek, artwang rang Jesu irnerleh.

¹⁵ Jesu-el renh pawenhek, “Wenhengarl ntwang arnem? Ngwenheham ntwang palenthwem?”

Mary rang iterl-arek, rang artwang arrpenheh-athen, rang kwel atherrk arntarnt-arenh-arenh irnerleh. Rang renh ilek, “Twerlkay! Ntwang apek mpwerrk keth arpenhek alengk-wek-arleng, yeng ilang, thang mpwerrk renh inerl-alpetjeheng.”

¹⁶ Jesu kwer-warn angek, “Mary-ay!” Mary-el alngarelhemel renh alhengk-arekemeh. “Rabboni”, rang angek. Rabboni *Hebrew*-henh angketjel-ayel intem kaltj-anthenh-anthenh.

¹⁷ Jesu-el renh ilek, “Ntwang yengenh itja antwerrketjeh. Yeng itja Angey-warn alpek, mpank-antey. Ntwang kwertengerl tjengenh map-warn alpang. Inenh arteng-ilang lakenh, ‘Yeng Angey tjengenh-warn angkep alpetjenh. Angey arrehantherr-henh-warn thwen. Altjerr tjengenh-warn, Altjerr arrehantherr-henh-warn thwen.”

¹⁸ Kwereng Mary Magdalene kwertengerl map-warn alpek, ateng-iletjeh. Rang inenh ilek, “Thang Ngkart arekaw!” Kwer-penhan rang inenh Jesu-henh angketj iletj-alpek.

Jesu rang kwertengerl kwerenh mapah mernelhek

¹⁹ Angwerr-angwerrel kwertengerl inang warl kwenel anak. Inang tjerrtj twernk mapeng ater-irrek. Arrew

ingkerrek martekarl. Jesu rang ineheng mpwepel irnetj-alhek. Rang inenh ilek, “Altjerr rang arrehantherr nyerrkentj mernelhem, arrantherr ngwerleny arrken kwet anerrerrang.” ²⁰ Rang ineh mernelhek, iltjang kwerenh ltwang kwerenh thwen. Kwertengerl inang Ngkart renh aremel arrken awelhek. ²¹ Jesu-el inenh weth ilek, “Altjerr rang arrehantherr nyerrkentj mernelhem, arrantherr ngwerleny arrken kwet anerrerrang. Angey rang yengenh tjerrtj ahelh-areny map-warn lanthekarl. Lakenh-arteht thang arrantherrrenh lanthem tjerrtj ineh-warn.” ²² Kwereng rang inenh pew-ilemel ilek, “Kwerrern Alngaltar rang kel arrehantherrel-arleng anememeh. ²³ Arrantherr apek tjerrtj arrpenh-henh anetj rrpwaremel wem, Altjerrel anetj kwerenh rrpwaremel wetjenh. Arrantherr apek tjerrtj arrpenh-henh anetj itja rrpwarentj-kweny, Altjerrel anetj kwerenh itja rrpwaretjenh. Lakenh.” Lakenh Jesu-el inenh ilek.

Jesu rang Thomas kwer mernelhek

²⁴ Thomas rang itja kwertengerl arrpenh mapel-arleng anek, itja Jesu renh iteth arek. Thomas arreny kwerenh arrpenh anek Tjew-atherr. ²⁵ Arltang arrpenhel inang Thomas renh aremel ilek, “Nwern Ngkart arekaw!”

Thomas rang inenh irrpelth-irremel ilek, “Thang renh ngwerrm iltjang kwerenh aretjeh-amparr, thang apek arnpetjeh iltjang kwerenh *nail*-penh iltjang tjengenhel, ltwang renh arnpetjeh-amparr, kwer-penhant thang angketj arrehantherr-henh naketjenh!”

²⁶ Kel arltang arrpenhel kwertengerl inang weth warl nyent kwerel anek. Thomas rang inehel-arleng ngwerrmemeh anek. Inang kwenel anerl-anek. Arrew ingkerrek martekarl. Jesu weth ineheng mpwepel irnetj-alhek.

Rang inenh ilek, “Altjerr rang kwet arrehantherr nyerrkentj mernelhem, arrantherr ngwerleny arrken kwet anerrerrang!” ²⁷ Rang Thomas renh ilek, “Aray, iltjang tjengenh anpay, iltjang ngkwengenhel. Rltwang-arlk. Ntwang yengenh kwet kel naketjehant!”

²⁸ Thomas-el renh ilek, “Ntwang Ngkart tjengenh anem, Altjerr tjengenh thwen!”

²⁹ Jesu-el renh ilek, “Ntwang yengenh arek-arleng, lakenheng ntwang yengenh nakek. Tjerrtj ngwenh apek yengenh nakem, inang yengenh itja arek-arleng, lakenheng Altjerr ineh angerr nyerrkem.”

Wenheng John-el angketj nhenh pip-warn arrernek?

³⁰ Jesu-el twerel aningk-ingar mpwarerl-apatjam, kwertengerl kwerenh mapeng anngetherr. Thang rrkwapentj inenh itja pip nhenh-warn arrernek. ³¹ Thang arrernek rrkwapentj nhenh map-penhant pip-warn, arrantherr Jesu naketjeheng, rang Christ anemeng, Altjerrel ngkwey alhelekarl. Thang arrernek, arrantherr renh naketjeheng, rang Altjerr-henh Ler anemeng. Arrantherr renh lakenh naketjeheng, arrantherr iteth ngampekarl anyenetjeheng.

21

Jesu rang kwertengerl kwerenh 7-eh mernelhek

¹ Jesu-henh kwertengerl map kwatj alayel iterel anerl-anek. Kwatj alay-kenh arreny Tiberias anek. ² Simon anek; arreny arrpenh kwerenh Peter anek; Thomas anek, arreny arrpenh kwerenh Tjew-atherr; Nathanael anek, town Cana-areny; Cana town rang mer Galilee-el anek. Akenheng-atherr Zebedee-kenh ler atherr James John thwen anek. Kwertengerl arrpenh atherr-arlk

anek. ³ Simon Peter-elemeh inenh ilek, “Yeng alhemaw, irrpennng antwerrketjeh.” Arrpenh mapel renh ilek, “Nwern-arlk ngkwengel-ayel alhetjeh.” Inang *boat*-warn antjemel, irrpennng *net*-el antwerrketjeh alhek. Kweny ntjaperel inang rrwapek, inang ywarn kwet irrpennng antwerrkek. ⁴ Aherrk arratetjeh-anngernt, inang artwang nyent kwatj iterel innerleh arek. Rang Jesu irnek. Kwertengerl inang renh itja alhengk-arek.

⁵ Jesu-elemeh inenh arlkemel pawenhek, “Peltj mapay! Arrantherr key ker irrpennng inerrrerrek?”

Inang renh tjernemel ilek, “Itjaw!”

⁶ Jesu-el inenh ilek, “*Boat*-eng iter ntwarel-kwer *net* renh arrantherr kwatj-warn werrerrang. Arrantherr kel irrpennng antwerrketjenhemeh!” Inang kangwerremel *net* kwatjeh wek. Kwer-penh inang *net* renh ywarn *boat*-warn tjarr-inek, irrpennng map anhwerr-akert.

⁷ Kwertengerl arrpenh nheng kwerarl Jesu angerr nyerrkek, rang Peter renh ilek, “Ngkart nhakeyay irnem!” Peter-el nhenh awemel mantarr alkey kwerenheh angkep irrpek. (Arrwekel rang mantarr alkey kwerenheh rlwek-amparr irrpennng antwerrketjeh-anngernt.) Rang *boat*-eng anarnpemel kwatj-warn irrpennng, rang kwer-warn arnekarner pwerlp-irrenhek. ⁸ Kwertengerl arrpenh map inang *boat*-el kwet anek, inang kwatj itereng itja ntwarel anek, kel arrer war, 100 *metres* war apek. Inang *net* irrpennng map-akert renh tjarr-angetjek kwatj iter-warn. ⁹ Inang *boat* kwereng anarnpek-arte, kwertengerl inang rwang amperleh arek, ker irrpennng perrkel amperleh. Inang arek mern ampeng arlkwetjeh-anngernt rwang iterel interleh.

¹⁰ Jesu-el inenh ilek, “Irrpennng rrpwetj angetjewarang.”

¹¹ Simon Peter weth *boat*-warn antjek. Inang *net* renh kwatj alay iter-warn tjarr-angek. *Net* kwerel irrpeng 153 map-akert. *Net* rang itja ltwakelhek. ¹² Jesu-el inenh ngwek, “Petjewarrang arlkwetjeh.” Kwertengerl map inang kaltj anek, rang Ngkart anerleh. Inang nyerr-irrek renh pawenhetjeh, “Ntwangam Jesu?” ¹³ Jesu-el inenh mern inemel antheke, arlkwetjeh. Kwer-penh rang irrpengemeh ineh antheke arlkwetjeh. ¹⁴ Nhenh kel rrpwetj-ingaremeh anek, Jesu rang mernelhek kwertengerl kwerenhe mapek, rang irrernngeng kemerrekarl-penh.

Jesu Peter thwen

¹⁵ Inang kel arlkwekarl-penh, Jesu Peter thwen ngakelherrek mapeng. Jesu-el Simon Peter renh pawenhek, “Simon-ay, John-kenh leray, ntwangam tjeng angerr nyerrkem?”

Simon Peter-el renh ilek, “Yaw, Ngkartay. Ntwang kel kaltj, yeng ngkweng nyerrkem.”

Jesu-el renh ilek, “Yep-yep tjengenh kwek map anhwelk-ilemel wantang.”

¹⁶ Jesu-el Peter renh weth pawenhek, “Simon John-henh leray, ntwang key arratj tjeng nyerrkem?”

Simon Peter-el renh ilek, “Yaw, Ngkartay, ntwang kel kaltj, yeng ngkweng nyerrkem.”

Jesu-el renh ilek, “Yep-yep tjengenh map arntarntarang.” *

¹⁷ Kel nyent-ingar weth Jesu-el Peter renh pawenhek, “Simon, John-henh leray, ntwang key tjeng nyerrkem?”

Jesu-el Peter renh tjelk-atwek, lakenh angkemel. Jesu-el renh pawenhek-arleng rrpwetj-ingaremeh, “Ntwang

* **21:16 Keth-ilentj:** Tjerrtj map yep-yep-artehe anem. Arntarnt-arenhel inenh Altjerr-henh angketjel-ayeng wantetjek, angketj nhenh ineh ilemel. Inang Altjerr-henh angketjeh kaltj anetjenheng.

key tjeng nyerrkemam?” Rang Jesu renh ilek, “Ngkartay, ntwartek kaltj anhwerr ingkerrekeh anem. Ntwang nhenhek kaltj anem, yeng ngkweng nyerrkemeng.”

Jesu-el renh ilek, “Yep-yep tjengenh map anhwerrk-ilemel wantang. ¹⁸ Peter-ay, arratj anhwerr, ntwang nheng anhetjeh-amparr anetjam-rlwer, ntwarrp *belt-el* ayernelhetjart, ntwarrp alhetjart, ntwang ahentj-irremel-arteh. Ntwang artwang aywang-irremel, arpenhelemeh mwerlt ngkwengenh atherr kern-iletjenh. Inang ngwenh *belt-el*-arlk ayernemel tjey-angetjenh mer kwer-warn ntwang ahentj-kweny.” ¹⁹ Jesu-el Peter angketj nhenh ilek, rang kaltj anetjenheng, arrpenh mapel Peter renh kelant irrernng atwetjenharl. Peter rang ilwetjenhel, kwer-penh tjerrtj arrpenh mapel nhenh aremeng, inang Altjerr renh naketjenheng. Kwereng Jesu-el Peter renh ilek, “Tjengel-ayel anharrel petjang!”

²⁰ Peter rang alngarelhemel arek kwertengerl nheng kwerarl Jesu rang angerr nyerrkek, rang kwer-atherreng ingkerneng petjerleh. Arrwekel kwertengerl nhenh-artek nheng Jesu-eng kwet arlkany intemel, inang kweny nyentel mern arlkwetjam. Kweny kwerel rang nheng Jesu renh pawenhek, “Ngkartay, ngwenhelam ngwenh atwenh-atwenh mapeh anyennng-anyenngel an-thetjenh?” ²¹ Peter-el kwertengerl renh aremel rang Jesu renh pawenhek, “Ngkartay, rarteh nthakenh irretjenh?”

²² Jesu-el Peter renh ilek, “Yeng apek ahentj-anem, rang iteth anetjeh yeng petj-alpetjeh-atwetj, nhenh itja ngkwengan anem. Kwer itja iterretjeh. Ngkwengan war anem, tjengeng ingkern-angkwerr petjetjeh.” ²³ Angketj nhenheng nakenh-nakenh inang iterl-arek, kwertengerl nheng kwel itja ilwetjenharl. Jesu itja angkek, kwertengerl nheng rang kwel itja ilwetjenharl. Rang war Peter renh ilek, “Yeng apek ahentj-anemeng, rang iteth

anetjeh yeng petj-alpetjeh-atwetj, nhenh itja ngkwengan anem.”

²⁴ Kwertengerl nhenh rang kwenh angketj nhenh ingkerrek pip-warn tanthemel arrernek. Rang tjerrtj mapeng alngetherr angketj nhenh ilek. Nwern kaltj, angketj kwerenh arratj anem.

²⁵ Jesu rang arrwekel angerr arrpenh mpwarek. Thang itja angketj ingkerrek pip-warn tanthek. Wenheng? Rrk-wapentj angerreng kwenh!

Anmatyerr Bible
Portions of the Holy Bible in the Anmatyerr language of
Australia

copyright © 2015 Wycliffe Bible Translators

Language: Anmatyerr (Anmatyerre)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not sell this work for a profit.

 You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-11-12

PDF generated using Haiola and XeLaTeX on 13 Nov 2021 from source files dated 8 Dec 2020

c7b5f903-6339-5827-b974-60b3bf575b31